

#### A propos de ce livre

Ceci est une copie numérique d'un ouvrage conservé depuis des générations dans les rayonnages d'une bibliothèque avant d'être numérisé avec précaution par Google dans le cadre d'un projet visant à permettre aux internautes de découvrir l'ensemble du patrimoine littéraire mondial en ligne.

Ce livre étant relativement ancien, il n'est plus protégé par la loi sur les droits d'auteur et appartient à présent au domaine public. L'expression "appartenir au domaine public" signifie que le livre en question n'a jamais été soumis aux droits d'auteur ou que ses droits légaux sont arrivés à expiration. Les conditions requises pour qu'un livre tombe dans le domaine public peuvent varier d'un pays à l'autre. Les livres libres de droit sont autant de liens avec le passé. Ils sont les témoins de la richesse de notre histoire, de notre patrimoine culturel et de la connaissance humaine et sont trop souvent difficilement accessibles au public.

Les notes de bas de page et autres annotations en marge du texte présentes dans le volume original sont reprises dans ce fichier, comme un souvenir du long chemin parcouru par l'ouvrage depuis la maison d'édition en passant par la bibliothèque pour finalement se retrouver entre vos mains.

#### Consignes d'utilisation


Google est fier de travailler en partenariat avec des bibliothèques à la numérisation des ouvrages appartenant au domaine public et de les rendre ainsi accessibles à tous. Ces livres sont en effet la propriété de tous et de toutes et nous sommes tout simplement les gardiens de ce patrimoine. Il s'agit toutefois d'un projet coûteux. Par conséquent et en vue de poursuivre la diffusion de ces ressources inépuisables, nous avons pris les dispositions nécessaires afin de prévenir les éventuels abus auxquels pourraient se livrer des sites marchands tiers, notamment en instaurant des contraintes techniques relatives aux requêtes automatisées.


Nous vous demandons également de:


- + Ne pas utiliser les fichiers à des fins commerciales Nous avons conçu le programme Google Recherche de Livres à l'usage des particuliers. Nous vous demandons donc d'utiliser uniquement ces fichiers à des fins personnelles. Ils ne sauraient en effet être employés dans un quelconque but commercial.
- + Ne pas procéder à des requêtes automatisées N'envoyez aucune requête automatisée quelle qu'elle soit au système Google. Si vous effectuez des recherches concernant les logiciels de traduction, la reconnaissance optique de caractères ou tout autre domaine nécessitant de disposer d'importantes quantités de texte, n'hésitez pas à nous contacter. Nous encourageons pour la réalisation de ce type de travaux l'utilisation des ouvrages et documents appartenant au domaine public et serions heureux de vous être utile.
- + *Ne pas supprimer l'attribution* Le filigrane Google contenu dans chaque fichier est indispensable pour informer les internautes de notre projet et leur permettre d'accéder à davantage de documents par l'intermédiaire du Programme Google Recherche de Livres. Ne le supprimez en aucun cas.
- + Rester dans la légalité Quelle que soit l'utilisation que vous comptez faire des fichiers, n'oubliez pas qu'il est de votre responsabilité de veiller à respecter la loi. Si un ouvrage appartient au domaine public américain, n'en déduisez pas pour autant qu'il en va de même dans les autres pays. La durée légale des droits d'auteur d'un livre varie d'un pays à l'autre. Nous ne sommes donc pas en mesure de répertorier les ouvrages dont l'utilisation est autorisée et ceux dont elle ne l'est pas. Ne croyez pas que le simple fait d'afficher un livre sur Google Recherche de Livres signifie que celui-ci peut être utilisé de quelque façon que ce soit dans le monde entier. La condamnation à laquelle vous vous exposeriez en cas de violation des droits d'auteur peut être sévère.

#### À propos du service Google Recherche de Livres

En favorisant la recherche et l'accès à un nombre croissant de livres disponibles dans de nombreuses langues, dont le français, Google souhaite contribuer à promouvoir la diversité culturelle grâce à Google Recherche de Livres. En effet, le Programme Google Recherche de Livres permet aux internautes de découvrir le patrimoine littéraire mondial, tout en aidant les auteurs et les éditeurs à élargir leur public. Vous pouvez effectuer des recherches en ligne dans le texte intégral de cet ouvrage à l'adresse http://books.google.com







	. *		
·			

		-		
·				
	•			
		·		

## ŒUVRES COMPLÈTES

LANGUEDOCIENNES ET FRANÇAISES

de

# L'ABBÉ FAVRE

PUBLIÉES SOUS LES AUSPICES

de la

SOCIÈTE POUR L'ÉTUDE DES LANGUES ROMANES

-XVII

TOME TROISIÈME

### MONTPELLIER

COULET ET FILS, ÉDITEURS
Libraires de la Société des Bibliophiles Languedociens
GRAND'RUE, 5.

MCMI

	1	
	•	
•		
•		
	 = .	

ŒUVRES COMPLÈTES

DF

L'ABBÉ FAVRE

III

MONTPELLIER. - TYPO (BAPHIE DELORD-BOEHM ET MARTIAL

## ŒUVRES COMPLÈTES

LANGUEDOCIENNES ET FRANÇAISES

de

# L'ABBÉ FAVRE

PUBLIÉES SOUS LES AUSPICES

de la

SOCIETE POUR L'ÉTUDE DES LANGUES ROMANES

TOME TROISIÈME

MONTPELLIER

COULET ET FILS

Libraires de la Société des Bibliophiles Languedociens GRAND'RUE, 5

MCMI

405\$6.36°

Rom 612,2

APR 18 1909

Lowell fund



## ODYSSÉE D'HOMÈRE

En vers burlesques patois.

### SOMMAIRE DU QUINZIÈME LIVRE.

Minerve engage Télémaque à revenir en Ithaque. — Conversation de deux jeunes princes. — Le fils d'Ulysse attend le réveil de Ménélas. — Ce roi lui propose de passer par Frontignan. — Réveil et déjeuner d'Hélène. — Présents. — Repas. — Miracle du dernier ordre. — Départ des jeunes princes. — Ils traversent trois royaumes, dans un matin, sur un âne. — Ils dînent à Pylos et rejoignent le vaisseau de Télémaque à la course. — Télémaque se charge d'un prophète à bon marché. — Il arrive en Ithaque. — Ulysse feint de vouloir quitter le château. — Remontrances d'Eumée. — Ulysse lui demande des nouvelles de Laërte. — Réponse d'Eumée. — Son histoire. — Entrée de Télémaque dans le port de Phorcin. — Miracle expliqué par Théoclymène. — Arrivée de Télémaque au château ou était son père.

충

· ·



## ODISSEA D'OUMERA

## LIBRE QUINZIEME.

A luna era à pena levada,

Quand Pallàs, que s'era entanchada,

Intret acò de Menelàs.

Li trouvet sus un matalàs

Telemaca que badalhava,

E Pisistrata que rounflava.

Laisset dourmi lou Pilien,

E diguet à l'Itacien:

— « Anen, cargàs vostras culotas

E fasès graissà vostras botas;

5.

10.

Fau sounjà de vite parti, E noun pas de se diverti. Pressoun vostra mera en Itaca, Qu'espouse un certen Eurimaca;

- 15. Li disoun qu'Ulissa es crebat;
  Qu'aquel es un galhard reblat,
  Capable de prestà sa pougna,
  Se lous autres vous cercoun rougna;
  Qu'anfin, calignà tant de tems,
- Es, ma fe, se moucà das gents.
  Vostre grand atabé que reva,
  La pressa tant que la soulleva.
   « Mardì, li dis, de qu'avès pòu?
  » Croucàs aquel, pioi que vous vòu.»
- Vous pourtariè força daumage;
  Penelopa vous aima fort,
  Mais acò chanjariè d'abor;
  Car s'oublidava vostre pera,
- 30. Oublidariè qu'es vostra mera.
  Adieu soun cher Telemacou,
  Se fasiè quauque Eurimacou;
  Coumença de se fa vielhota
  E la chalanda qu'es pas sota,
- 35. Per plaire à soun segound marit, Vous jougarie cent tours d'esprit.

Cresès-me, prevenès l'ourage; Anàs roumpre lou mariage, Mais fau que vous done en passant

- 40. Un avis qu'es interessant.

  Vous atendoun, procha d'Itaca,

  Per vous espoussà la casaca;

  Marchàs, segàs pas vergougnous;

  Se vous tustoun, aparàs-vous.
- 45. Lou ciel, que per vous s'interessa,
  Proutejariè pas un janfessa;
  Antau countentàs lous amis
  Qu'avès, amount, en paradis.
  Quand metrés lou ped dins vostra illa
- 50. Vous enfourmarés s'es tranquilla. Laissarés vostra barca au port, Car vous embarassariè fort, Se faliè que la rebalesses Dins lous camis plens d'arnavesses '
- Ounte savès qu'es vostre mas;
  Es aqui que vous devès rendre.
  Anen, me fagàs pas atendre,
  Savès ce que pensa lou ciel;
- 60. Alerta, entremens que fai bel. »

<sup>1</sup> Sorte de ronces. (F.)

Quand Pallàs, qu'aviè bona lenga, Aget acabat soun arenga, Que Telamaca, en s'evelhant, Escoutava tout badalhant,

- 65. Lou prince tiret Pisistrata;
  L'autre li diguet: « Quau me grata?
  Es tus, Telemaca? Ai ben som
  Mardi; s'as besoun de quicon,
  As aquì, procha la testieira,
- 70. Un toupi jout una cadieira,
  T'atirarà per soun oudou;
  Tira-lou, se vos, ramplis-lou,
  E laissa-me dourmi tranquille.»
   « Noun, s'ou dis, acò's inutille,
- 75. Li soui be sus aquel toupi;
  E tout ara es ple, Dieu merci,
  Amai, per pau qu'on se quichessa,
  Aprehande que noun versessa;
  Mais te vole dire quicon
- 80. Que te farà passà lou som:
  Nous fau descampà tout de suita,
  Sans faire pus longa visita. »
   « Per que? li dis lou Pilien,
  Es qu'aicì nous trouvan pas ben?
- 85. Vole mouri, se çai languisse. D'alhurs, tout escàs m'endourmisse,

E l'on sourtis pas d'una cour, Sans res dire, avans que siè jour. Esperen que la matinada

- 90. Sieja un pauquet pus avansada;
  Lou rei belèu se levarà,
  E l'on lou remerciarà:
  Entremens, dau som que m'empega,
  Laissa-me faire una autra plega.»
- 95. Lou fil d'Ulissa, dins lou founs, Vesiè que l'autre aviè resoun; Mais à chaca oura li cridava Que lou reloge retardava, E que, de se levà tant tard,
- Après mila boumbourinadas,
  Anfin à dech ouras sounadas,
  Li digueroun qu'après miejour,
  Au rei pourriè faire sa cour;
- 105. Que, sus las quatre ouras e miecha, Couma anava as bans de Bareja, Per quauqua malandra qu'aviè, Riscava que se levariè.

Telemaca, en gratant sa testa,

110. Se met à dire: — « Malapesta!

Pourtàs-nous vite à dejunà,

Qu'empacharà pas lou dinnà,

E planigàs pas la pitança. Lou rei dounc se pausa d'avansa,

Lou dianche li cope soun som
Couma el me copa mas mesuras! »
Quand l'aget acablat d'enjuras
E dejunat quatre ou cinq fes,

120. Entend dos ouras, e pioi tres.

— « Bon, s'ou dis, vau pourtà ma mala Aiçaval, à la granda sala;

S'es levat, li toque la man;

Si noun, partisse tout d'un van 1 ».

A mesura que davalava,
Ausiguet lou rei qu'esquillava;
Mais, couma degus noun cresiè
Que seguessa tant matiniè,
Prenguet, long tems, à soun esquilla,

130. Una pena fort inutilla.

Se passet miecha-oura amai mai,

Sans que pareguessa un laquai.

De pòu que tournà s'ajassessa,

E que lou som noun l'arrapessa,

135. Nostre daufin descadaulet; Lou mounarca que l'ausiguet,

<sup>&</sup>lt;sup>1</sup> Sans m'arrêter. (F.)

Crida: « Qui est là?... — « Soui Telemaca. Couma vau parti per Itaca,
Li ai pas vougut anà, s'ou dis,
Sans vous dire, au mens, gramesis

- 140. Sans vous dire, au mens, gramecis.

  Dourmissès, qu'encara es bona oura. »

  Aqui dessus lou rei s'auboura,

  Se leva tout soul d'assetous

  E li dis: «Entendegan-nous.
- Mais aicì fourçan pas persouna.

  Sans façoun çai poudès restà;

  E, se voulès tant, nous quità,

  Ses libre, moussu Telemaca;
- 150. Mais, se retournàs en Itaca,
  Deuriàs passà per Frountignan,
  Qu'antau nous acoumpagnarian;
  Pardine! acò se pot ben faire,
  Vous aloungarés pas de gaire. »
- 155. « Santadi, respond lou chaland, Lou tour es un pauquet trop grand. Levàs-vous, veirés sus la carta, S'acò de gaire noun m'escarta; Mais, saique la counouissès pas? »
- 160. « Oh! que si, diguet Menelàs;
   Mais, pioi qu'acò vous fai tant pena,
   Vous vole, au mens, dounà l'estrena,

- 210. Qu'era emb un cantou de la sala, Un brave parel de debàs Qu'ela mema aviè petassats. Lou jouine prince Megapanta Seguis l'esemple de sa tanta,
- 215. E li fai glissà dins la man,
  Un parel de culiès d'estam.
  Menelàs, que se teniè preste
  A li faire un present ouneste,
  Li vai querre, sans sounà mout,
- 220. Las pateletas d'un surtout,
  Un bel parel de jarretieiras,
  E dos magnifiquas ratieiras;
  Pioi tira una lesca de lard,
  Qu'era dins lou founs d'un placard
- 225. Ounte teniè de groumandisa,
  E li ou fiquet dins sa valisa.

  Quand ageroun fach lous presents,
  Enfileroun de coumpliments
  Elegants que se pot pas creire,
- 230. E de saluts que faliè veire;
  Anfin dinneroun au saloun.
  Era be tems ou jamai noun.
  Megapanta anet à la bouta,
  E la begueroun presque touta.
- 235. Lou prince era fort entendut

Dins l'art de manejà l'embut ,
De tirà lou vin d'una tina,
De fa varalhà la quentina,
E, per n'en veire lèu lou founs,

- 240. Li aviè pas ome pus proufound.

  Telemaca aquì s'enuiava
  E noun beviè, ni noun manjava,
  Par ça qu'aviè trop dejunat.
  Soun ase era dejà bardat
- 245. Davans la porta de l'estable. Li anava sautà sus lou rable, Quand un miracle survenguet, Que, certa, lous estourdiguet; N'arriva força dins lous libres,
- 250. Mais, per aqueste, l'on es libres
  De lou pas creire, se l'on vou,
  E n'en coustarà pas un sou,
  Quoueque se pot creire sans pena,
  Car n'es pas de la grossa mena:
- 255. Una Egla, que fasiè lou tour, Plounja dins una bassa-cour, Aganta una auca, vous l'espelha E la manja pres d'una trelha,

<sup>1</sup> L'entonnoir. (F.)

Pioi s'envoula galhardament:

- 260. Counvendrés be qu'absolument
  Lou proudige es pas encrouiable;
  Cepandant juroun dieus e diable
  Que, dins lou lou fet d'aquel aussel,
  Li a quicon de surnaturel.
- 265. Pisistrata dis au mounarca:

   « Esplicàs-nous de qu'acò marca?»

  Pas mot.... L'illustre Menelàs

  Era ben un bon enfantàs,

  Mais noun pas un grand devignaire;
- 270. Car s'era istat sourciè, pecaire!
  N'auriè pas agut la mitat
  De ce qu'au front li avien plantat.
  Sa femna trouvet la sentena!
  De ce que fasiè tant de pena:
- 275. « L'Egla es un aussel generous, S'ou dis, e l'autre es un fouirous; Lou premiè representa Ulissa, Qu'el mema, en se fasent justiça, Espelharà sous enemis,
- 280. Couma aquela auca qu'avès vist. Soui segura que, d'aquesta oura, Li fai, dejà, sautà la bourra....»

Le sens. (F.)

Telemaca, en fasent un saut :

— «Bon bon, diguet, acò li cau ».

- 285. Aqui dessus tourna trinqueroun,
  E lous dous princes partigueroun.
  L'un mountava d'escarlambous,
  L'autre s'era mes d'assetous.
  Lou matin arrivoun a Fera,
- 290. Ounte un pichot rei de misera, Couma veniè de dejunà, N'aget pas res per lou dinnà. Eles en disent: — « Cavalisca!» Cochoun talament sa bourrisca
- 295. Qu'après miejour, entre una e dos, Arrivoun anfin à Pilòs. Nestor aviè laissat à taula Un gros capou de Rocamaula,
- E, sus acò, mous chivaliès
  300. S'acoussoun couma dous lebriès;
  Dieu sap se vous lou descrouteroun!
  Lou pau d'osses que n'en quiteroun!
  Lous avien tant ben aprimats,

Que semblavoun istats limats;

305. Li cau rendre aquela justiça.

— « Aça, diguet lou fil d'Ulissa
A soun ami Pisistratou,
Ara qu'ai fach un regagnou,

Vau remountà sus ma galera.

- 310. N'en digas pas res à toun pera,
  Que belèu me retardariè,
  E pioi lou ciel se fachariè. »
   « Eh be, li diguet Pisistrata,
  Anen destacà ta fregata.
- 315. N'es pas lion, lou camin es bèu;
  Jouguen quau li serà pus lèu. »
   «Va.. va..» sus lou champ partigueroun,
  E de tant ben que courrigueroun,
  Avans de se li estre renduts,
- 320. Susavoun couma de perduts;
  Mais, per poude quità lou courre,
  Fauguet que toumbessoun de mourre.
  Anfin, au port, toumbant, levant,
  S'agandigueroun en plourant;
- 325. Noun pas par ça que se quitavoun,
  Mais par ça que sas dents sannavoun;
  Aquì, se fan quatre poutous,
  E se separoun toutes dous.
  Sus soun vaisseu, lou fil d'Ulissa,
- 330. Per se rendre Pallàs proupiça,
  Met à la brocha dous gigots,
  Quand un voulur banit d'Argòs,
  Qu'aviè besoun d'una retreta,
  Li venguet dire: « Soui proufeta,

- 335. E, segu, das pus entenduts.

  Descende d'Amfiaraüs,

  Aquel celebre devignaire;

  Sa femna, au mens, faguet moun paire,

  E sen, per lou mens, aliats,
- 340. Car, adounc, eroun maridats.
  Vesès be que Teoclimena
  Es un sourciè de bona mena;
  Prenès-me: m'aurés bon mercat;
  Embe pas res, soui prou pagat,
- 345. Mai que me passés en Itaca.
   « Paura, li diguet Telemaca,
  Ses pas de trop sus un batèu,
  E rendrés pas lou mieu pus grèu;
  Tout proufeta es un ome leste,
- 350. E vostre pagament es preste;
  Mountàs...» Vougueroun tant bon trin,
  Qu'intreroun au port de Forcin,
  Ounte, en venent de Feacia,
  Ulissa aviè vist sa patria.
- Era tratat embe respec
  De moussu soun varlet Eumea,
  E plasiè fort à La Ramea;
  Fasiè per se faire arrestà
- 360. Semblant de lous voulé quità;

—« Aça, s'ou dis, vous encoumode,
E tout mandiant fau que rode;
Acò soun las reglas de l'art.
Ara, davans que siè pus tard,

- 365. M'en vau faire un tour per la vila Que doumina dins aquesta illa; Après acò me camparai Davans la porta dau palai. Se lous princes soun pas de diables,
- 370. Se soun, tant si peu, charitables, Tant li farai lou bon varlet, Que me dounaran quicoumet. N'es pas tout de veire l'escarpa, Per l'avedre, fau moulhà l'arpa;
- 375. Ben ou faren per qu'illaval, Car, vesès, aime lou traval, C'et-à-dire n'en fau pas gaire; Mais aime de lou faire faire, Acò 's tout un ou pau s'en fau,
- 380. E couma acò, l'on prend pas mau.»

   « Elàs! li repliquet Eumea,

  Desfasès-vous d'aquela idea;

  Se vei be que counouissès pas

  Lous ouvriès de quau me parlàs.
- 385. Vesès, soun de gents d'una mena Que, mai que vous pogoun fa pena,

Sembla, lou diàucou noun me siè! Qu'ajoun gagnat lou Jubilè; Soun de marauds empitouiables;

- 390. Noun respetoun ni dieus, ni diables;
  Se li anàs, tant vous bourraran,
  Que, belèu, vous esquinaran.
  E pioi, vous ses un galhard merle,
  Un grand sujet, un poulit guerle
- 395. Per fa la cour à d'estafiès
  Pus faquins que de financiès!
  Cresès que prenguessoun per page
  Un rougnous de vostre equipage?
  Salut, moun paure Barrabàs!
- 400. Ses trop viel e trop coucarràs;
  Davans, ni darriès sous carrossas,
  N'an pas de tant vilenas rossas;
  Sous chivals, amai sous varlets,
  Soun milhou bastits e pus nets;
- 405. Manjoun pas que dins la faiança;
  Creboun d'ourguiol e de pitança.
  An de galouns sus sous abits;
  E vous voulès fretà d'aquis?
  Vous, qu'avès l'er d'un viel charnega!

410. E que pudissès d'una lega?

<sup>7</sup> Grondeur. (F.)

Fi, dounc! demouràs de repau; Restàs-me dins aqueste oustau, Jusqu'au retour de Telemaca. Quand serà vengut en Itaca,

- 415. Es un bon enfant, vous veirà, E belèu vous assistarà; Quand noun vous fariè qu'una vesta, Car vostre fitrèu put qu'empesta, Au mens, seriàs pus recatat.»
- 420. Ulissa era mai qu'encantat
  De veire embe quinta finessa
  Li marcavoun tant de tendressa.
   « Voulès que çai reste, s'ou dis ;
  L'ase quilha quau s'en dedis!
- 425. Fasès fort ben: es pas per dire;
  Mais, ieu, trove pas res de pire
  Que d'anà courre lou païs,
  Quand on a trouvat un bon nis.
  Acò's una vida de diable;
- 430. Tantòs couchats dins un estable Ounte, per couissì, noun avès Qu'un moulou de ce que savès; Tantòs vous donoun per pitança De cops de bilha en aboundança.
- 435. Vostres abilhaments d'iver Soun esselents per prene l'er.

E, per un que vous fai l'aumorna, N'i'a mila que vous fan escorna; Mai, anfin, pioi que me fourçàs

- 440. A demourà dins vostre mas,
  Digàs-me se lou viel Laerta
  Es vengut un pau pus alerta,
  Despioi que soun fil es partit.
  Adounc semblava un abestit:
- 445. Mais, dins vint ans, las causas chanjoun...»

   « Aboutàs ! las nieiras lou manjoun,
  Li respond lou mestre varlet,
  S'es courbat que sembla un nanet;
  Repapia, bava, toujour ploura,
- 450. E languis que venga soun oura
  D'anà veire, acò de Plutoun,
  Se l'on es milhou qu'aiçamount.
  Sa femna, que li es davalada,
  N'es pas, au mens, pus remountada,
- 455. Signe que s'en soucita pas,
  Ou, belèu, l'endrech es trop bas;
  Moun Dieu! la brava femna qu'era!
  Li a pas un comi de galera
  Qu'aplique tant ben un tustau,
- 460. Couma ela fasiè dins l'oustau. Segu que tout anava d'ordre; Mais ara tout es en desordre.

La jouina noun sap enzengà Que ce que servis per fringà;

- 465. E davans que se siè pimpada, Ben fardada, ben miralhada, Qu'aja reçauput sous briquets, N'a pas lou tems de fa pus res. Per ieu, faguere una grand perta
- 470. En perdent Madama Laerta;
  M'aimava de bona amitiè;
  Despioi long tems me counoussiè.
  Una de sas filhas, pecaire!
  M'aviè causit per soun fringaire;
- 475. Mais la maridet à Samos,
  Embe, crese, un marchand en gros.
  La reina, que me vesiè jouine,
  Fres, galhard, flourat couma un mouine,
  Save pas de que se sounget,
- 480. Mais, per soun page me prenguet, E, per me faire ma fourtuna M'auriè, parbieu! dounat la luna, Se n'aviè pougut dispausà.... Atendès..... laissàs-me pausà;
- 485. Car, quand sa mort me ven en testa, L'enveja de plourà m'arresta. Segnur Dieu, per que mourissiè, Qu'encara l'on s'amusariè!

Paura femna! quinte daumage!

- 490. Era encara d'un prou bon age;
  Amai ben grassa, si vous plet;
  Mais savès de que la tuet?
  Lou lagui d'estre pas sourcieira.
  Vouliè saupre, la chivalieira,
- 495. Se soun fil era mort ou vieu
  E, couma pouguet pas, adieu;
  Dins sa cambra, una après-dinnada,
  La trouveroun cambavirada.»
  Lou grand Ulissa era atendrit
- Das trets toucants d'aquel recit;
  E, per fa chanjà de matiera,
  Diguet au page de sa mera:
   « Countàs-me, Moussu, se vous plai,
  Se vous ses nascut per qu'içai;
- 505. D'ounte tiràs vostra ourigina, Car, anfin, n'avès pas grand mina. Counoussiàs-ti vostres parents? Eroun-ti de certenas gents? Coumprenès be, saique, à bel ime,
- 510. Se ses bastard ou legitime? »

  Eumea, en trin à se vantà,

  Li diguet: « Vous ou vau countà :

  Vous cau saupre que la Siria

  Es dejout l'illa d'Ortigia.

- 515. Aqui lou sourel fai soun som E pot pas avansà pus lion. L'endrech es una pichota illa, Mais, se pot dire, ben fertilla; Prouduis de plantas d'alapàs,
- 520. E de tant poulit gramenàs

  Que li a pas un rei, dins la Greça,

  Que n'en manje d'aquela espeça;

  Atabé, dins aquel païs,

  Lous ases an lou pèu fort lis.
- 525. Dins aquela reina das illas, Li countavian jusqu'à dos vilas. Etesiàs Ormenidès, Qu'era moun pera, se cresès, Sus l'una e l'autra douminava,
- 530. E tout lou mounde l'adourava.
  »De piratas Feniciens,
  C'et-à-dire de fiers vauriens,
  Ageroun, un souer, l'endustria
  De m'enlevà de ma patria,
- 535. E de me vendre per aicls,
  Ounte soui galhard, Dieu mercls,
  E fort countent dins lou service.»
  —« Oh! viel prince, que vous planisse,
  Li diguet lou mounarca grec,
- 540. Emb un proufound salamelec;

En aprenent vostre ourigina, Que respond pas à vostra mina, Me fasès sounjà que lou sort, As bravas gents fai souvent tort;

- 545. Cepandant vostra destinada
  Es encara prou ben anada:
  Sias jouine, vous ses fas vielhet;
  De mestre, ses vengut varlet;
  E couma diantre que tout vire,
- 550. Poudès pas estre gaire pire;
  Ses pas tant de plagne, sournouès!
  Es ieu que soui un fier grivouès!
  Li a noun sai quant de tems que rode:
  Ai bèu faire tout ce que pode,
- 555. Per me proucurà lou repau,
  Entremens marche tout descau. »
  Antau parlet lou rei d'Itaca;
  Dins aquel tems soun Telemaca,
  Favourisat per lou destin,
- 560. Intret dins lou port de Forcin;
  Mais vouguet faire un tour dins l'illa,
  Avans de se rendre à la vila.
  Dau tems que preniè soun paquet,
  Vegeroun en l'er un mouisset;

<sup>&</sup>lt;sup>1</sup> Épervier. (F.)

565. Era Apoulloun que lou mandava. Telemaca lou regardava, E recasset dessus soun nas, La mitat d'un gros estrounàs Que l'aussel aviè mes en peça.

- 570. Foucha! qu'es de la bela espeça,
  Dis lou fil d'Amfiaraüs,
  L'estron qu'avès aqui dessus!
  Antau n'en farà dins la suita
  Certena troupa parasita,
- 575. Quand un jour, vostre pera e vous, Per li fa passà lou degoust, La purgarés à cops de barra! » Telemaca, en fretant sa narra, Risiè de s'entendre esplicà
- 580. Ce qu'antau lou fasiè tourcà.

  Couma mancava pas de rusa,
  Passet per la font d'Aretusa,
  E s'agandiguet jusqu'au mas,
  Ounte segu, prevesiè pas
- 585. De rencountrà Moussu soun pera, Surtout dins l'equipage qu'era.

FIN DU QUINZIÈME LIVRE.





## ODYSSÉE D'HOMÈRE

En vers burlesques patois.

### SOMMAIRE DU SEIZIÈME LIVRE.

Télémaque est reconnu par un chien et caressé par Eumée. - Éloge de Pénélope. - Repas silencieux. - Eumée propose à Télémaque de se charger d'Ulysse. - Le jeune prince s'en excuse poliment. — Ulysse déconcerté fait un superbe discours hors de propos. - Les deux princes s'admirent l'un l'autre. - Eumée part pour la cour. -Télémaque l'éconduit - Minerve étrille longuement Ulysse. — Elle lui rend sa figure naturelle. — Son fils étonné le prend pour un Dieu. - Ulysse se fait connaître à lui. — Télémaque doute qu'il soit son père. — Il le croit. - Ils s'admirent encore tous deux. - Ils pleurent, ils chantent, ils dansent - Colloque intéressant. - Les prétendants apprennent le retour de Télémaque. - Harangue d'Eurymacus. - Compliments de l'assemblée à Antinous. - Sa réponse. - Avis d'Amphynome. - Noble emportement de Pénélope. — Eurymaque l'adoucit. — Retour d'Eumée au château.

	· • • • • • • • • • • • • • • • • • • •
	•
·	
•	



# ODISSEA D'OUMERA

LIBRE SEGIEME.

ous pastres, un pau peresous, Venien d'alargà sous moutous, Lorsque lou pichot Telemaca, Que countavoun ben lion d'Itaca, Arrivet tout soulet au mas,

E picava couma un dragas. Seguet ausit d'una levreta, Que li anet, tout brallant la quoueta: La couquina lou counoussiè.

10. Ulissa dis au maseliè:

5.

—« Degajàs-vous, grossa pecora, Laissés pas lou mounde defora, Au demenà de vostres chis. Coumprenès pas que soun d'amis?»

- Eumea, en vesent Telemaca,
  Rullet toutes lous escaliès.
  Save pas s'ou faguet esprès,
  Mais, per marcà sa poulitessa,
- 20. Anava pas mau qu'ou faguessa;
  Lou prend bras dessus, bras dessous,
  E li faguet mila poutous,
  Sans poude dire una paraula;
  Bavet couma una cagaraula,
- 25. Sus lou visage de l'enfant,

  Tant l'aimava ou fasiè semblant!

  A la fin, li dis: « Poudès creire

  Que languissiei ben de vous veire.

  Eh be, coussì vous ses pourtat,
- 30. Despioi que nous avès quitat?
  Devès as Dieus una candela,
  Car l'avès escapada bela.
  Santadi! quinte plesi n'ai!
  Ses dounc galhard? bon, longa mai!»
- 35. Lou pastre qu'antau perourava, Era tant toucat que plourava.

Telemaca, per lou calà, Se sounget: Te li cau parlà. -«Countàs-me, li dis, se ma mera, 40. Lassada d'esperà moun pera, A la fin n'a pas gis causit De sous fringaires per marit ?... » - « Oh! nani, respoundet Eumea, Aima be trop sa renoumea, 45. Per mancà de fidelitat; Quinta una per la bravetat!! Sus terra li a pas sa parieira; Ela vous ou dis la premieira, E degus noun ou sap tant ben; 50. Car, coumprenès be... mais intren; Venoun d'escullà la soupeta, Es bon de la manjà caudeta.» Lou prince era trop ben aprés, Per s'ou faire dire dos fes. 55. Ulissa, lion de la fricassa, Reculet per li faire plaça; Mais el, qu'era ben elevat, Lou metet vis-à-vis dau plat. Tant que li aget quicon à taula, 60. Se diguet pas una paraula,

<sup>&</sup>lt;sup>1</sup> Sagesse. (F.)

La jouina noun sap enzengà Que ce que servis per fringà;

- 465. E davans que se siè pimpada, Ben fardada, ben miralhada, Qu'aja reçauput sous briquets, N'a pas lou tems de fa pus res. Per ieu, faguere una grand perta
- 470. En perdent Madama Laerta;
  M'aimava de bona amitiè;
  Despioi long tems me counoussiè.
  Una de sas filhas, pecaire!
  M'aviè causit per soun fringaire;
- 475. Mais la maridet à Samòs,
  Embe, crese, un marchand en gros.
  La reina, que me vesiè jouine,
  Fres, galhard, flourat couma un mouine,
  Save pas de que se sounget,
- 480. Mais, per soun page me prenguet, E, per me faire ma fourtuna M'auriè, parbieu! dounat la luna, Se n'aviè pougut dispausà.... Atendès..... laissàs-me pausà;
- 485. Car, quand sa mort me ven en testa, L'enveja de plourà m'arresta. Segnur Dieu, per que mourissiè, Qu'encara l'on s'amusariè!

Paura femna! quinte daumage!

- 490. Era encara d'un prou bon age;
  Amai ben grassa, si vous plet;
  Mais savès de que la tuet?
  Lou lagui d'estre pas sourcieira.
  Vouliè saupre, la chivalieira,
- 495. Se soun fil era mort ou vieu
  E, couma pouguet pas, adieu;
  Dins sa cambra, una après-dinnada,
  La trouveroun cambavirada.»
  Lou grand Ulissa era atendrit
- 500. Das trets toucants d'aquel recit;
  E, per fa chanjà de matiera,
  Diguet au page de sa mera:
   « Countàs-me, Moussu, se vous plai,
  Se vous ses nascut per qu'içai;
- 505. D'ounte tiràs vostra ourigina, Car, anfin, n'avès pas grand mina. Counoussiàs-ti vostres parents? Eroun-ti de certenas gents? Coumprenès be, saique, à bel ime,
- 510. Se ses bastard ou legitime? »

  Eumea, en trin à se vantà,

  Li diguet: « Vous ou vau countà:

  Vous cau saupre que la Siria

  Es dejout l'illa d'Ortigia.

- 515. Aqui lou sourel fai soun som
  E pot pas avansà pus lion.
  L'endrech es una pichota illa,
  Mais, se pot dire, ben fertilla;
  Prouduis de plantas d'alapàs,
- 520. E de tant poulit gramenàs
  Que li a pas un rei, dins la Greça,
  Que n'en manje d'aquela espeça;
  Atabé, dins aquel païs,
  Lous ases an lou pèu fort lis.
- 525. Dins aquela reina das illas, Li countavian jusqu'à dos vilas. Etesiàs Ormenidès, Qu'era moun pera, se cresès, Sus l'una e l'autra douminava,
- 530. E tout lou mounde l'adourava.
  »De piratas Feniciens,
  C'et-à-dire de fiers vauriens,
  Ageroun, un souer, l'endustria
  De m'enlevà de ma patria,
- 535. E de me vendre per aicls,
  Ounte soui galhard, Dieu mercls,
  E fort countent dins lou service.»
  —« Oh! viel prince, que vous planisse,
  Li diguet lou mounarca grec,
- 540. Emb un proufound salamelec;

En aprenent vostre ourigina, Que respond pas à vostra mina, Me fasès sounjà que lou sort, As bravas gents fai souvent tort;

- 545. Cepandant vostra destinada
  Es encara prou ben anada:
  Sias jouine, vous ses fas vielhet;
  De mestre, ses vengut varlet;
  E couma diantre que tout vire,
- 550. Poudès pas estre gaire pire;
  Ses pas tant de plagne, sournouès!
  Es ieu que soui un fier grivouès!
  Li a noun sai quant de tems que rode:
  Ai bèu faire tout ce que pode,
- 555. Per me proucurà lou repau, Entremens marche tout descau. » Antau parlet lou rei d'Itaca; Dins aquel tems soun Telemaca, Favourisat per lou destin,
- 560. Intret dins lou port de Forcin;
  Mais vouguet faire un tour dins l'illa,
  Avans de se rendre à la vila.
  Dau tems que preniè soun paquet,
  Vegeroun en l'er un mouisset;

<sup>&</sup>lt;sup>1</sup> Epervier. (F.)

565. Era Apoulloun que lou mandava. Telemaca lou regardava, E recasset dessus soun nas, La mitat d'un gros estrounàs Que l'aussel aviè mes en peça.

- 570. —« Foucha! qu'es de la bela espeça,
  Dis lou fil d'Amfiaraüs,
  L'estron qu'avès aquì dessus!
  Antau n'en farà dins la suita
  Certena troupa parasita,
- 575. Quand un jour, vostre pera e vous, Per li fa passà lou degoust, La purgarés à cops de barra! » Telemaca, en fretant sa narra, Risiè de s'entendre esplicà
- 580. Ce qu'antau lou fasiè tourcà.

  Couma mancava pas de rusa,
  Passet per la font d'Aretusa,
  E s'agandiguet jusqu'au mas,
  Ounte segu, prevesiè pas
- 585. De rencountrà Moussu soun pera, Surtout dins l'equipage qu'era.

FIN DU QUINZIÈME LIVRE.



## ODYSSÉE D'HOMÈRE

En vers burlesques patois.

### SOMMAIRE DU SEIZIÈME LIVRE.

Télémaque est reconnu par un chien et caressé par Eumée. - Éloge de Pénélope. - Repas silencieux. - Eumée propose à Télémaque de se charger d'Ulysse. - Le jeune prince s'en excuse poliment. — Ulysse déconcerté fait un superbe discours hors de propos. - Les deux princes s'admirent l'un l'autre. - Eumée part pour la cour. -Télémaque l'éconduit. — Minerve étrille longuement Ulysse. - Elle lui rend sa figure naturelle. - Son fils étonné le prend pour un Dieu. — Ulysse se fait connaître à lui. — Télémaque doute qu'il soit son père. — Il le croit. - Ils s'admirent encore tous deux. - Ils pleurent, ils chantent, ils dansent - Colloque intéressant. - Les prétendants apprennent le retour de Télémaque. — Harangue d'Eurymacus. — Compliments de l'assemblée à Antinous. - Sa réponse. - Avis d'Amphynome. - Noble emportement de Pénélope. - Eurymaque l'adoucit. - Retour d'Eumée au château.

		-		
		•		
	•			
	·			
		,		
·				



# ODISSEA D'OUMERA

LIBRE SEGIEME.

ous pastres, un pau peresous,
Venien d'alargà sous moutous,
Lorsque lou pichot Telemaca,
Que countavoun ben lion d'Itaca,
Arrivet tout soulet au mas,
E picava couma un dragàs.
Seguet ausit d'una levreta.

Seguet ausit d'una levreta, Que li anet, tout brallant la quoueta: La couquina lou counoussie.

10. Ulissa dis au maseliè:

—« Degajàs-vous, grossa pecora, Laissés pas lou mounde defora, Au demenà de vostres chis. Coumprenès pas que soun d'amis?»

- Eumea, en vesent Telemaca,
  Rullet toutes lous escaliès.
  Save pas s'ou faguet esprès,
  Mais, per marcà sa poulitessa,
- 20. Anava pas mau qu'ou faguessa; Lou prend bras dessus, bras dessous, E li faguet mila poutous, Sans poude dire una paraula; Bavet couma una cagaraula,
- 25. Sus lou visage de l'enfant,
  Tant l'aimava ou fasiè semblant!
  A la fin, li dis: « Poudès creire
  Que languissiei ben de vous veire.
  Eh be, coussì vous ses pourtat,
- 30. Despioi que nous avès quitat?
  Devès as Dieus una candela,
  Car l'avès escapada bela.
  Santadi! quinte plesi n'ai!
  Ses dounc galhard? bon, longa mai!»
- 35. Lou pastre qu'antau perourava, Era tant toucat que plourava.

Telemaca, per lou calà, Se sounget: Te li cau parlà. —«Countàs-me, li dis, se ma mera,

- 40. Lassada d'esperà moun pera,
  A la fin n'a pas gis causit
  De sous fringaires per marit?...»

   « Oh! nani, respoundet Eumea,
  Aima be trop sa renoumea,
- 45. Per mancà de fidelitat;
  Quinta una per la bravetat!
  Sus terra li a pas sa parieira;
  Ela vous ou dis la premieira,
  E degus noun ou sap tant ben;
- Venoun d'escullà la soupeta,
  Es bon de la manjà caudeta.»
  Lou prince era trop ben aprés,
  Per s'ou faire dire dos fes.
- S5. Ulissa, lion de la fricassa,
  Reculet per li faire plaça;
  Mais el, qu'era ben elevat,
  Lou metet vis-à-vis dau plat.
  Tant que li aget quicon à taula,
- 60. Se diguet pas una paraula,

<sup>1</sup> Sagesse. (F.)

Mais, quand tout seguet engulit, Telemaca, en garçoun d'esprit, Que pourtant li entend pas maliça, Dis au pastre, en parlant d'Ulissa:

- 65. —« Quau diantre es aquel viel sournouès?»
  L'autre respond: « Es un Cretouès
  Que, per poude vieure, pecaire!
  A pres lou mestiè de roudaire,
  E ramplis sa proufessioun
- 70. En fort ouneste poulissoun.
  Ramava sus una galera,
  Mais n'escapet, lou rusat qu'era,
  E l'ai retirat dins lou mas.
  Se vous lou voulès, avisàs. »
- 75. « Gramecis de la poulitessa,
  Dis lou prince, mais ren noun pressa;
  Cavalisca! lou pesoulhous
  A lou visage tant merdous,
  Que sa degoustanta persouna,
- 80. Au cop d'iol soul, vous empouisouna.
  Jujàs se vous n'en privarian!
  La bela intrada que farian,
  S'un tel ecuiè, dins Itaca,
  Acoumpagnava Telemaca!
- 85. Gardàs-lou, per vous, l'emperit ; Vous li farai faire un abit.

E pioi, se s'en vai, que s'en ane, Car ai pòu que noun vous engrane. » Ulissa, que fasiè semblant

- 90. De pas entendre soun enfant,
  Per faire chanjà la matiera,
  Li parlet d'aquesta maniera:
   « Coussi, vous qu'avès l'er ardit,
  Mutin, roubuste, plen d'esprit,
- 95. Poudès soufri que de canalha Dins vostre oustau faga ripalha? M'estoune be, mais couardàs, Par çà que saique apreandàs Que lou pople, ni la familha,
- 100. Segoundessoun pas vostra bilha.
  Soui segu qu'aqueles gouluts,
  Dins Itaca soun soustenguts.
  Cepandant, s'ere fil d'Ulissa,
- Fariei, parbieu, bona justiça;

  105. Li espoussetariei lous gigots,

  Que li quitariei pas que l'os.

  Vole qu'un ase sié moun paire;

  Se, mai que me laissessoun faire,

  Noun vous lous couave, un per un,

110. D'un cop de sartan i à chacun,

<sup>1</sup> Poêle à frire. (F.)

E s'un jour venien à li ou dire,
Ulissa pissariè de rire. »

Antau lou coucàrrou parlet.
Lou prince, qu'embalausiguet,

115. Li respond de fort bona graça:

- « Crenisse pas la populaça;

  N'en soui prou aimat, Dieu mercis,

  Mais, per ma vengença, s'agis

  Qu'afin de la rendre segura,
- Ulissa era couma enclausit
  Sus lou bon sens de soun manit;
  Sans li res dire lou badava;
  Entremens lou pichot mandava
- Dire à sa mera, soun retour,

  Sans lou publià dins la vila.

  De la façoun la pus civila,

  Lou varlet li dis: « Moun enfant,
- 130. Fau commençà per vostre grand;
  Despioi que ses partit, pecaire!
  Noun fai que roudà lou terraire,
  Lou paure ome es devariat,
  Es vengut magre couma un cat
- 135. A quau n'an pas tirat la guela; Mais se reçaviè la nouvela

De vostre retour, lou premiè, Aco lou rebriscoulariè. »

- « Estàs siau, moussu lou piniastre,

- 140. Repliquet Telemaca au pastre, Es ben à vous, viel emboulhat, A reglà d'afaires d'estat! Tant pis per lou paure Laerta, S'à cent ans n'es pas pus alerta!
- 145. Es daumage; l'on lou planis, Mais fasès ce que l'on vous dis. Anàs vite dire à ma mera Que, se n'es pas pus en coulera, M'ou faga saupre, que vendrai.
- Arri.... marchàs dounc, cavalisca!»

  A força que lou pounchounet,
  Lou pigre à la fin caminet.
- Tout lou bourrant, l'endoutrinava
  E lou menet prou lion dau mas.
  Entremens la saja Pallàs
  Descend, abilhada en bergeira;
- 160. Prenguet Ulissa à la crinieira, E vous lou rebalet antau Vint passes defora l'oustau,

Lous chis la regardavoun faire, Sans se melà d'aquel afaire.....

165. Quand l'aget ben fach renegà, A força de lou roussegà:

> — « Counouisses-ti quan te tapina? Li dis la pastressa divina.

Fagas pas la fougna, matràs,

170. Soui ta bona amiga Pallàs.
Es tems de prene tas mesuras.
Ara per venjà tas enjuras;
Per aco, me veses aicì,
E saves be que, Dieu mercì,

Te secoundarai couma un diable. »
D'un grand cop de bagueta d'or,
Espousset Ulissa, e, d'abor,
Toutas sas pelhas li toumberoun,

180. Sous pèusses tourna s'aloungueroun, Soun visage s'esclerciguet, Soun esquina se despleguet, Reprenguet soun er de mounarca. Soun fil arriva, lou remarca,

185. E crida, en metent capel bas:

— « Ah! ses un dieu?.... Viel coucarras! Ben vous en souet.... M'en rejouïsse. Vous ai mancat.... m'en repentisse....

Se l'on vous aviè counougut, 190. Seriàs estat milhou vengut. Mais quau vouliàs que counouguessa Un dieu deguisat en Jan-fessa? Permetès que, de moun troupel, Ara vous imole un agnel 195. Farcit emb de grossa saucissa....» - « L'oufranda es bona, dis Ulissa, S'ere un dieu, n'en prendriei lou fun; Mais vole ma part dau farçun, Car soui lou marit de ta mera, 200. Amai, saique, un pauquet toun pera..... Veni, moun cher Telemacou, Veni me faire un gros poutou. » Après ce que veniè de veire, Telemaca penchava à creire 205. Qu'aco noun era qu'un sourciè Qu'era jouine e viel, quand vouliè; Lou doute lou devarilhava. Ulissa que l'esaminava, Li diguet: — « Eh be, lanturlu, 210. Quinta mina me tenes, tu? Saique ta cervela s'estouna Dau chanjament de ma persouna E coumprenes pas, beligàs,

Qu'es un ouvrage de Pallàs?

- 215. Li a vint ans, moun cher Telemaca,
  Que cerque lou camì d'Itaca,
  E, se me li vese agandit,
  Es pas sans avedre patit;
  Mais oublide touta ma pena
- 220. En trouvant un fil de ta mena. »

  Telemaca seguet toucat

  D'un eloge tant delicat,

  E tout disent: « Li a pas qu'un pera

  Que parle d'aquela maniera »,
- 225. Plouret e li sautet au col,
  En cridant couma s'era fol.
  Ulissa, qu'atabé souscava,
  En fau bourdoun l'acoumpagnava.
  Jamai s'es pas ausit duo
- 230. Tant ben penchinat couma aco.
  Parlavoun pas, mais en musica,
  Sans se ren dire, l'on s'esplica.
  Dos ou tres notas de bemol,
  Sus una clau de geresol,
- 235. N'en disoun mai que Demostena, Quand s'escanava dins Atena, E la defensa de Miloun Vau pas lou mendre rigaudon.....

<sup>1</sup> S'égosillait. (F.)

Car jujàs, Messius, quand la dansa 240. Se ven jougne embe la cadansa, S'aco's pas quicon de frapant? Lou rei grec, embe soun enfant, Faliè veire coussi dansavoun! L'er pietadous que soulfiavoun! 245. Que d'elouquença dins sous pas! Que d'amour dins sous entrechats! Tout esprimava, embe finessa, De grands sentiments de tendressa. Quand l'un e l'autre aget finit 250. De faire antau priva d'esprit, - Enfourmàs-me, dis Telemaca, Coussi ses vengut en Itaca?.....» Soun papà vite li ou countet E sus lou champ li demandet 255. Quand de galants aviè sa maire. « Car s'ou dis, se n'eroun pas gaire, N'autres dous, entre nioch e jour, Veirian de li jougà lou tour.» -« Save, respond lou fil d'Ulissa, 260. Que vous ses ome de pouliça, E que, quand viràs d'un tustau,

> Prend lou camì de l'espitau; Mai aicì li a pas res à toundre, La campana es trop dura à foundre;

- 265. Soun, per lou mens, cent galinets;
  Chacun a vint-e-cinq varlets;
  Quand de chacun d'aquela cola
  N'aurian pas qu'una crouquignola,
  Aco fariè, de comte round,
- 270. Dous-mila-sieis-cent cops de poung, Que partajarian entre nautres; Amai n'acassarian be d'autres, Car, quand la canalha es en trin, Se countenta pas d'un tapin.
- 275. Counten de chacun per estrena,
  Au mens una miecha dougena;
  Ara multipliàs lou tout,
  E veirés, quand serés au bout,
  Que rend, en chifras ben pausadas,
- 280. Quinze-mila-sieis-cent pautadas;
  Permetés qu'en fil ben aprés,
  Vous cede aqui dessus mous drechs. »
   «Oh! se la partida era egala,
- 285. Interessen nostres amis,

  E, se sen mai que lous couquis,

  Adounc farai veire à moun paire

  Que soun fil a de saupre-faire. »

Seriei vostre prevot de sala!

- « Aubé per ce qu'es de chifrà!
- 290. Mais quand s'agis de s'aparà,

Vese, li dis lou rei d'Itaca, Qué siès una paura patraca. » Per pas echouà dins soun fet, Notre mounarca decidet

- 295. Que lou lendeman Telemaca S'anariè moustrà dins Itaca; Que per el, couma auparavant, Seriè mes en Caramantran Per la graça de Tritounida:
- 300. E vendriè, menat per un guida,
  Ensajà de dounà d'amour
  As damas qu'eroun à la cour.
  Per ben counduire aquel afaire,
  Lou fil aviè proumés au paire
- 305. Que, quand li coupessoun un bras, Diriè que lou counouissiè pas. Lou jour marcat per la batesta Lou rei deviè, d'un cop de testa, Faire signe à moussu soun fil
- 310. De laissà pas un soul fusil Dins la sala ounte la gusalha A sous despens fariè gogalha; E de dire à lous dau repas:
  - « Messius, aiço se manja pas ».

Nom de Minerve. (F.)

- 315. Cepandant, dins un port d'Itaca, La tartana de Telemaca Aviè rebalat lous presents Que li avien fach las bravas gents De la cour de Lacedemona.
- 320. Sa mera, qu'era touta bona,
  S'esfraiet de lou veire pas;
  Mais li anounceroun qu'era au mas,
  E lou pastre, en li ou venent dire,
  La veget un pauquet sourire;
- 325. Noun fagueroun sous galinets,
  Que, sans faire semblant de res,
  Toutes en troupe s'assembleroun.
  Anàs veire de que fagueroun.
  Aquel qu'aviè lou mai d'escuts,
- 330. Noumat Onufre Eurimacus,
  Se quilhet dessus una taula
  E prenguet antau la paraula:
   « Messius, anen, Dieu siè benit!
  Telemaca es pas mau punit
- Ben galhardet sus sa patraca;
  Fau faire au brave Antinous
  De coumpliments aqui dessus,
  Car.....» Eurimaca antau parlava
- 340. Dau tems qu'Antinoüs intrava,

E vous lou ralheroun, mas gents, Que n'en cuget virà lou sens. L'un li cridava: α Eh be, pirata, Quau menàs sus vostra fregata? »

- 345. L'autre li disiè: « Dieu vous gard! Ma fouè, capitani Jan Bart, Fau counveni qu'en tems de guerra Ses un bon mariniè sus terra, Sus la mar un brave pietoun,
- 350. E pertout un fier poulissoun. »
  Antinoüs, la testa bassa,
  .— « Metès-vous, s'ou dis, à ma plaça;
  Quauqu'us que poudriàs pas trouvà,
  Couma fariàs per lou tuà?
- 355. Sus mar ai mancat Telemaca,
  Mais lou manquen pas en Itaca.
  Un jour que sourtirà tout soul,
  Nous cau metre dins un restoul,
  E toutes, à grands cops de còdou,
- 360. Lou saludà dins aquel ròdou; Vous lou garantisse toundut, S'endevenen ben lou salut. » Antinoüs, fort de la lenga, S'escaufet tant dins soun arenga
- 365. Que, sans poude pus grangalà, Seguet oublijat de calà.

Amfinoma de Duliquia, Lou pus dous de la couteria, E belèu lou pus amourous,

- 370. Li diguet: « Coussi parlàs, vous?

  Lou bel counsel de contrabanda

  Que dounàs à touta la banda,'

  D'anà tuà lou fil d'un rei!

  Savès-ti que lou ciel vous vei
- 375. E que n'aima pas l'enjustiça?
  S'a coundamnat lou fil d'Ulissa
  A faire una tant paura mort,
  Chicanaren pas sus soun sort;
  Prendrian una pena inutila,
- 380. Mais en jougant à crous ou pila,
  Saupren be se voloun, amount,
  Que sieja assassinat ou noun....
  Anen.... la piastra es touta presta....
  S'agis pas de gratà la testa....
- 385. De que demandàs? Pila, ou crous?.....
  Anen, couardès pas, fouirous;
  Car anfin, dins aquel afaire,
  Fau veire ce qu'aven à faire. »
  Touta la troupa aplaudissiè
- 390. A ce qu'Amfinoma disiè, Quand Penelopa au bruch davala, E se presenta dins la sala;

Medoun li aviè dejà countat Tout ce qu'ailin s'era tratat.

- 395. La reina, emb una nobla audaça, Regarda Antinoüs en faça, E sus un toun ferme e rouial, Li dis: :— « Tigre, dògou, chival, Voulur, carravirat de Mende,
- 400. Qu'es aiço? moun fil es un lende?
  Per lou tuà dins lous restouls
  Ounte vas trià tous pesouls?
  Vai, moustre, n'auràs pas la pena;
  Car te vau crebà la bedena;
- 405. Atend, que trove moun coutel...
  Veja-lou tramblà, lou bourrel!
  A pòu per sa vielha carcassa;
  Mais, pioi qu'aimes tant la vidassa,
  Per que vos levà, feneant,
- 410. Aquela de moun paure enfant?.....

  Souven-te, quand, tus e toun paire,
  Fouitats per un michant afaire,
  E marquats à la flur de lis,
  Figiguès de votre païs.
- 415. Sans lou pera de Telemaca, Que vous rescoundet en Itaca, Eres be tournà carrejats Toutes dous per estre penjats:

Respond, escapat de la corda?.....

- Oui, Messius, aquel guilherit
  Era penjat sans moun marit,
  E per paga sa coumplasença
  D'una bela recounouissença,
- 425. Li vòu seduire sa mouliè,
  Et tuà l'enfant que n'aviè....
  Veja-la, la bestia faroucha....
  Me ten pas de res, cartatoucha,
  Bracounié, double galavard,
- 430. Que noun t'embounne lou paumard; Crei-me ieu, chanja de pensada; Car s'una fes m'as alassada, Soui femna... t'en dise pas mai... Prend garda à ce que farai... »
- 435. Eurimaca, embe gentilhessa,
  Tachet d'adouci la princessa.
  En disent que resounariè
  Ela e soun fil, tant que pourriè.
   « Ieu, s'ou dis, e lou paure Ulissa,
- Jujàs se soui pas soun ami!...
  Se lou sort fasiè qu'un couqui,
  En badinant, vous vioulessa,
  Ou que vostre fils assoumessa,

- 445. Vole be toumba rede mort,
  Si li disiei pas: « Avès tort ».....
  Me regardàs?... Cresès que rise?...
  Ou fariei, couma vous ou dise;
  Car, Dieu mercì, soui un ouvriè
- 450. Que crenisse pas moun pariè. »

  La reina, que s'era esfraiada,

  Se sentiguet fort soulajada;

  Regagnet soun apartement,

  Ounte plourava à tout moment,
- 455. Essetat quand era endourmida.

  Dejà la luna era espelida,

  Quand Eumea arrivet au mas:

  Es vrai qu'anava pichot pas.

  Trouvet lou rei dins l'equipage,
- 460. Ounte era davans soun message, E countet tout ce que saviè De la vila d'ounte veniè: Que la barca de Telemaca Era arrivada dins Itaca;
- A65. Que la reina e touta la cour Savien qu'el era de retour; Qu'Antinoüs fort en coulera Aviè ramenat sa galera; E qu'era mouquet, lou salop,
- 470. Per ça qu'aviè mancat soun cop.

Lou jouine prince emb un sourire,

— « Ou crese », se metet à dire;

« Mais metès la taula e soupen;

Una autra fes vous ausiren. »

475. Tant se bourreroun, tant fieuleroun '

Que toutes tres s'enchichourleroun s.

FIN DU SEIZIÈME LIVRE.

<sup>&</sup>lt;sup>4</sup> Burent. (F.) — <sup>2</sup> Se grisèrent. (F.)



### ODYSSÉE D'HOMÈRE

En vers burlesques patois.

#### SOMMAIRE DU DIX-SEPTIÈME LIVRE.

Télémaque part pour la Cour. - Débat entre la cuisinière du palais et lui, terminé par un soufflet de la main de Pénélope. — Caresses que fait cette Reine à son fils. — Sa dévotion.—Télémaque paraît en public.—Compliments qu'on lui fait. — Il remet en mains sûres les présents qu'il avait reçus à Lacédémone. — Repas de sorcier. — Délicatesse de Pénélope. — Elle demande des nouvelles d'Ulysse à son fils. -Réponse qui ne dit pas grand'chose.-Prophétie.-Bon appétit des prétendants. —Entretien d'Ulysse avec Eumée sur le chemin de la ville. —Rencontre qu'ils font à une fontaine.—Surprise d'Ulysse au bruit qu'il entend dans le château.—Il est reconnu par un vieux chien.—Il épie d'un des coins de la porte. — Télémaque l'introduit. — Le Roi fait la quête autour des tables. - Discours inquiétant d'Autinous à Eumée. — Élégante réponse. — Télémaque tâche d'apaiser la noise. — Brutalité d'Antinoüs. — Belle parole d'Ulysse. - Maladresse d'Antinoüs. - Modération du roi. - Chagrin de Télémaque. - Curiosité de Pénélope. -Éternument prophétique.—Ulysse refuse de voir la Reine. -Pénélope est surprise de ce refus. - Elle l'approuve. -Eumée donne des conseils et s'en va.



# ODISSEA D'OUMERA

LIBRE DES-E-SETIEME.

ntre que l'auba lusiguet, Telemaca s'endimerguet; Car vouliè, per fa soun intrada, Proufità de la matinada. Dis à soun varlet, per qu'içai: -« Vostre gusàs gagnarà mai, Sans doute, que dins la campagna; Venès-i, tantos, de coumpagna, Car se partissiàs lou matì, Mouririe de frech per cami.» 10.

5.

- « Oh! moussu, li diguet Ulissa, Ieu me save rendre justiça; Se sap qu'un prince couma vous Pot pas se cargà d'un rascous;
- Mais, ieu, mai que me laissoun faire,
  Me sauprai be tirà d'afaire;
  Car n'aven pas tant gusejat,
  Sans nous estre un pau routinat.
  Es sensat qu'una granda vila
- 20. Es en ressourças pus fertila
  Qu'un mas, ounte fau travalhà
  Quand on vòu pas que varalhà.
  Mai que quauqu'us me li counduiga,
  Me li tirarai prou d'entriga.
- 25. Boutàs; que li siejà una fes,
  E, se patisse, m'ou dirés.»
  Lous dous princes se saluderoun,
  E tout risent se separeroun.
  Telemaca, tant que marchet,
- 30. Penset pas qu'au noble proujet Que li aviè prepausat soun pera; L'aprouvava dins sa coulera; Mais d'abord que s'adoucissiè, Soun esquina li prusissiè.
- 35. Quand arrivet, sa cousinieira, Lourda, veilha, e fort garçounieira,

Lou vei que se grata e li dis:

— « Ai! Mestre, de que vous prusis?

Venes, intràs dins la cousina;

- 40. Ai croumpat una penche fina,
  D'un bel boui; vous n'en rasclarai
  E vous desempesoulirai. »
  Lou prince qu'aviè pou de pire,
   « Vejà aquela ? se met à dire;
- 45. Diriàs pas, à soun demenà,
  Qu'es facha per me penchinà?
  T'en gardarai be, ramouneta....»
  L'autra l'arrapet per la quoueta:
   « Oh! vous la derrabe, s'ou dis,
- 50. Ou fasès ce que l'on vous dis. »
  Lous cris que fasiè la salopa
  Derevelheroun Penelopa,
  Que dins un moument descendet
  E larjament la soufletet,
- 55. Sans s'enfourmà de la querela. La reine era, disoun, pus bela, Quand li pauset l'arpa dessus, Que noun es Junoun ou Venus. Prenguet soun fil das dos manetas,
- 60. E vous lou mountet d'esquineta Jusquas à soun apartament, Ounte l'embrasset longament,

En li disent: — « Moun cor, ma vida, Moun sòu, que me soul rejoulda,

- 65. Quand aiçaval t'ai entendut.

  Eh be, diga, sies dounc vengut,
  Per metre fin à ma tristessa?...

  Ma nieïra... fai-m'una caressa,
  Un poutou que dure toujours.
- 70. Mais nou... Conta-me, mas amours, Conta vite à ta paura mera, S'as aprés quicon de toun pera. »

  Telemaca, trop attendrit,

  Pouguet pas faire aquel recit.
- 75. Diguet soulament à sa maire :

   « Savès-ti de que deuriàs faire?
   Vous cau dire as dieus gramecis
   De m'avedre menat aicis ;

   Vostres briquets, que m'esperavoun,
- 80. Se m'avien trouvat, m'engrunavoun;
  E soui pus erous qu'un crebat
  Que lous traites m'ajoun mancat.»
  La reina vitament s'abilha,
  Carga sa rauba, sa mantilha,
- 85. Sas engajantas das bèus jours, Se met dins toutes sous atours, S'estifla, se pimpa, se farda; Vint fes au miral se regarda,

Afin de veire se soun er

90. Seriè dau goust de Jupiter.

Quand se seguet ben miralhada,
Ben tibada, ben rangourjada,
S'avansa en risent vers lou ciel,
Jusqu'au ped d'un pichot autel.

95. Aqui, la chasta Penelopa,
Au fringaire banut d'Europa
Proumetet un biou blanquinous,
Se li rendiè soun fil urous.

Entremens, per la laissà faire, 100. Lou prince abilhat en cassaire, Prend soun fusil, sona sous chis,

Aussa sas bralhas e sourtis Per se passejà sus la plaça.

D'abor, touta la poupulaça

E, sans res dire, l'entourà.

Aqueles qu'avien de manchetas
Broudadas, surtout en lenguetas,
En un mot lous pus aparents,

Sus soun retour de sa campagna; Li aget mema dins la coumpagna Quauques uns de sous enemis Que l'embrasseroun en amis.

- El lous escoutava pas gaire;
  Counouissiè trop ben, lou chaland!
  Quau l'aimava ou fasiè semblant.
  Alitersa, Mentor, Antifa,
- 120. Tres galhards qu'avien bona grifa, Eroun lous souls à quau fasiè Justament lou mai d'amitiè; Car, couma bons amis dau pera, S'en chautavoun pas de sa mera;
- E ploureroun de soun recit:
  Un matelot noumat Lapeira
  Li pourtet adounc la ratieira,
  Lou lard, e d'autras raretats
- 130. Dau cabinet de Menelàs:

   « Gardàs-m'ou, li diguet lou prince,
  Ai pòu que quauqu'us noun ou pince,
  S'ou fau pourta dins moun oustau.
  Au tieu save que trai pas mau.
- 135. Bouta, carga-t'en, mestre Pierre,
  Jusquas à ce qu'ou mande querre;
  E n'ou laissarai pas mousì,
  Se lou sort me fai rëussì. »
  Cepandant era fort en pena
- 140. Dau proufeta Teoclimena;

Embe lous iols, tant lou cerquet, Que, per bonur, lou devistet, E lou mena acos de sa mera, Per li fa faire bona chera;

- 145. Lou sourciè grec lavet sas mans, Ce qu'aviè pas fach de tres ans, E li servissoun sus la taula Una soupa de cagaraulas, Vint manouls de tripas de cat,
- Ouatre tartalassas boulidas,
  Nou rata-penadas roustidas,
  Un beu-l'oli mes en ragous,
  Dous astadets de parpalhous,
- Dous plats de lendes en purea,
  Un parel de nervis de biòu
  Lardats embe de crouvels d'iou,
  E tout aco, dins miecha-oureta,
- 160. Descendeguet dins sa tripeta;
  Tant aquel diable de gibiè
  Flatava lou goust dau sourciè.
  La reina, qu'era dalicada,
  De crenta d'estre empouisounada,
  165. Venguet pas qu'après lou repàs,
- 165. Venguet pas qu'après lou repàs, Amai se tapava lou nas.

Cridet à soun fil: — « Malapesta! Aquela sala put qu'empesta! Ben belèu, tus n'as pas tastat

- 170. Las drogas qu'an aici pourtat?
  Cavalisca! la sentou soula
  Vous vai jusquas dins la mesoula;
  Se, per malur, n'aviès manjat,
  Diga-m'ou, que seriès purgat
- 175. D'un sirop contra la vermina. »
  Telemaca, en fasent la mina:
   « Ai! Dieu m'en preserve, s'ou dis,
  Mais n'es pas lou cas, Dieu mercis. »
   « Tant mius, li repliquet sa mera;
- 180. Aça, parla-me de toun pera;
  Diga-me de qu'es devengut,
  E per que, sans el, sies vengut;
  Te responde que soun absença
  M'es una ruda penitença. »
- 185. Soun fil li dis: « Ai vist Nestor;
  Mais sap pas se moun pera es mort;
  Me prestet una redingota,
  Soun fil, amai sa bourriscota,
  Per veire, aco de Menelàs,
- 190. Se, per asard, ou sauprien pas.
  Aquì, trouvere la vilena,
  La grossa couquina d'Elena

Qu'es la causa dau patiment Ounte ses tant enjustament.

- 195. »Soun ome qu'aviè pena à creire
  Lous trafis qu'aici vous fan veire,
  A prepaus de vous me countet
  Que vostre ome era un grand sujet:
  «Un jour, per una aiga boulida,
- »Pas pus que d'un cop de bastou;
  »Ce que li faguet força ounou;
  »Mais, sans lou viel pastre Protea,
  - »Pera de la nimfa Idoutea,
- »Granda engraufignaira de nas,
  »Que me countet ce que veiràs,
  »N'auriei pas grand causa à te dire;
  »Mais escouta-me, se vos rire.
- »Lou sourciè me diguet d'abor 210. »Que moun paire n'era pas mort, »Que dins una ilota prou bela, »Una jouve sempiternela, »Noumada senta Calipso,
  - »Noumada senta Calipso, »Lou frisava à la rampono,
- »Li sautava au col, lou roussava,
  »A força que lou caressava;
  »Tandis qu'el, pus frech qu'un cairou,
  »Li disiè: « Nimfa... anen... n'i'a prou...

»Tiràs-vous enlai, garçounieira...

220. »Ai, mardì, que ses familieira!...

»Fi, laissàs-me faire un batèu,

»Afin que vous quite au pus lèu. »

»Vejaquì tout ce qu'aprenguere

Das nouvelas que demandere.

225. »Quand Menelàs m'aget countat
Ce qu'aquì vous ai repetat,
Que m'aget levat de ma pena
E fach una prou bona estrena,
Li diguere: — « Aça, gramecìs,

- 230. N'ai pas pus res à faire aicls »;
  Partiguere embe Pisistrata,
  Per ana jougne ma fregata
  E quitere proche lou port,
  Lou fil e l'ase de Nestor. »
- 235. Penelopa seguet ravida
  De saupre qu'Ulissa era en vida,
  E que, lion de la calignà,
  Calipso lou fasie fougnà.
  Mais lou savant Teoclimena
- Que, quand aviè la pansa plena,
  Couma adounc, Dieu mercis, l'aviè,
  Era un proun abille sourciè:
   « Vous farai be, s'ou dis, m'ai rire,
  S'escoutàs ce que vous vau dire.

- Jamai noun posque venì viel,
  Jamai noun intre dins lou ciel,
  Se mous discours soun de babiolas!
  M'en vau jougà trenta pistolas
  A quau que siè contre un escut
- 250. Qu'Ulissa es dejà revengut
  E que prepara sa buscalha,
  Per ensucà la cassibralha
  Que lou conta encara ben lion,
  Car vous cau saupre qu'un estron
- 255. Toumbet quand venian en Itaca
  Sus lou mourre de Telemaca;
  Pruva que soun pera es aicì,
  Car vostre fil..... demandàs-i
  Couma li ai dich qu'acò s'esplica.»
- 260. « Oh! vostra pruva es sans replica, Li dis la reina en se levant, Ses un poulissoun fort savant; N'es pas que la pou d'ou pas veire Qu'ara m'empacha de vous creire. »
- Cepandant Ulissa veniè;
  Soun pastre que lou counduisiè:
  « Paure ome, li disiè, pecaire!
  Soui ben aise de vous coumplaire;
  Mais auriè mai vougut, elas!
- 270. Qu'agesses demourat au mas,

Ounte la vida es pus tranquilla, Que de roudà dins una vila. Soui segu que li trouvarés Ce tustaus, mai que n'en voudrés;

- 275. Mais Telemaca n'es pas tendre
  E pioi qu'ou vòu, nous li cau rendre.»
  Ulissa era mai qu'encantat
  De veire la doucilitat
  D'ou doumestica d'aquel age,
- 280. Ce que n'es pas gaire d'usage;
  S'apuiava sus soun tricot
  E marchava sans dire mot.
  Toumbant, levant, s'agandigueroun
  Emb una font, ounte begueroun;
- 285. Era à l'intrada dau faubourg;
  Li aviè cinq oumes à l'entour
  E dos capelas dediadas
  A dos venerablas Naiadas.
  A pena s'eroun assetats,
- 290. Qu'emb un ourchou dejout lou bras Vegeroun veni Melantea; Lou gus, qu'aimava pas Eumea. Vous li agairet soun coumpagnoun Que preniè per un poulissoun.
- 295. Lou rei, contra aquel doumestica Que sera vendut à la clica,

Per prudença faguet pas res.

— « Deessas d'aiga, es-ti permés, Diguet Eumea as dos Naiadas,

Qu'à la font ounte ses loujadas, Un couqui venga sans perpau Ensultà de gents couma cau? Ah! juste ciel! ounte es Ulissa, Per nous rendre bona justiça?

305. Aima tant l'ouspitalitat,
Que veirian lou traite penjat,
Ensin souet-il... Hòu Melantea,
Anen pregà Dieu couma Eumea,
Qu'ajan un jour aquel ounou.... »

Ah! certa, aqui n'i'aget be prou.

Aqui dessus l'acarriastre

Toumbet sus la pelha dau pastre
E, pecaire! l'enclausiguet
De tant de mau que li diguet.

315. Recounouissiè pas Melantea, Lou rouial coumpagnoun d'Eumea; Mais Ulissa disiè tout plan:

— « Vai, gus, laissa veni deman.»
Anfin, dau palai s'aproucheroun,

320. E tout de suita entendegueroun Lou bruch d'un grand charivari.

- « Holà! de qu'es aco d'aquì?

Dis lou rei, quinte tintamarra! »
— « Douçament, n'intren pas encara,

- 325. Pourrian estre lou mau venguts,
  Dis lou pastre; nostres gouluts
  Soun en trin, couma poudès creire.....
  Arrestas-vous... laissàs-me veire
  Se moussu Telemaca i'és,
- 330. E, se se li trova, intrarés;
  Car couma lou traites lou flatoun,
  Empacharà que vous mautratoun. »
  Sus aco, cauta-cauta intret,
  Trouvet lou prince e s'en sarret,
- 335. Per veire se, dins lou bourlisse,
  Auriè besoun de soun service.
  Entremens Ulissa risiè
  D'un chi que lou recounouissiè;
  Era vielhàs, lou paure diable!
- 340. E dins un estat pitouiable;
  Auriè vougut lou caressa
  E toumbava en voulent s'aussà.
  Lou rei tiret un grand augura
  D'aquela toucanta avantura
- 345. E coumencet de s'aproucha
  Ras de la porte e d'espinchà.
  Telemaca lou veget faire:
   « Ai, vesin, li cridet, pecaire!

Intràs; de que fasès alai?
350. N'ajàs pas pòu, venès aiçai;
Li manjarés una crousteta
E vous farai beure truqueta. 
De fet, lou faguet assetà,
Manjà la soupa e ben pintà,

355. Sans que degus dins l'assemblada Li bailessa la mendra arpada. Quand lou repàs seguet finit, Ulissa, qu'era plen d'esprit, Aget la pensada rouiala

360. De fa la queta dins la sala,
Noun pas per levà grands escuts,
Mais per counouisse lous gouluts.
Aquestes lou counsideravoun,
E l'un l'autre se demandavoun:

365. « Quau diantre, dins aqueste oustau, Nous a menat aquel pelaut?.... » « Ou save be, dis Melantea, Es nostre ivrougnassa d'Eumea; Lous ai vist qu'à pena era jour

370. Ensemble à la font dau faubourg. »
Pus coufie que lou rei de trefle,
Sus lou recit d'aquel manefle,
Antinoüs, d'un toun de bau,
Au maseliè parlet antau:

375. « Savès-ti, moun reverend pera, Que soui pas sourtit de galera, Per soufrì que d'autres couquis S'establigoun dins lou païs; E que, d'avedre l'insoulença

- 380. De n'en multiplià l'engença,
  L'on coumés un certen pecat
  Que s'apela un crima d'Estat?
  Tournàs-li, se ses las de vieure,
  Veirés. »... « Anàs-vous faire escrieure,
- 385. Diguet Eumea aqui dessus
  Au senatur Antinoüs.
  Que se prusiga qu'a la rougna. »
   « A quau parla aquel gros ivrougna?
  Aprenès, noble poulissoun,
- 390. Que vous noun ses qu'un fanfaroun, E que tout ome que demanda, Couma es Jupiter que lou manda, Lou cau reçaupre embe respec. Mais vous entendès pas lou grec;
- 395. N'importa; mai que Telemaca E la brava reina d'Itaca Aprouvoun ce qu'ai fach aqui, Que me fai l'avis d'un couqui?» Antinoüs, la pata presta,
- 400. Li anava jougà de soun resta;

Mais Telemaca lou butet, Groundet Eumea e li diguet: — « Aprenès, moussu lou piniastre, Qu'Antinoüs es mai qu'un pastre;

- 405. E que, per estre ben tratat,
  Fau pas dire la veritat
  A de gents que soun mai que vautres.
  Vesian be, sans vous, entre nautres,
  Per que lou sobre Antinoüs
- Antau desira que s'en ane;

  Vesès aquel founs de bountat....

  Cepandant l'ouspitalitat
- A15. N'a jamai ruïnat persouna....
  Si fai be la paura redouna,
  Insaciable galavard;....
  Mais, bouta, prend vite ta part,
  Dona l'estrena à la chambrieira.»
- 420. Antinoüs, embe mespris,
  A Telemaca repartis:
   « Malgrè que me fagàs escorna
  Se chacun fai la mema aumorna,
  Que vau faire à vostre estafiè,
- 425. Quitarà segu lou mestiè. »
  En fasent antau l'agreable

A nostre paure miserable, Antinoüs, dins sa foulie, Rebilhet un gros candelie;

- 430. Mais, l'ivrougna! lou peca-lebre!!
  Lou vin li dounava la febre;
  Car li tirava drech au nas
  E l'anet toucà sus lou bras.
  Ulissa, en fasent la grimaça,
- 435. Sans se boulegà de la plaça,
  Li faguet sinne embe lou poung:
  « Ah, s'ou dis, bastard dau demoun,
  Porc farcit, double fil de puta,
  Me vendriès pas cercà disputa,
- A40. Se te vesiès pas soustengut

  De tant de canalha!... mais chut...

  Seràs erous, s'una furia

  Quauque jour, noun te devarilha,

  Per t'aprene, vilen brutau,
- 445. A tratà lous paures antau.

  La bela, la nobla besougna!...

  E pioi, palot, n'as pas vergougna
  D'endevenì pas que lou bras,
  Dins lou tems que tires au nas?
- 450. De que t'aviei fach, gros belitre?»

<sup>1</sup> Maladroit. (F.)

Toutes aprouveroun lou titre, Essetat lou prince sans biai, Que sousteniè qu'era pas vrai. — « Un paure, disien d'aquel age,

- 455. Merita que l'on lou mainage;
  E quau sap s'aquel estrangè
  N'es pas quauque dieu passagè?
  N'aven vist, amai d'impourtança,
  Que fan antau soun tour de França;
- 460. S'aquel n'es un'Antinoüs
  Serà, pardine, ben camus!»
  Telemaca, dins sa coulera,
  Auriè vougut venjà soun pera
  E se seriè pas retengut,
- 465. Se lou tems era istat vengut.

  Penelopa atabé fachada
  (Car aviè l'ama ben plaçada)
  Qu'Ulissa que counouissiè pas
  Agessa un tau cop sus lou bras,
- 470. Soufletet dos fes Melantea

  E faguet sinne au brave Eumea

  De faire mountà finament

  Lou paure à soun apartament.

   « A roullat, s'ou dis, lou coumpaire
- 475. E sans miracle se pot faire Qu'el e moun ome se soun vist

Perqu'inlai dins quauque païs. L'on lou counoui pas; mais ieu crese, As manieretas que li vese,

- 480. Qu'adoucirà lous pensaments

  Ounte soui despioi tant de tems. »

   « Osca, li respoundet Eumea,

  Car.... demandàs à la Ramea,

  Quinte un que n'es aquel ouvriè.
- 485. Ela dejà l'acoutissiè,

  De tant drolle que lou trouvava;

  E pourtant ma femna es ben brava;

  Jujàs se vous lou goustarés,

  Quand una fes lou tastarés!
- 490. Dis qu'a sajut de nostre mestre Que languissie fort de çai estre; E qu'en Itaca l'aurian leu, Se !i prestavoun un vaisseu. » Penelopa, sans pus atendre,
- 495. Sus lou champ lou vouguet entendre, E coumençava de mountà, Quand ausiguet esternudà Soun cher fil, moussu Telemaca, Sinne qu'aquel paure en Itaca,
- 500. Era vengut ben a prepau Remettre la pes dins l'oustau. D'aquel tems, era fort l'usage

Que tout se virava en presage, Pet, tous, badal, rot, estournut,

505. Tant l'ancien mounde era letrut!

— «Rede, moun fil;.... Dieu te benissa,
Li crida la femna d'Ulissa;
Courage.... lou ciel t'entendrà

Courage.... lou ciel t'entendra E belèu toun pera vendrà.

510. Ah, grands dieus! que seriei countenta Se, d'aquela clica insoulenta, El e tus, à cops de tricots,

Vous vesiei coupà lous gigots!

D'un pau mai la soula pensada,

515. D'aquela chera estiblassada,

Me fariè dansà de plesì.

Bons dieus! vous pregue de m'ausi.

Coumtàs sus de bravas estrenas,

Se finissès antau mas penas,

520. Ce que de noun, quand crebariàs,

Un diniè de ieu noun auriàs;

Car ses fachs per rendre justiça.»

Eumea era anat querre Ulissa;

Mais lou mounarca li diguet :

525. — « Plan, camarada, si vous plet.

Anen pas gastà la besougna, En fasent de passes d'ivrougna;

Aquel bras encara me dou,

E lou resta trambla de pou.

- 930. Amai la reina dega creire
  Que languisse fort de la veire,
  Li poudès dire, de ma part,
  D'esperà que sieja pus tard,
  E que n'aurà pas ma visita
- Ouand saget las resouns qu'aviè,

   « Ah! malapesta, quinte ouvriè!

  Diguet Penelopa encantada;

  A sa counduita rafinada,
- 540. Se counoui qu'es un grand esprit, Anàs, Eumea, aco sufit; Amai me tarde de l'entendre, Vese qu'es pus sage d'atendre; Tant que voudrà l'esperarai,
- 545. E, que que me diga, ou creirai.»

  Avans de gagnà sa barraca,

  Eumea, au jouine Telemaca,

  Vouguet anà dire adessiàs.

  Lou prince li diguet tout bas:
- 550. « Prenès-me deman dins las cledas
  Quatre moutous, autant de fedas
  E mieja douchena d'agnels:
  Vole pregà lous immourtels
  Que nous sauvoun de tout desastre.»

555. — « Si, farai, li diguet lou pastre;
La pòu vous a rendut devot.....
Anen, mardine, ses pas sot;
Li a pas ren couma la pregalha;
Mais gardàs-vous de la gusalha

- 560. Que s'engraissa dins vostre oustau, Savès be que vous voloun mau; Vous tuarien, malgrè l'oufranda. Ieu vous conserve fossa vianda, Mais, se, per malur, mourissiàs,
- Vese pourtant à sas aluras
  Qu'en prenent ben vostras mesuras,
  N'acabaran pas lou fricot.
  Dieu benisca vostre tricot!»
- 570. Es antau, qu'en varlet fidela,
  Marcava l'ardou de soun zela
  A sous mestres qu'eroun ravits
  De la bountat de soun avis.
  N'in dounet un parel de mila,
- 575. E partiguet tard de la vila, Car revenien de l'esperau, Quand arrivet à soun oustau.

FIN DU DIX-SEPTIÈME LIVRE.

	•	
,		



### ODYSSÉE D'HOMÈRE

En vers burlesques patois.

#### SOMMAIRE DU DIX-HUITIÈME LIVRE.

Irus insulte Ulysse. — Défi, combat, victoire, récompense, générosité d'Amphinome. — Admirable discours d'Ulysse. — Amphinome en est touché. — Pénélope descend dans la salle. — Impertinences de sa femme de chambre. — Réponse de la reine. — Elle est enchantée de sa propre beauté. — Les prétendants le sont presque autant qu'elle. — Discours qu'elle tient à son fils — Réponse généreuse de Télémaque. — Louanges données à la reine par Eurimaque. — Mignardise de Pénélope. — Reproches qu'elle fait aux prétendants. — Présents qu'elle en reçoit. — Désordres au rez-de-chaussée. — Ton imposant et majestueux d'Ulysse. — Sa curiosité — Eurimaque veut le frapper et le manque. — Télémaque fait le mutin. — Amphinome l'approuve en se moquant de lui.



-			
	•		
	•		



## ODISSEA D'OUMERA

#### LIBRE DES-E-IOCHIEME.

epandant un certen Arnea

Que, se l'on crei la renoumea,

Fasiè lou mestiè nobla e bel

Que Mercura fai dins lou ciel,

Pressat un pau de la famina,

Venguet faire un tour per cousina.

A la cour s'apelava Irus;

Era pas mau bastit, lou gus,

Mais una fiera flaca lama;

10. Car disoun, qu'en perdent soun ama,

S'era talament abourit Que soun cors era miech pourrit. Aviè pourtant la dent cruela E fasiè fort ben sentinela, 15. Quand lou metien autour das plats Que se levavoun d'un repàs. N'aget pas pus lèu vist Ulissa Que, d'abor, lou prenguet en tissa. - « Ai, vielha estampa de pendut, 20. D'ount diable, s'ou dis, sies vengut? Quau t'a dich de pourtà ta mina Jusqua dins aquesta cousina? Anen, defora, pelharot.... N'esperes pas, qu'emb un bilhot 25. Te vengue espoussà la figura.» Ulissa, sus aquela injura, Lou regardet tranquillament. - « Vous parlàs tant civillament, Que, certa! i a pas res à dire. 30. Me demandàs ce que çai fau? Ou vesès: m'estouroulhe un pau, Entremens que levoun la napa.

Couma vous espere l'estapa; E la manjarian de mitat, 35. S'era de vostra voulountat;

Mais m'invitàs de cops de bilha...

Savès-ti, brave briscambilha, Que counouissen aquel outis? E que, s'es d'aco que s'agis,

- 40. Pourrian be veire ara memeta,
  Quau mena milhou l'espousseta?
  Vous pareissès jouine e bregous;
  Ieu soui viel amai roundinous;
  E, se venian à l'arrambage,
- 45. Pourrian ben oublidà nostre age. »
   « S'era pas que me fas pietat,
  Repliquet Irus irritat;
  Maudich charnègou, viel piniastre,
  Te regalariei d'un emplastre,
- 50. Que te farie toumbà las dents...»
  Antau n'eroun as coumpliments,
  E la querela s'escaufava;
  Quand Antinoüs qu'escoutava,
  Lioga de venì l'apaisà,
- S'aviset de lous empusà;
  Preniè lou rei per un Jan Fessa,
  E cresiè qu'Irus l'engrunessa.
   a Ai! venès veire qu'aco's bel!
  Messius, s'ou dis, es un duel
- 60. Entre Irus e lou viel Roudriga A quau vene de fa coutiga; Se ses toutes de moun avis,

Counselhe que dounen un pris Emb aquel que, dins la batesta,

- 65. A l'autre esclaparà la testa.

  Lou counsel seguet aprouvat
  E, quan tout seguet assemblat,
   «Ieu vole ben, diguet Ulissa,
  Emb Irus, intrà dins la liça.
- 70. Amai siè jouine e ieu ben viel,
  Refusarai pas lou cartel;
  Mais, s'arriva que vous lou pele,
  Au mens, que degus noun s'en mele!»
  Toutes jureroun à la fes
- 75. Que se melarien pas de res.

  Lou mounarca era dejà preste

  E, per se rendre un pau pus leste,

  Aviè mes guenilhas à bas;

  Faguet veire un parel de bras
- 80. Garrut couma aqueles d'Ercula.
  Irus lou regarda e recula.
  Mais noun pas per milhou sautà;
  Car sounjava de desertà.

Lous assistants que s'en douteroun

85. Talament que l'encouragerounQu'Irus fieramen revenguet,E, sus sous ergot se tenguet.Ulissa, quoueque coumprenguessa

Qu'un champioun d'aquela espeça 90. Seriè couat facillament, S'imaginet fort sajament

Que faliè pas rendre tragica Una batesta tant coumica.

De pou que noun lous assistants

- 95. Piquessoun un pau trop das mans, Sarret pas à mija la pougna, E li bailet pas qu'una mougna Que li endavalet tout escas! Las ussas, las dents, e lou nas.
- 100. Se vesiè be que l'espargnava; Cepandant lou sang regoulava, De façoun que lou paure Irus Cresiè de n'avedre pas pus. Ulissa rintret dins la sala;
- Toutes, d'una voues generala,
  Counvengueron qu'aviè gagnat
  Noblament lou pris dau coumbat.
  Tout de suita li lou douneroun,
  C'et-à-dire lou regaleroun
- 110. De la mouleda d'un pan long, Saussada dins d'aiga de font. Pretendoun pourtant qu'Amfinome,

<sup>1</sup> Tant seulement. (F.)

Que dins lou foun era un bon ome, De rescoundous lou counfourtet

- 115. D'una lampada de rapet:

   « Tenès, s'ou dis, bon prou vo
  - « Tenès, s'ou dis, bon prou vous fassa,
    E lou ciel vous faga la graça
    De reçaupre pas de degus
    Ce qu'avès fach au paure Irus! »
- 120. Ulissa, qu'aviè l'ama granda,
  Auriè vougut que, de la banda,
  Aquel se seguesse escartat;
  Mais Pallàs, que l'aviè coumtat,
  Demandava que periguessa.
- 125. Lou prince, afin que fugiguessa, Li ausava pas dire « Anàs-vou'n ». Mais enfilet un bel sermoun, Ounte intrava una parabola Qu'ou fasiè sentì per bricola.
- 130. Aquel discour era flurit.

  Li aviè tout plen de tours d'esprit,
  Una mourala magnifica,
  Una tournura patetica.

  Ieu de crenta de lou gastà,
- 135. Me soui sounjat de lou sautà; Mais legissès-lou dins Omera, Veirés la fina pieça qu'era. Amfinome n'era encantat.

Segnur Dieu! qu'aco's ben prechat!

140. Disiè tout bas au founs de l'ama;

N'en faguet pas mai soun proufit,

Sinne qu'era ben endurcit.

Ah! l'avugle! quinte daumage!

Mais, adounc, era fort l'usage

- 145. Que l'on aprouvava un discours, E que l'on pecava toujour. Aquì dessus nostra metoda Es encara à la vielha moda. Save pas per que disoun tant
- 150. Que lou mounde es un incoustant.

  La reina, qu'era desoulada,

  E que viviè fort retirada,

  Aviè quasì perdut lou tic

  De se faire veire en public;
- Era dejà d'un certen age;
  E, ma fouè, quand l'on es antau,
  Es prudent de gardà l'oustau.
  Ce qu'à vint ans eroun de graças,
- Vint ans après soun de grimaças.
  Aquel jour pourtant se moustret
  Pas mens de tres fes, si vous plet;
  Mais seguet pas per fa la bela,
  Car sa mina era naturela:

- 165. Noun n'aviè ni fard, ni poumpoum; Crenissiè que sous rodomounts Noun espoussessoun la casaca Dau noble enfant Don Telemaca, E davalet per prevenì
- 170. Un mau que sentissiè venì. Sa filha de cambra, Eurinoma, Que rima ben emb Amfinoma, - Es daumage qu'aquel d'aqui N'aja pas res à faire aici —
- 175. Eurinoma dounc, familieira Couma es touta vielha chambrieira, Li dis en frounzissent lou nas: - « Cavalisca! de que semblàs? Crese que ses venguda fola...
- 180. Voudriei pas, per una pistola, Estre davalada aiçalin, Couma vous, emb un casaquin, Amai li a pas gis de fringaires!... Coumtàs que vostres calignaires
- 185. Seran malament encantats De se veire antau ragoustats. Li moustràs un galhard coursage E dins un poulit equipage!... Tout aquel bagnolet pourrit,
- 190. Avès lou mourre ben cabit!

E de peusses an bona graça Antau frisats en nis d'agassa! Se veniàs per li fa fraiou, Poudiàs pas vous metre milhou;

- 195. Mais se vostre dessen, Madama, Era de li chatoulhà l'ama, Per counservà vostre manit, Crese fort que n'aurés mentit, Car ni lou dou, ni la tristessa
- 200. Agradoun pas à la jouinessa.
  Cresès-me, venès vous fardà;
  Proumetès de vous maridà;
  Fasès un pau la familieira.
  Vous responde, fouè de chambrieira,
- 205. Que lous princes que charmarés,
  Couparan à ce que voudrés. »
   « Ai, vesès aquela salopa!
  Diguet la chasta Penelopa,
  Quintes counsels me dona aquis!

Quintes counsels me dona aquis!

Ieu me fardà per de couquis?...

Autras fes, me requinquilhave,

Par ça qu'à moun marit qu'aimave,

Acò poudiè faire plasé;

Mais ara n'ai pas lou lesé!;

<sup>1</sup> Loisir, (F.)

- Tala besougna per li plaire,
  Surtout aqueles estafiès.
  Cavalisca! que soun groussiès!
  Mais te fau dire en counfidença
- 220. Que voudriei faire counouissença Emb aquel venerable gus Qu'a tant ben penchinat Irus; Ai tant enveja de l'entendre Que monte per tournà descendre.»
- 225. Penelopa adounc remountet, E dau langui s'endourmiguet Sus un poulit sofa de tela. Minerva la rendet tant bela Que Venus, en coumparesoun,
- 230. Era un espeça de soulhoun.
  Sous regards vous escalugavoun,
  De tant de flamas que dardavoun,
  Era pus blanca que la nèu;
  Jujàs s'aco n'era pas bèu.
- 235. Sa filha de cambra esrounada
  Devignet que l'avien fadada;
  E la reina, quand se veget,
   « Ai! moun cher ome, s'ou diguet,
  Ounte sies ara per me veire!...
- 240. Oh! certa, aco se pot pas creire!...

Que soui poulida! qu'ai l'er fin! Me fau be descendre aiçalin! Quand noun seriè que per fa mostra Das tresors de la bèutat nostra.»

- 245. Lorsque, dins la sala arrivet,
  De surpresa chacun badet,
  Sans ausà boulegà la lenga.
  Das iols li fagueroun l'arenga:
  Ma grand disiè qu'en fet d'amours,
- 250 Dins lous iols soun lous bèus discours.

  Pus brilhanta que gis d'estelas,

  Faguet petilhà sas prunelas;

  S'avanset vers moussu soun fil,

  E li cerquet antau garguil:
- 255. « Digàs, couard? ses-ti d'un age A marcà proun pau de courage, Jusqu'à soufrì que tratoun mau Un estrangè dins vostre oustau? Moustraviàs, dins vostra jouinessa,
- Quauques sentiments de noublessa;
  Mais ara aco s'es avalit...
  Lou chanjament es fort poulit!...
  Certa! ses un valhant Turena!...
  Es sans doute la chasta Elena
- 265. Que vous a dressat bonament A soufri tout impunament?

N'a dounat, aquela gusassa, De leçouns à touta sa raça; Mais vous, que ses d'un autre sang,

- 270. Faliè-ti n'en proufità tant?»

  Mouquet jusquas au founs de l'ama,
  Telemaca li dis: « Madama,
  Lou paure, de quau me parlàs,
  D'un bel cop de poung sus lou nas,
- 275. A bravament mes en coumpota
  Lou visage de la pagnota
  Que l'atacava injustament:
  Per ieu vous dirai netament
  Que, quand s'agis de fa tapage,
- 280. Counsulte pas jamai moun age,
  Mais lou noumbre das ennemis.
  Quand soun fossa, passe tout lis,
  Couma s'aviei quicon à faire;
  S'arrivoun que siejoun pas gaire
- 285. E qu'on lous poga tapinà,
  Sans qu'eles pogoun reguinnà,
  Adounc soui malin couma un diable.
  Atendès qu'un tems favourable
  Nous jougne quinze contra dous,
- 290. E veirés se sen vergougnous!»

  Aqui dessus don Eurimaca

  Interoump lou prince d'Itaca,

E vous decocha finament A la reina' soun coumpliment.

- 295. « M'estoune pas, s'ou dis, Madama, Se vostra bèutat nous enflama; Un mouribound que la veiriè N'en prendriè fioc e gaririè. N'ai pas vist, dins touta l'Europa,
- 300. Res qu'aproche de Penelopa,
  Per ce qu'es, au mens de bèutat;
  Es vrai que li soui pas estat;.....
  Mais, mardiena, avès bona mina!»
  Penelopa, en fasent la fina,
- 305. Li respond: « Prince, vous moucàs; D'ounte tirariè tant d'apàs
  - Una femna que toujour ploura?
     Quand ere jouina, à la bona oura;
     Adounc poudian dounà d'amour;
- 310. Mais ara soui sus lou retour; E, Dieu mercì, pas proun talossa, Per vous prene en segounda noça: D'alhurs, save e vese fort ben Que n'en voulès pas qu'à moun ben.
- Per trioumfà d'una mestressa!
  Fi dounc! De galants ben aprés
  Donoun tout e prenoun pas res.»

Antinoüs, sus soun lengage,

320. Diguet: — « Es lassa dau veusage;
Anen, Messius, es ara tems
De li faire quauques presents;
E vite, d'aco que s'en parle! »
Un page noumat mestre Carle

- 325. Li anet d'abor querre lou sieu.
  Seguet una rauba d'estieu,
  D'una superba coutounina;
  La bourdura era de flausina,
  E se sarrava per davans
- 330. Embe douge agrafas d'estam.

  Lou present dau riche Eurimaca,
  Grand fermiè de l'illa d'Itaca,
  Era un bel couliè de jalhet,
  Fach en façoun de chapelet.
- Per faire de pendents d'aurelhas,
  E, dins un cofret de chagrin,
  Dos douchenas d'anels de crin.
  Ni per aquela! mos d'Ulissa
- Prenguet aco dins soun vantau,
  E mountet sans dire: « m'en vau ».
  Lous princes aiçaval resteroun
  E, per se counsoulà, danseroun

345. La bourea e lou rigaudoun,
Embe l'auboi de Femioun.
La nioch venguet; quatre dounzelas
Aneroun cercà de candelas,
Mais Ulissa li las prenguet

- 350. E civillament las tenguet.

  Melanto, qu'era una mutina
  (Amai disoun que la couquina
  Era amiga d'Eurimacus),
  Se fachet fort aquì dessus:
- 355. « Vesès, s'ou dis, aquel ivrougna,
  Que nous ven aici cercà rougna!
  Cavalisca! dessus sous pas
  L'on trova pas qu'aquel gusàs.
  Bel ournament per una sala
- 360. Qu'aquela figura infernala!
  Cepandant crei d'estre quauqu'us,
  A causa qu'a fretat Irus.
  Vai, m'ou pagaràs, viel roudaire,
  E comta que n'i a pas per gaire.»
- 365. Ulissa, dessus sous rougnouns, Fierament apuet sous poungs.

  E menacet fort l'insoulenta
  D'ana contra ela pourta plenta
  Au coumissari de quartiè.
- 370. «T'aprendrai, s'ou dis, toun mestiè...

Es ben à tus, madoumaisela, A veni tene la candela, Per veire dansà de bandits! N'auriès pas paregut aicis,

- 375. E me fariès pas tant la fougna,
  S'aviès pas pissat la vergougna....».
  Parlava d'un toun majourau,
  Couma un mestre dins soun oustau,
  Talament qu'aquela salopa
- 380. Anet rejougne Penelopa,
  Embe las autras vilaniès,
  Que valien pas quatre diniès.
  Après aquela reprimanda,
  Noblament à touta la banda,
- 385. Lou grand Ulissa faguet lum; Lous esaminet un per un, E Pallàs li fasiè la graça Que li'escupissien sus la faça, Des que vouliè s'en avansa,
- 390. Afin de lou ben courouçà.

  Eurimaca, sus la paurieira,
  N'en diguet una ben groussieira.
  L'acuset d'estre un peresous.
  - « N'ou seriei pas tant couma vous,
- 395. Se surveniè quauqua batesta,Dis Ulissa, en branlant la testa,

Es vrai que ses pus diligent
A faire varalhà la dent,
A ben aroundi vostra pansa;
400. Amai ses pus fort à la dansa;
Ieu n'ai pas tant de bèu talant,
Mais parlen pas de feneants;
Car amai grugés ben lou mounde,
Vese pas qu'aco vous mourfounde.»

405. Eurimaca, tout en furou,
Per responsa au rouial grigou,
Rebilhet un cop de cadieira
Que, per bonur, seguet tardieira,
E, couma Ulissa se baisset,

410. Antinoüs la recasset.

Après aquela susselega,
Toutes dous li cercavoun brega;
Mais soun fil se mes au mitan,
E li dis en lous escartant:

415. — « Es quicon de ben esfrouiable Qu'à ma barba aquel paure diable Sieja tourmentat nioch e jour, Per estre vengut dins ma cour!.... Laissàs-lou dins soun pequinage?,

420. E cresès-me, trevas d'outrage;

<sup>1</sup> Chatouille. (F.) — 2 Misère. (F.)

Car vous sourtisse de l'oustau, Se nous laissàs pas de repau.» Amfinoma se met à rire; Mais, pourtant, seguet de soun dire.

- 425. « Es vrai, messius, ses d'insoulents De mautratà las pauras gents; Desounouràs vostra noblessa Per una parelha bassessa; E surtout espargnàs aquel,
- 430. Pioi que lou prince fai per el.»

  Aquì dessus toutes caleroun;

  A la santat das dieus begueroun,

  E douçament, sans se fachà,

  Avans jour s'aneroun couchà.

FIN DU DIX-HUITIÈME LIVRE.





### ODYSSÉE D'HOMÈRE

En vers burlesques patois.

#### SOMMAIRE DU DIX-NEUVIÈME LIVRE.

Ulysse fait disparaître les armes qui étaient dans la salle. —
Pénélope le voit et veut apprendre son histoire. — Ulysse
en invente une. — La femme le soupçonne d'être son
époux. — La nourrice du roi le reconnaît à une marque
non équivoque. — Songe de la reine expliqué par Ulysse.
— Dessein de Pénélope pour éluder le choix d'un époux.
— Prophétie d'Ulysse. — Politesse de Pénélope. — Elle
passe mieux la nuit que son époux.



	•	
	<b>,</b>	



# ODISSEA D'OUMERA

LIBRE DES-E-NOVIEME.

lissa aviè l'estoumac coufle
D'estre tratat couma un maroufle,
E languissiè de se venjà;
Mais davans vouliè fa renjà
Las armas qu'eroun dins la sala,
Afin que la troupa brutala,
Qu'era dispausat à punì,
Trouvessa pas à lou pounì.

5.

Per lou countentament d'Ulissa,

- 10. Lou prince dis à sa nourriça (Car li aviè pas gis de varlets): Prenès aqueles pistoulets, Sabres, fusils e gibecieira, E pourtàs-lous à la palieira;
- 15. Amount se pourtaran milhou
  Qu'aiçaval dins aquel cantou.
  La nourriça seguet charmada;
  E s'era dejà rebaussada
  Per faire ce que li disien;
- 20. Mais coussi sous mestres risien
  D'entendre aquela vielha gralha 
  Qu'en toumbant embe la ferralha,
  Maudissiè sabres e fusil,
  Lous pistoulets e lou rouvil !!
- 25. Passeroun la nioch presque entieira, A carrejà dins la palieira Aqueles outis un per un. Ulissa pourtava lou lum; Quand vesoun intrà dos chambrieiras
- 30. Que cresien pas tant matinieiras.

  Melanto, plena de verin,

  Contra lou rouial pelerin,

<sup>&</sup>lt;sup>1</sup> Corneille. (F.) — <sup>2</sup> Rouille. (F.)

Se plantet davans el en faça, En li fasent una grimaça:

- 35. «Ai, s'ou dis, es tus, impourtun?

  Encara dounc tenes lou lum?

  Fau que toutara à cops de bilha....»

  Ulissa li diguet: « Ma filha,

  Coumprene que me tratàs mau,
- 40. Per ça que moun er fai pas gau, E que seriàs pas tant cruela, Se fasian lusì l'escarcela!. Soui pas pus lourd qu'Eurimacus; Mais, pecaire! ai pas sous escuts.
- 45. Cepandant, treva de coulera,
  Vole be que vous tengàs fiera,
  Quand fringaren vostres apàs;
  Mais, entremens, nous batés pas,
  Car, anfin, poudès be coumprene
- 50. Qu'aco seriè trop entreprene.»

  La reina, qu'ausiguet aco,

  Sus lou cop sona Melanto

  E, d'un souflet de sa man moufla,

  La vira couma una pantoufla.
- 55. « Salopa! t'aprendrai, s'ou dis, A te querelà tant matis;

<sup>1</sup> La bourse.

Souven-te que toun insoulença Merita una autra penitença; E, per lou segu, la faràs:

- 60. Entremens vai lavà toun nas.»

  Penelopa, en dama de marca,
  E couma femna de mounarca
  Que reçap pas qu'un poulissoun,
  D'un er distrach e sans façoun,
- 65. S'alonga sus una cadieira,
  En manejant sa tabatieira.
  Pourtant, quand lou veget dedins,
  D'un parel de cops d'iols fort fins,
  Li fai poulitessa à la granda
- 70. E fort frechament li demanda
  Couma s'apela e d'ounte ven.
  El que se li esperava ben,
  Mais que n'era pas tant barjaire:
   «Ai! s'ou dis, Madama, pecaire!
- 75. De que me demandàs aquis?
  Se vous parle de moun païs
  E se voulès qu'age la glouera
  De vous enfilà moun istouera,
  Veirés que me faudrà plourà,
- 80. Ce que gaire noun counvendrà;
  D'autant mai que, quand me li mete,
  Sousque, prene de vents e pete;

Es pas emb un paure rascous D'empestà de gents couma vous,

- 85. Ni d'apouentà sa vielha fessa Vers lou pus bèu nas de la Greça; Car se pot dire, en veritat, Que l'avès de touta beutat. Atabé pertout vous l'ounoroun;
- 90. Aicì soun mila que l'adoroun;.... Mais à prepaus d'adouratous, N'avès fossa à l'entour de vous! Tout aqueles briquets, Madama, Vous devoun ben rejouï l'ama....
- 95. E Dieu sap se lous caressàs! »

   «Qu'es aiço, vesin, vous troumpàs,
  Repliquet madama d'Ulissa,
  Me rendès pas gaire justiça;
  Ieu vous jure qu'ai fort patit
- 100. Despioi que moun ome es partit:

  N'es pas surprenent; soui tant brava!....

  Oh! se lou ciel me lou mandava,

  Ieu dise pas que moun chagrin

  Emb el noun prenguessa una fin.
- Nais, per la banda sarrasina
  Que trota, aval dins ma cousina,
  Coumtàs que lous assoumariei
  Toutes à la fes, se poudiei:

- Cavalisca que lous ahïsse!

  110. Se saviàs ce que n'en soufrisse,
  Vous fariè levà lous pèus drechs.

  Mais..... vese... que n'avès pas ges;
  Amai, pecaire, vostra testa
  Es plena de mau, malapesta!
- A tout ce que m'an fach soufri,
  Un jour, couma fasien tapage,
  Li proumetere mariage,
  Noun pas à toutes, si vous plet,
- 120. Mais que fariei chouès d'un sujet Sus touta la banda cruela, Quant auriei finit una tela. Lou pau que de jour n'en fasiei, La nioch d'après, ou desfasiei;
- Ou'emb eles era familieira,
  Malurousament li ou diguet,
  E lou bruch tournà revenguet;
  De façoun qu'auriàs pena à creire
- 30. Tout ce que despioi me fan veire.

  »Aça, vous qu'aves tant roudat,
  Digàs-me s'aurias pas trouvat
  Entacon moun charmant Ulissa?
  Se sa Minerva, un pau proupiça,

- 135. Lou menava leu perqu'içai,
  L'esperariei ben un pau mai.....
  Anen, moun paure pret-à-bouera,
  Countàs-me touta vostra istouera;
  Sufit que me la debités,
- 140. Vous ou perdoune amai petés. »

  Ulissa à la reina indiscreta

  Diguet: « Counouissès-ti la Creta?.....»

   «Nani, s'ou dis...» « Tant pis per vous!

  Repliquet lou rei pesoulhous;
- Pus granda que la Bourtalassa; Counten cent vilas de renoum, Qu'entre toutas farien Lioun. Lous abitants soun redoutables,
- 150. Mais sous noums soun fort agreables:
  Eteocrètas, Acheens,
  Lidoniens, Pelagiens,
  E Doriens, e d'autras gents;
  La femnas de chaca carrieira
- De sorta qu'entendés pas res,
  Quand parloun toutas à la fes.
  » La vila la pus magnifica
  Es una bastida em de brica.
- 160. Per qu'illai l'apeloun Gnossos,

Païs de l'avoucat Minos. Disoun qu'au palai plaidejava, Lou jour que sa femna acouchava D'un certen Deucalioun

- 165. Que venguet couma un champignoun.
  Aquel d'aqui seguet moun pera,
  Au dire de ma paura mera;
  E de quinze ou sege manits,
  Ieu seguere lou caga-nis.
- 170. Ulissa, en anant à la guerra,
  Sus nostra plaja prenguet terra,
  E venguet tout drech à l'oustau;
  Vouliè pas li restà qu'un pau;
  Mais la bouta qu'avian traucada,
- 175. Li faguet chanjà de pensada;

  Lou coumpaire nous quitet pas

  Que quand counouguet qu'era au bas.

  N'i aviè mes una dama-jana

  Dins un cantou de sa tartana,
- 180. E li remountet pus countent
  D'aquel bon vin que dau bon vent. »
  La chasta princessa encantada,
  Era de plours touta inoundada;
  Omera dis, couma un valoun
- 185. Dins lou tems que la neu se found. (Es bela la coumparesoun.)

S'aviè sauput quau l'engusava, La charmanta que tant plourava, Santadi! de quinte apetis

190. La bona dama n'auriè rist!

Mais Ulissa, prudent e sage,

Lachet pas mot dau parentage.

Ela, quand aget proun souscat,

Per descouvri la veritat

- 195. D'una nouvela tant antica,
  Prenguet un tour de poulitica:
   « Aça, diguet au batelur,
  Vejan se ses pas un ablur;
  De de qu'eroun la reguingota,
- 200. L'abi, la vesta e la culota,

  Que pourtava adounc moun marit

  E quintas gents l'avien seguit?

  Tant de couquis m'an atrapada

  Qu'ai toujour pòu d'estre troumpada. »
- 205. Ulissa li diguet d'abor Qu'era pas un pichot esfort De rapelà dins sa memouera Talas epocas d'una istouera, Surtout après vint ans passats:
- 210. « Mais couma vous mentisse pas, Dieu, s'ou dis, me farà la graça De n'en retrouvà quauca traça.

Me sembla ben que sous abits Eroun blancs, blus, verts, rouges, gris,

- La reguingota que pourtava

  Se sarrava jout lou mentoun,
  Emb una agrafa de loutoun.

  Darriès, au mitan de l'esquina,
- 220. Vesiàs una pintura fina,

  Que representava un gros rat

  As presas emb un pichot cat.

  Lou cat teniè la grifa lesta,

  Per li la mandà sus la testa;
- 225. Mais, en se revirant tout court,
  Lou rat l'esfraiava à soun tour.

  » Admiren fort aquel ouvrage,
  E lous enfants, couma d'usage,
  Per ou poudé veire de pres,
- 230. Li courrissien toutes après.

  « Un mòrou, noumat Euribata,
  Qu'aviè la faça larja e plata,
  Un grand diable tout frisoutat,
  Pus grand que ieu de la mitat,
- En vila couma à la campagna.

  Ch! segnur, per un ecuiè,

  Lou sot merle qu'aco fasiè!

Cepandant Ulissa l'aimava, 240. Car toujour lou poutounejava. » Ara, Madama, à moun recit Regardàs se vous ai mentit.» - « Noun certa, li dis la reinota, Es ben vrai de la reguingota, 245. Car ieu mema li aviè tirat Lou dessen dau cat e dau rat, Comma la pintura fidela De nostra unioun mutuela.» Aquì dessus, tout en plourant, 250. Diguet au viel caramantran Que li fariei fa poulitessa, S'era qu'à la cour demouressa. Lou mounarca, en cracant toujour, Reprenguet tournà soun discour, 255. Afin d'adouci la tristessa De soun adourabla princessa: - « L'ilsustre Fedoun, li disiè, M'a countat qu'Ulissa viviè. Moun Dieu, quinte sent persounage! 260. Vai fini soun pelerinage; Esperàs-lou, revendrà lèu, E vous prendrà sus soun vaissèu. Ieu, sus un autre que louguere,

Avans soun retour m'embarquere;

Dau cors es un pauquet usat, E las fatigas l'an chanjat..... 315. Per que m'ou dis pas, la pecora?...» Dins lou doute que la devora, Tout disent: — « oui... nani.... si fet!... » La paura femna se couchet: Mais au liech, aco l'agitava, 320. Se virava, se bourdouirava, E toujour: — « es el, n'es pas el..... E quau diantre pot estre aquel?..... » A la fin dis à la nourriça Qu'autras fes atessava Ulissa, 325. De veire s'era pas soun fil; L'autra respond: « Ainsi soit-il ?» Prend sa bequilha, sas lunetas, Aluma un parel de brouquetas E vai de long das escalies, 330. En cridant: — « Ulissa, çai sies?..... Monta que ta femna t'espera, Me counouisses pas? Soui ta mera. » Lou rei li respoundet d'en bas: - « Vielha mounina, repapiàs !.

335. Vous jure que soui pas Ulissa,

E que n'ai pas pus de nourriça. »

<sup>1</sup> Vous radotez. (F.)

Ela, en redoublant soun caquet, Intra, vai querre soun briquet, E reven emb una candela,

- 340. E d'aiga dins una escudela.

   « Aça, veiren ara, s'ou dis,
  De nautres dous quinte mentis:
  Anen, baila-me tas anquetas,
  Que las lave; e quand seran netas,
- 345. Se se li trova un creche round,
  Sinne qu'as agut un flouroun.
  E, per counsequent, sies mounarca.
  De fet, se li trouvet la marca
  E cridet bon: « Viva lou rei!.....
- 350. Fau pas negà ce que se vei.
  Gagneres aquela magagna
  Un jour qu'aneren en mountagna
  Veire toun grand Autolicus;
  Lou raiòu couchet embe tus;
- 355. E couma sa car n'era plena, Te dounet aquel per estrena, Emb un gros emplastre d'enguent Que garantissiè souveren; Antau, fagàs pas la cadaula<sup>3</sup>.

<sup>&</sup>lt;sup>1</sup> Une cicatrice. (F.) — <sup>2</sup> Clou. (F.) — <sup>3</sup> Ne dissimule pas. (F.)

- 360. Sies Ulissa, sus ma paraula!

  Vau vite dire à ta mouliè,

  Que venga long de l'escaliè.

  Li passaràs la nioch emb ela. »

   « Oh! mardì, crese pas aquela,
- 365. Li dis Ulissa, en l'arrestant;
  Counvene que soui vostre enfant;
  Mais se m'aimàs en bona maire,
  Vous gardarés ben d'aco faire,
  Quand vous dirai de que s'agls.
- 370. Voudriei tuà mous enemis
  Secretament à cops de flecha;
  Mais s'anàs eventà la mecha,
  Aco me lous farà mancà,
  Amai me farés ensucà. »
- 375. « Pesta! li respond la nourriça,
  Aco sufis, moun cher Ulissa;
  Te jure que, de toun secret,
  Parlarai pas mai qu'un pourtret. »
  La paura vielha, rejouïda,
- 380. Li faguet una aiga-boulida,
  E tout barjant s'anet couchà,
  En proumetent de pas barjà.
  Cepandant la chasta princessa
  S'entreteniè de la tendressa
- 385. Que li inspirava l'emperit;

Es ben vrai qu'era soun marit, E mema qu'ela s'en doutava; Mais sus lou doute s'embarcava. Lou poulit viage qu'era aquel

- 390. S'aviè pres un autre per el!

  La causa era pas impoussibla.

  Penelopa dounc, fort sensibla

  As graças qu'aviè lou pelaut,

  Li venguet troublà soun repau:
- 395 « Ai, s'ou dis, quicom à vous dire,
  Vesin, escoutàs moun martire.
  Vesès, sans poude mai tardà,
  Deman me faudrà maridà;
  Mais couma aqueles que me badoun,
- 400. L'un mai que l'autre noun m'agradoun, M'es fort tout un, quinte que sié, Lou que m'aurà per sa mouliè; Mais, parbieune, davans que m'age, Esprouvaren lou persounage:
- 405. Lou paure Ulissa m'a quitat
  Un aubalestre demountat:
  Dirai que lou destin m'acorda
  Emb aquel qu'aussarà la corda
  Au pount que fau per s'en servì.
- 410. S'un d'eles li la fai venì, Ce que crese pas qu'à grand pena,

Au mens, serà de bon mena:
Ou pourriàs pas ensajà, vous?»
— « Oh! que si fet! Mais lous grigous

- Auran dejà perdut la closca,
  Avans d'estre à la premiera osca:
  Vaudrà mai lous pas espuisà,
  E que mourigoun sans susà.
  Vous jure que, sans dire gara,
- 420. Ulissa vai veni tout ara. »

  La reina li arrapet lou nas,

  En li disent: « Que ses bravàs!

  N'aviei pas, quau sap despioi quoura,

  Passat un tant brave quart d'oura,
- 425. Couma ai fach aquesta d'aicis;
  Aça, bon souer e gramecis. »
  En se retirant, la princessa
  Souspiret un pau de tendressa;
  La nourriça la relevet
  - 430. E long das escaliès pourtet
    Una palhassa per Ulissa:
    Qu'era brava aquela nourriça!
    Proumetet quinze ou sege fes,
    Qu'au mens parlariè pas de res;
  - 435. Après aco prenguet la lampa E l'amousset dessus la rampa. Soun enfant, sans poude dourmi,

Sounjet, revet jusqu'au mati, Couma pourriè, dins la journada, 440. Assoumà la troupa damnada.

FIN DU DIX-NEUVIÈME LIVRE.



	•		
	·		
	·		
		· .	



## ODYSSÉE D'HOMÈRE

En vers burlesques patois.

#### SOMMAIRE DU VINGTIÈME LIVRE.

Repos d'Ulysse troublé. — Premier mouvement de ce grand homme. — Ses réflexions. — Sa prudence. — Son embarras. — Arrivée miraculeuse de Minerve. — Réveil de Pénélope. — Prière à Diane. — Prière à Jupiter. — I eur effet. — Joie du roi. — Reproches de Télémaque à la nourrice. — Arrivée des bergers à la Cour. — Insolence de Mélantée. — Con pliment de Philétius au Roi. — Apostrophe à Jupiter. — Prédiction. — Amphinome s'oppose au noir complot des prétendants — On dine. — Télémaque prend du courage. — Réflexion prudente d'Antinous — Sacrifice. — Ctésipe insulte Ulyss.. — Télémaque en est fâché. — Agélus s'en étonne. — Trouble des prétendants. — Prophétie de Théoclimène. — Moqueries et pari sur la prédiction. — Les prétendants s'en alarment et se rassurent. — Télémaque attend le signal du combat,



• .



# ODISSEA D'OUMERA

#### LIBRE VINTIEME.

Ausiguet escalà tout bas
Certens galants de Penelopa,
Qu'anavoun veire una salopa;
Crese fort qu'era Melanto,
Ou quauque sujet couma aco.
Mais couma lou divin Omera
N'a pas vougut dire la qu'era,
Nautres noumaren pas degus,
10. Per faire pas lous entenduts.

Es certen qu'era una chambrieira Qu'emb eles era familieira; S'era soula, se n'i aviè mai, Soun pas mous afaires, noun sai.

- 15. Me doute qu'era pas souleta;
  Mais se dis pas dins la sourneta.
  Lou rei seguet tant endignat
  Que n'en cuget faire un esclat;
  Soun ama era pus tourmentada
- Que la mar quand es agitada.
   Vouliè sautà sus lous couquis
   Que voultijavoun per aquis;
   Mais la pou de mau fa besougna
   Li refrechet ben lèu sa pougna.
- 25. Se diguet el mema: « Pelaut,
  Crei-me, demora de repau,
  E cerques pas gis de disputas
  Que noun ages mountat tas flutas.
  As passat de niochs, Dieu merci,
- 30. Pus orras qu'aquesta d'aici,
  Quand n'en voudrien à Penelopa:
  Car aquela ounte lou Ciclopa
  M'envalava mous coumpagnous,
  Era ben dins un pire goust;
- 35. E m'en tirere embe prudença. Ara, en retardant ma vengença,

Soui presque segu de moun fet; Antau, douçament, si vous plet...» Omera dis que sas pensadas

- 40. Viravoun couma las flamadas
  Dau fioc que nautres aluman,
  Quand ven la velha de Sent Jan.
  Dins soun secret lou rei d'Itaca
  N'aviè pas mes que Telemaca,
- 45. Paure segound, feble pougnet
  Per la partida de toupet:
  Lou mounarca, quand li sounjava,
  Atabe se descourajava.

Era antau ben embarrassat

- Quand Pallàs, d'un er empressat,
   Davalet dau ciel en camisa,
   Per l'acusà de couardisa.
   α Qu'es aiço, li diguet, nigaud?
   Ses arrivat à vostre oustau,
- Trouvàs una femna fidela,
  Qu'autras fes era jouine e bela,
  Un enfant poulit à manjà,
  E vous anàs descourajà?
  Es pas aco que demandaves,
- 60. Autras fes, quand nous envoucaves?...»

   « Si fet, li respond finament

  Lou prince toujour elouquent,

E gramecis de vostra ajuda; Mais ara moun inquietuda

- 65. Ven das ordres que me dounès Contra lous gouluts que savès. Car couma faire? aquela banda Malurousament es fort granda; Soun toutes de galhards reblats,
- 70. E jamai se separoun pas:
  Tout aco me fai pas grand lega.
  Es vrai, li pode cercà brega;
  Mais soui tout soul, e, se lou ciel
  N'a pas un pau souen de ma pel,
- 75. Me vese, ce que me chatoulha,
  Escourchat couma una granoulha:
  Per moia, se m'abandounàs,
  Ai pòu que n'escaparai pas!»
   « Ah! poultroun, li diguet Minerva,
- 80. Coussi! lou bras que te counserva, Creses dounc que s'es aflaquit? Souven-te, rouial abestit, Que quand l'on a besoun d'audaça, La prudença es una bestiassa....
- 85. Tout aco t'escampilharai,
  Quand seguessoun trenta fes mai;
  Lous dieus sen de gents d'una mena
  Que lou noumbre nous fai pas pena.

Ulissa la remerciet, 90. Badalhet e s'endourmiguet; La deessa lou quita, e grimpa Per n'en faire autant dins l'Oulimpa. Penelopa aviè fach un som; Mais qu'era pas istat fort bon, 95. Toujour trista, la baucha qu'era, Plourava qu'era una misera; Tout lou mounde la planissiè. Aquel matì, dins sa fouliè; Mandet, per una sarbacana, 100. Aquesta oresoun à Diana: - « Divina filha de Jupin, Qu'afustàs tant ben un lapin, Eh! per que prenès pas la pena De tirà drech à ma bedena? 105. Que noun lou vents m'emportoun lion, Per faire naufrage entacon, E jougne au cabus moun Ulissa, L'ai n'ounte Minos ten pouliça? Fau-ti vieure dins lou chagrin, 110. Sans n'en veire jamai la fin, E la pourtà jusqu'au susari? Lou som, el mema m'es countrari;

> Lou som qu'es un tant bon enguent, Pot pas adouci moun tourment;

115. Tout ara m'a moustrat l'image D'aquel aimable persounage.... Deessa, vous que coumprenès, Noun pas de founs, mais à peu pres, De quinta façoun soui mouqueta

120. De m'evelhà touta souleta; De graça, tiràs, tuàs-me, Me farés plesì, per ma fe!» Antau Penelopa pregava; E soun ome que l'escoutava,

125. Des que veget lusi lou jour, Preguet Jupiter à soun tour: - « Mestre dau ciel e de la terra, Vous que rebilhàs un tounera Couma nautres un serpantèu,

130. Fasès-me counouisse au pus lèu Per quauqua traça de miracle, Se me venjarai sans oustacle D'aquesta troupa d'enemis, E se ses un de mous amis. »

Sus lou champ lou tounera peta; 135. Une vielha touta souleta, Que filava dins un graniè, S'acoussa vite au benitiè, En disent: — « La journada es bona,

140. Quand lou ciel es linde e que trona,

Sinne que, dins aqueste oustau, Auren tourna lèu lou repau. Baste, Dieu nou'n fague la graça!» Entre que la paura femnassa 145. Aget antau proufetisat, Ulissa seguet soulajat. - « Anen, bon, s'ou dis, Tritonida A toujour souen de nostra vida; Per nautres, aqueste matin, 150. Fau qu'age parlat à Jupin.» Lou mounarca, plen d'alegressa, Faguet un saut per la deessa. Cepandant, dins tout lou palai, Se fasiè de fres que noun sai, 155. Per la noça de la princessa; Dejà la grand taula era messa, L'auboi lougat e lou lauriè Tourtouvilhat em de papiè. Lou pople, qu'aima la fanfara, 160. Coumençava lou tintamarra; E de pastres, au pichot pas, Menavoun à regret dau mas

> De moutous de la bela mena. Un certen Jordi Filoumena,

165. Qu'era cargat d'aquel bestiau, Entre qu'arrivet dins l'oustau, Touquet la man au paure Ulissa; Mais un varlet, plen de maliça, Aquel que l'aviè mautratat

- 170. A la font ounte era arrestat
  Embe lou bon vielhard Eumea,
  Enfin, lous gus de Melantea,
  Que per aqui se rencountret,
  Couma aco, tournà l'agairet:
- 175. « Veses ben aquel miserable;
  Per la brafa es incoumparable,
  E, quand sentis un bon repàs,
  Amai li coupesses un bras,
  Li fariàs pas quità parada,
- 180. Que quand n'a tirat sa maissada;
  Mais, escouta, viel galavard,
  Ioi te podes tene à l'escart,
  Alhurs te mancarà pas proia,
  Car touta la vila es en joia;
- 185. Passa-me vite lou cantou,
  Ou t'espalle à cops de bastou. »
  Ulissa n'en diguet pas una,
  E lou mespriset sans rancuna,
  Ce que tout lou mounde admiret.
- 190. Adounc Filetius intret,
  Acoumpagnat de mestre Eumea,
  Grand enemi de Melantea,

— «Ai! diguet d'abor en intrant, Qu'aquel poulissoun a l'er grand!

- Quinta prestança! digàs, mestre?

  Quinta prestança! digàs, mestre?

  Doute qu'es lou rei d'entacon;

  Car, quand vau vouiajà trop lion

  Das endrechs ounte an sa courouna.
- 200. La misera antau lous pounchouna,
  Despensoun, fan fossa fracas;
  Quand sous escuts soun acabats,
  N'an pas de gents que n'in fournigoun,
  E, per força, fau que patigoun.»
- 205. Tout disent aco, s'avancet
  Vers lou mounarca e l'embrasset,
  Après un coumpliment fort tendre,
  Que vous fara plesi d'entendre:
- -- « Elàs ! moun paure, Dieu çai sié ! 210. Vous souete un tout autre mestiè;
- Car vous enrichirés pas gaire, Emb aquel que vous vese faire.
  - » Vous, qu'avés vostre trone en l'er, Reveran-pera Jupiter,
- 215. Fau que segàs ben inflessible, Se vesès d'un iol insensible Lous omes qu'aviàs courounats, Deveni gus couma de rats.»

— «Anen, vese, diguet Ulissa, 220. Que vautres aimàs la justiça, E qu'à vostre rei ses fidels, En bons e braves pastourels;

Atabé save una nouvela Qu'es interessanta e fort bela:

225. Lous dieus m'an après de matis Que vostre bon mestre era aicis. » Surpresa de la proufetia, La pastourela couteria Juret que, se lou revesiè,

230. Per el se sacrifiariè, E qu'escampilharien dau ròdou ' Sous enemis à cops de codou '. Ulissa, per aquela fes, Vouguet pas li dire pus res.

235. Cepandant la banda afamada,
Que dispausava una embuscada
A soun fil darriès un bartàs,
Veget, à gaucha, un croupatàs,
Que, dins lous ers, embe sa proia,

240. Voulava e cantava de joia.

Amfinoma s'en desfiset,
E fort sajament proupauset

<sup>&</sup>lt;sup>1</sup> D'alentour. (F.) - <sup>2</sup> De pierres. (F.)

Un amusament pus ouneste, Jusqu'à ce que tout seriè preste,

- 245. E que la reina causiriè

  Lou de sous galants que voudrie.

  L'avis que dounet à la troupa

  Era d'anà manjà la soupa:

  Li aneroun couma de lebriès,
- 250. Braferoun couma de barbiès,
   E chacun, dins aquela festa,
   Chimet jusqu'à perdre la testa.
   Au segound garri que beguet,
   Telemaca s'enardiguet
- 255. Jusqu'à mandà, dins sa coulera,
  Un pan de saucissa à soun pera,
  E li dire, d'un toun fort naut:
   « Te, pioi que sies dins moun oustau,
  Manja.... se quauqu'un te querela,
- 260. Lou tombe d'un cop d'escudela. »
  Mountat dessus soun grand chival,
  Atendiè pas que lou signal
  De l'espouvantable batalha
  Que devien faire à la canalha:
- Aviè pres un er resoulut;
   Mais lou tems n'era pas vengut.
   Per se rendre lou ciel proupice,
   Aneroun faire un sacrifice;

Vint moutous segueroun tuats,

- 270. Roustits, e pioi distribuats A la venerabla assistança, Qu'atendiè la senta pitança; Ulissa el mema n'en manget Un floc que soun fil li dounet.
- 275. Disoun qu'era pas qu'una tripa.

  Un certen Barrabàs Ctesipa,
  Ancien gentilhome jasiòu,
  Fier maquignoun, illustre miòu,
  Sans respec li jita à la testa
- 280. Un rabigot 'qu'aviè de resta,
  Acoumpagnat d'aquestes mots:
   « Te, gus, rousiga-m'aquel os. »
  Ulissa se corba, l'evita
  E se releva tout de suita,
- 285. En sourisent d'un er malin
  Dau pau de biais d'aquel rabin;
  Mais Telemaca, de coulera
  De veire mautratà son pera,
  Tout d'un cop se descadancet,
- 290. E contra Israel s'elancet, Per lou trespanà d'una bana Qu'aviè mes au bout de sa cana.

<sup>1</sup> Petit os. (F.)

Agelus ie diguet: — « As tort. Ioi ta mera nous met d'acord;

- 295. E tus, per una bagatela,

  Venes aicl cercà querela?»

   « Oh! s'ou dis, bagatela ou noun,

  Que se mostre lou maquignoun....!

  Penelopa es fort sa mestressa,
- 300. E, se vous dona sa tendressa,

  Bien vous en soit; mais, entremens,

  On vai pas insultà las gents. »

  Tout roundinant, s'en retourneroun;

  Au palai tournà s'atauleroun;
- 305. Mais, se lous agesses ausits,
  Vous responde qu'auriàs ben rist
  De l'er que se li coumpourtavoun:
  Tantos risien, tantos plouravoun;
  Pioi l'un à l'autre se disien:
- 310. « Per que plouran? Per que risen? »
  Era Pallàs que badinava,
  E qu'antau lous devariava.
  Teoclimena, en bon sourciè,
  Devignet, couma s'ou vesiè,
- Ounte toutes perdrien la testa.

   « Tenès, s'ou dis, jogue vint sous,
  Contra vint parels d'escuts nous,

Que l'alerta que vous predise 320. Arrivarà couma vous dise; Amai qu'arrivarà dins pau; Mais despachàs-vous ou m'en vau. » Un d'eles qu'era un cerca-rena, Contre Ulissa e Teoclimena, 325. Lou veire à la man, declamet Quauquas soutisas, sans suget. — « Regardàs, s'ou dis, en Itaca De que rebala Telemaca! Un proufeta qu'es mitat bau, 330. Emb un viel rebut d'espitau..... Defora, canalha!.... en galera!.... » Lou prince estoufet sa coulera; Mais se sounjava: — « Gros goulut, Faràs pas long tems l'entendut. » Esperava emb impaciença 335. Que soun pera, de la vengença, Li dounesse enfin lou signal; Mais la reina qu'era aiçaval, Per fa las ounous de la festa, 340. Meditava un grand cop de testa, Dins lou tems que chacun cresiè, Que finalament causiriè.

FIN DU VINGTIÈME LIVRE.



## ODYSSÉE D'HOMÈRE

En vers burlesques patois.

#### SOMMAIRE DU VINGT ET UNIÈME LIVRE.

Proposition de Pénélope aux prétendants. — On apporte l'arc d'Ulysse. — Télémaque essaye de le monter. — Liodes y perd sa peine. — Discours d'Antinoūs. — Les prétendants se dépouillent. — Ulysse se fait connaître aux bergers. — Leur résolution. — Ruse inutile d'Eurimachus. — Consolant propos d'Antinoūs. — Ulysse monte la corde de l'arc — On l'apostrophe. — Réponse de Pénélope. — Réflexions d'Eurymaque. — Déclaration de la reine. — Rodomontade de son fils. — L'arc est remis entre les mains d'Ulysse. — Signal du combat.





# ODISSEA D'OUMERA

LIBRE VINT-E-UNIEME.

inerva, qu'era una senta ama Aviè dich à la chasta dama, De proupausà, per gagnà tems, Certen esercice à sas gents; Tour funeste, que la chalanda Preparava à touta la banda. La reina dounc as galinets Diguet: - « Vesès, mous chers briquets, Ieu pode pas prene un de vautres, 10. Sans oufensà toutes lous autres;

5.

Mais, enfin, pioi qu'aco's moun sort, Vole estre lou pris dau pus fort; Vau faire pourtà dins la sala Un arc qu'ailamoundaut rebala

- 15. Despioi que moun ome es partit, E declare per moun marit Lou que mountarà la ligneta Au pount ounte fau que se meta, Per lança las flechas pus lion;
- 20. Mais, au mens, ou dise de bon;
  Se degus noun n'en ses capables,
  Mande touta la troupa au diable. »
  L'aubalestre, tout demountat,
  Dins lou moument seguet pourtat,
- 25. E Penelopa, de lou veire, S'afliget, couma poudès creire; Car, pecaire! se souveniè Que soun ome s'en servissiè Tant facilament que cantava
- 30. A mesura que lou mountava.

   « Aça, diguet à dous varlets,
  Vejan s'aqueles miquelets
  Manejoun aquesta machina
  Autant ben couma la quentina.

<sup>1</sup> Bouteille. (F.)

- 35. S'avien counsultat l'almanac,
  Aurien dejà mau d'estoumac.'»
  Telemaca, dins lou bourlisse ',
  Vouguet coumençà l'esercice;
  Prenguet l'aubalestre à la man,
- 40. E dis: « Messius, aça, vejan,
  Davans que ma mera me quite,
  Se soun fil a quauque merite. »
  Se li ensachet pendent cinq fes;
  Mais à toutes sous esquichets,
- 45. La corda toujour resistava;
  Au sieisiema, pourtant, prestava;
  Mais l'enfant, per se trop fourçà,
  Faliguet à se relassà.
  Fauguet qu'Ulissa li faguessa
- 50. Un sinne que se retiressa.

  Après el, venguet Liodès,

  La perla, la flou das sourciès;

  Mais, entre que touquet la corda,

  Cridet: « Secous!.... misericorda!.....
- 55. Faga, que pot, un tau mestiè....
  Crese, lou diauca noun me siè,
  Que Penelopa nous engusa:
  Regardàs un pau quinta rusa!

<sup>1</sup> Trouble (F.)

Counoui be, la coumaire qu'es,

- 60. Qu'aicl l'on gagnarà pas res....»
  En resounant d'aquela sorta,
  Quitet l'aubalestre à la porta.
  Mais Antinoüs lou ventrut
  Diguet, en fasent lou letrut,
- 65. Que l'on poudiè pas, sans vergougna, Refusà d'ensachà sa pougna, Quand l'on poudiè, d'un tour de man, Gagnà lou pris lou pus charmant. Per rëussì, toutes tant qu'eroun,
- 70. Sus lou champ se desabilheroun, Couma per se batre en duel; Mais chacun brullet un gavel; Lou traval tant lous escaufava, Que pioi lou frech lous arrapava.
- 75. Eumea, amai Filetius,
  Eroun sourtits, toutes counfus,
  De veire una reina tant bela
  Tenì pas que d'una ficela
  A sa longa fidelitat.
- 80. Quauques fieus qu'agessoun petat, Adieu! de la chasta princessa, Anavoun raflà la sagessa; Mais ralhen pas de l'ancien tems, Ioi la vertut ten ben à mens.

- 85. Ulissa entendet que sous pastres
  Disien: « Elàs! que de desastres
  Arriva dins aqueste oustau!
  Las causas van toujour pus mau.
  Aven perdut lou milhou mestre
- 90. Que mourtel aja pougut estre,
  E lou regretaren be mai,
  S'aquel mariage ioi se fai. »

  Lou rei li faguet un sourire:

  "Ai s'ou dis quicon à vous dire
- « Ai, s'ou dis, quicon à vous dire, 95. Sourtissès un pau, qu'ou sauprés; Mais davans fau que proumetés
- Mais, davans, fau que proumetés
  Que serés ce que devès estre
  A l'egard de vostre bon mestre.
  Se, per asard, aicì reven;
- Fagueroun, lous dous miserables,
  Mila serments espouventables.

Lou rei qu'aco satisfaguet, Sans pena se descouvriguet:

- 105. «Aça, s'ou dis, à ma figura,
  A mas pelhas, à moun alura,
  M'avès pres per un viel gusàs.
  Eh ben, enfants, vous ses troumpàs;
  Es una sourcieira divina
- 110. Que m'a dounat aquela mina,

Per me fa puni la fouliè Das fringaires de ma mouliè. Ela m'a proumés soun ajuda; E vautres qu'avès la man ruda,

- Per amalugà lous fripouns.

  Degus noun sap que siege Ulissa,

  Que Telemaca e ma nourriça.

  Ma femna meme ou sauprà pas,
- 120. Que quand lous auren ensucats.
  » Vautres s'avès pena d'ou creire,
  Sus mas ancas ou poudès veire;
  Se li a lou creche d'un flouroun,
  Auriàs tort de dire de noun.
- 125. Lou mounarca se desembralha;
  Chacun, per tour, se li mirailha,
  En disent: «Sira, es ben marcat
  Lou cachet dau certificat!.....»
  Cent fes li lou poutounegeroun.
- 130. E, de tant de plours l'arrouseroun Que lou prince, trop atendrit, Remetet lou tout dins l'estuit, E dounet à lur coumplasença Cent marcas de recounouissença.
- 135. Pioi li diguet: « Mous bons amis, Vese que riscan trop aicis,

Intren tournà dedins la sala, Entre que la troupa brutala Aurà proun susat à moun arc,

- 140. Me lou pourtarés à l'escart;
  Mais qu'adounc las portas se barroun,
  E que nostras femnas s'embarroun,
  Car, pecaire! se sourtissien,
  Soui segu que s'essraiarien. »
- Sous esclops à la man, intreroun;
  E lou rei s'arrestet esprès,
  Per veni quauque tems après.

Dins lou tems qu'aco se passava, 150. Lou fier Eurimaca luchava

Per bandà l'arc en questioun. Lou caufava, lou champioun, Afin que se ramouliguessa; Mais, malgrè touta soun adressa,

Tantos lachà, tantos tirà,
Faguet veire, lou manja-piota,
Que noun era qu'una pagnota;
E, de coulera enfurenat,

160. Renegava couma un damnat.

<sup>1</sup> Devenu furieux. (F.)

— « Ce qu'aicis, s'ou dis, me rebuta, Es pas lou pris que l'on disputa, Manca pas de femnas alhurs, Tout n'en trova jusqu'as talhurs;

- N'es pas, mardi, que la vergougna
  De fa veire que nostra pougna
  Pot pas faire, en se disloucant,
  Ce qu'Ulissa a fach en siblant;
  E de passà, de raça en raça,
- 170. Per de gros porcs à la tirassa¹».
  Mais la banda se counsoulet,
  Lorsqu'Antinoüs li diguet:
   « M'estoune pas, nobla canalha,
  Se ioi fasen pas res que valha,
- 175. Car es la festa de Febus,
  E lous travals soun defenduts,
  N'aven qu'à nous remettre à taula,
  Vous proumete, sus ma paraula,
  Couma s'ou teniàs dins la man,
- 180. Que brilharés milhou deman. »
  Sus aquel avis s'atauleroun;
  Tournà las maissas varalheroun;
  Mais, gara la fin dau repàs.
  Ulissa tira tout escàs

<sup>1</sup> A la charrue. (F.)

185. La corda de l'arc, e sans pena
A la bona osca vous la mena.

Mestre Antinoüs s'alufet ',
E fierament l'apoustroufet!

— « Au! diga, s'ou dis, miserable,

E gagnà lou pris as despens
De tout aquestas bravas gents?
Countenta-te de la fricassa
E veni reprene ta plaça,

195. Pioi que lou daufin, per bountat, Vòu que manges à soun coustat. Crei-me, laissa aquela besougna.... Mais regardàs aquel ivrougna! L'on a bèu li dire « Esta siau »,

200. Vòu pas demourà de repau.

Se me leve, michanta testa,

Te vene jougà de toun resta. »

Entre qu'Antinoüs calet,

Penelopa lou relevet:

205. — «Fau, s'ou dis, estre ben bijàrrou, Per s'oufensà qu'un viel coucàrrou Que moun fil a pres dins la cour Ensache aquel arc à soun tour!

<sup>&</sup>lt;sup>1</sup> S'irrita. (F.)

Qu'avès pòu? que l'on l'espousessa,

- 210. En tout cas que rëussiguessa,
  E que, dins nostre liech rouial,
  Meteguessen aquel rival?
  Oh! digàs-me, quinta aparença
  Que devengan sa recoumpensa!....»
- 215. « Mardi, respond Eurimacus,
  Aco counsola pas degus;
  Car nostra ounta es eternela,
  D'abor qu'à mountat la ficela.
  Se dirà pertout qu'un vielhard,
- 220. Un pesoulhous, plen de magagna, Un beca-figa, un pelucard, Aurà fach bourcà la coumpagna. Cresès-ti que siè gracious D'antau passà per de fouirous?
- 225. E, pioi, quinta espeça de glouera Li revendrà de sa vitouera?....» — «E vautres, la reina li dis, D'ounte ven que ses tant ardits? Car anfin m'avès trop lassada,
- 230. Per dissimulà ma pensada; Jusqu'ara vous ai trop soustats '. Escoutàs-me dounc, esfrountats.

<sup>1</sup> Trop soufferts. (F.)

Aquel vielhet es de noublessa, E pot pretendre à ma tendressa;

- 235. Noun es ni bau, ni fanfaroun, Caqueta couma un Ciceroun. Ieu n'ahisse pas sa mineta; D'alhurs, en toucant la ligneta, Sus lou champ l'a facha venì,
- 240. E se lou ciel lou vòu benì,
  S'à la bona osca l'a menada,
  Vous declare que m'a gagnada.
  »Vautres, s'avès un pau d'ounou,
  Descampàs, e laissàs-me-lou.
- 245. La reina, sus aco, se vira,
  E sans pus parlà se retira.
  Telemaca dis à soun tour,
  Qu'era tout puissant dins sa cour,
  E per counsequent fort lou mestre
- 250. De faire metre l'aubalestre
  Entre las mans que li plairié,
  Car tala era sa fantasié.
  Tout de suita ourdouna à sous pastres,
  Que fagueroun pas lous piniastres,
- 255. De l'anà rendre sans façoun
  Au venerable poulissoun.
  Dins lou tems que li lou pourtavoun,
  Lous pretendents lous arrestavoun,

E, toutes ensemble mesclats 1,

260. Cridavoun: — « L'aurà..... l'aurà pas.....
L'aurà pas..... l'aurà..... fau que l'age,
Ou vous n'en coupan lou visage.....»
A la fin finala l'aget,

E finament lou maneget,

265. Couma un abille vieulounaire, Quand, per moustrà soun saupre-faire, Avans de rasclà soun vieuloun, Met las cordas à l'unissoun.

Après aquel pichot prelude,

- 270. Quoueque l'arc seguesse ben rude, Nostre rouial caramentran Lou bandet d'un virà de man (Amai n'era pas la man drecha!) L'afusta, n'en tira una flecha,
- 275. N'en tira dos, n'en tira tres,
  E se fatiguet pas de res.
   « Eh be, diguet à Telemaca,
  Vesès be, mounsegnur d'Itaca,

Que n'avès pas, per caritat,

280. Aicì reçauput un crebat.

Lous qu'enrajoun de moun adressa
M'an pas fach gaire poulitessa.

<sup>1</sup> Mêlés. (F.)

Un jour s'en poudrien repenti; Mais lous cau laissà divertì; 285. Car es juste qu'après la pansa, Couma se dis, venga la dansa. » Ulissa dounc, d'un er rouial, Dounet lou funeste signal; Las femnas eroun enfermadas, 290. Toutas las portas ben clavadas; Telemaca qu'era pas sot, S'era prouvesit d'un bilhot E grumejava de coulera Darriès l'esquina de soun pera. 295. Aqui, couma un brave souldat, N'atendiè pas que lou coumbat. Lous princes entremens pintavoun, E de pus res noun s'oucupavoun.

FIN DU VINGT-ET-UNIÈME LIVRE.



		1	
	·		
		i i	



### ODYSSÉE D'HOMÈRE

En vers burlesques patois.

#### SOMMAIRE DU VINGT-DEUXIÈME LIVRE.

Ulysse s'empare de la porte. — Mort d'Antinous. — Bassesse d'Eurymaque. — Réponse d'Ulysse. — Résolution furieuse d'Eurymaque. — Ruse d'Amphinome. — Les bergers secondent leur roi. — Efforts des ennemis. — Discours insensé d'Agelus — Pallas promet beaucoup, ne tient rien et se cach: — Le courage revient aux prétendants. — Grands exploits pour la bonne cause. — Les ennemis cherchent un asile. — Leurs retranchements. — Ils reprennent cœur. — Leurs faits d'armes. — Vengeance d'Ulysse. — Pallas montre son égide. — Les ennemis fuient. — Le roi les poursuit. — Harangue inutile de Lyodès. — Celle de Phémius est accueillie. — Grâce accordée à Médon. — Il sort d'un tonneau. — Ulysse rit. — Recherches et triomphe du roi. — Euryclée descend et lui parle. — Punition de quelques servantes. — Mélanthée leur fait compagnie.



	•		
	•		
	·		
	·		



## ODISSEA D'OUMERA

LIBRE VINT-E-DOUSIEME.

us intrepide qu'Artaban,
Ulissa, l'aubalestre en man,
S'era quilhat davans la porta;
E, dins lou fioc que lou transporta:

— « Vejan, s'ou dis, se sen adrechs.
E s'emb aiço l'on tira drech.
Apoulloun, vous demande en graça
De me fa faire bona cassa! »
Antinoüs, couma beviè,

10. Seguet afustat lou premiè;

En siblant la flecha cruela Li traverset la gargamela. Toumbet per coustat couma un sot E mouriguet sans dire mot.

- Se sentiguet estoumacada;
  Mais segueroun be pus mouquets,
  Quand, per prene de pistoulets,
  Sabres, fusil e baiouneta,
- 20. N'en trouveroun la plaça neta.

  Coumtavoun que lou galavard

  Era istat tuat per asard;

  Cepandant voulien, per maliça,

  Se jità toutes sus Ulissa.
- 25. L'assemblada en cors preniè van; Mais el li diguet:—« Anen plan, Canalha, ai la pougna prou forta Per vous tene lion de la porta. M'avès pres per un poulissoun,
- 30. E counfesse qu'aviàs resoun;
  Mais m'avès fach d'autras enjuras
  Que per un marit soun trop duras. »
  Eurimaca lou counouguet,
  E d'un er countrit, li diguet:
- 35. —« Es vrai, prince, l'on ou counfessa, Car n'aven fach de touta espeça

En cresent que vendriàs pas pus; Mais lou couqui d'Antinoüs, Qu'avès tuat dins la drilhança,

- 40. Menava soul touta la dansa;
  Demandàs-li se l'on mentis.
  Vole mouri, se s'en dedis.
  Vouliè massacrà Telemaca,
  E fourçà la reina d'Itaca.
- 45. Ara es mort; eh be.... Requiem....

  Per ma fouè, se lou planissen:

  Avès fach un tret de justiça;

  Mais nautres, mounsegnur Ulissa,

  Oh! parbieu, nous cau perdounà;
- 50. Boutàs.... laissàs-nous enanà; Vous n'auren de recounouissença E per ce qu'es de la despensa Qu'aven facha dins vostre oustau, N'avès qu'à dire quand vous cau;
- 55. Se li a pas qu'aco que vous trouble, Sen prestes à pagà lou double Tout lou vin qu'aicì l'on beviè. Metès-lou set sous lou pichè; Quatorze lou pan de saucissa:
- 60. Vesès be, generous Ulissa,

  Que l'on se mes à la resoun. »

  Lou rei li respond : « Poulissoun,

La despensa de ma cousina Se pagarà sus vostra esquina;

- 65. Aparàs-vous, s'avès lou biai, Si noun, ieu demande pas mai, E vous desquilharai sans pena, Couma de lapins de garena. » Eurimaca intret en furou,
- 70. De veire que, per la douçou,
  Emb el li aviè pas res à faire.

   « Coussi, s'ou dis, aquel roudaire
  Creiriè de nous espaurugà?
  Venès, anen l'amalugà;
- 75. Aven nostres coutels de cassa;
  E couma! mancarian d'audaça!
  Sen fossa contre un ome soul,
  E n'i n bailaren soun sadoul. v
  L'espasa à la man s'avansava;
- 80. Mais lou rei, que lou remarcava,
  En li disent: « Ounte vas, bau? »
  Lou fai sautà couma un lebraut.
  Lou talos trantalha, se vira,
  Fai la cabriola, s'estira,
- 85. E tout mourissent, aquel miou
  Regasset d'iols que fasien pou.
  De fraiou lou paure Amfinome,
  Que dins lou founs era un bon ome,

Courrissiè couma una perdris,

- 90. Per veire de gagnà païs,
- Entremens que l'arc se mountava;
   Mais Telemaca l'esplava,
   E bravament, sans dire mot,
   Lou couet d'un cop de bilhot,
- 95. Ensenguet pioi sa jarratiera,
  Per anà vite à la palieira,
  Querre las armas que li aviè.
  Soun pera, entremens se teniè
  Sus la porta ounte l'esperava,
- 100. E, Dieu sap couma travalhava!

  Lous galants eroun desquilhats

  Couma se lous aviè dalhats,

  E, quand las flechas li manqueroun,

  Las autras armas arriveroun.
- Infourmet tout bas Agelus
  Ounte se teniè la cachota.
  Plusiurs de la banda pagnota
  Se li acousseroun au grand trot.
- 110. Ulissa, alarmat e capot,
  Cridet à soun fil: « Testa seca!
  Nous vai faire prene à la leca.
  Que noun barraves l'arsenal?
  Per ara sen ben à chival. »

Dis lou prince, e per sa lengada,
Eumea embe Filetius
An estacat Melanteus.»

Tout se passava dins la sala

- 120. D'una maniera fort brutala.

  Ulissa, en trin couma un perdut,
  Chaca cop tuava un goulut;
  Mais eroun tant, lous miserables,
  Que fasien d'esforts esfrouiables;
- 125. Sans Pallàs que se n'en melet,
  Aurien rëussit dins soun fet.
   « Ai! mardì, ses aquì, Deessa,
  Dis Ulissa, bon.... aiço pressa;
  Coumençave de couardà;
- 130. Mais, se me voulès ajudà,
  Dins miecha oura acaban lou resta
  Das ennemis qu'aven en testa. »
  Agelus, que, couma un butor,
  Preniè Minerva per Mentor,
- 135. Li dis: «Fasès una enjustiça, Se vous declaràs per Ulissa: Gardàs-vous ben d'aco d'aqui.... D'abor vesès que lou couqui, En nous cercant antau disputa,
- 140. Entrena soun fil dins sa chuta.

Vous atabé vous esquinan, Se vous levàs pas de davans; Faren be pire, à cops de bilha, Toumbaren sus vostra familha....»

- 145. Agelus antau parlet net
  E viret Pallàs d'un souflet.
  Ela, que contra soun usage,
  Sentiguet coire soun visage:
   « Oh! certa, li fai, vilaniè,
- 150. Fau que t'aprengue toun mestiè, E vautres regardàs-me faire, Autant lou fil couma lou paire, Veirès coussi venja Pallàs Un souflet pausat sus soun nas. »
- Creiriàs be que de la victouera
  Anavoun avedre la glouera?
  Crac!..., la Deesa se viret,
  E finament s'avaliguet.
- « Au diable! li cridet Ulissa, 160. Vous noun avès que de maliça;
- Lou bèu secous que nous dounas!»

  Lous princes, d'abor estounats,
  En vesent que s'era avalida,
  Lieroun tournà la partida,
- 165. E sus lou rei, qu'era surprés, Toumberoun toutes à la fes.

N'importa, nostre persounage

Perdet pourtant pas lou courage. - « Coussi, diguet tout en furou, 170. Minerva emporta un moustachou, Qu'a recassat à ma presença, E ieu n'en prendriei pas vengença!... Gara.... que n'en larde un parel!...» Lou qu'era lou pus proche d'el 175. Aget la bedena estripada; Soun fil crebet la d'Euriada; Lou matouès de Filetius. Trauquet aquela d'Elatus, E mestre Eumea, emb una lança, 180. De Pisandra enlastet la pansa. Lou batalhoun, espouventat, Se retranchet, per suretat, Jout las cadieiras e las taulas. Aquì, couma de cagaraulas, 185. Lous entendien be grumejà';

190. Blasset Telemaca à la man.

Mais n'ausavoun pas banejà 1.

Cepandant tournà s'escauferoun E, sans quità l'endrech ounte eroun, Un d'eles d'un croustet de pan,

Écumer. (F.) — 2 Montrer les cornes. (F.)

Un autre d'un grand cop de pipa (Seguet lou barbara Ctesipa Que faguet aquel cop de fol), Prend Eumea au coustat de l'iol, 195. E lou Judàs li lou crebava, Se, per malhur, el se virava. Ulissa dounc metet à bas, Tout badinant, Euridamàs; Soun fil tuet d'un cop de peira 200. Amfidoun jout una cadieira; Polima mouriguet camus De la man de Filetius, E lou brave Eumea à Ctesipa Paguet lou mountant de sa pipa: 205. — « Te, s'ou dis, raça de Caïn, Vai faire à l'enfer lou rabin! » Ulissa, que toujour picava, Tant n'en vesiè, tant n'ensucava, Alounguet lou fier Agelàs 210. D'un grand cop de ped sus lou nas. E Telemaca, un ipoucrita Que s'apelava Liocrita. Minerva moustret son boucliè, Adounc, per lou grand escaliè; 215. Tout cerquet de gagnà gagneira; Courrigueroun vers la palieira,

Per las cambras, per lous salouns, E jangoulavoun, lous poultrouns, Couma de chis, quand, à sa quoueta,

- Que li pica sus lous jarrets.

  Pertout avien pou d'estre pres;

  E, per counservà sa vidassa,

  Sans cessa chanjavoun de plaça;
- 225. Mais Ulissa e moussu soun fil, Armats chacun d'un bon fusil, Lous garigueroun de la febre Couma l'on garis una lebre.

As peds d'Ulissa, cepandant,

- 230. Liodes toumbet en plourant.

   « Grand mounarca, s'ou dis, pecaire!

  Ajàs pietat d'un devignaire,

  Qu'amai sieja dins vostre oustau,

  Noun yous a fach ni ben ni mau.
- 235. Disiei, per gagnà ma videta,
  Quauqua pichota messourgueta:
  Fau be vieure de soun mestiè;
  Mais vous jure, fouè de sourciè,
  Que n'ai pas fach gis de daumage.
- 240. Se vouliàs d'aqueste carnage,M'esemtà caritablament,M'oublijariàs sensiblament. »

Lou rei li respond: — « Miserable, Mentissès, aqui, couma un diable.

- 245. Es tus, truchamant dau demoun, Qu'as causat tout lou carilhoun; Ma femna, que vouliès seduire. De ta mort crebarà dau rire. » Aquì dessus lou fendeguet,
- Femius, paure vieulounaire,
  Ou'a la cour noun pareissie gaire
  Que per jough de menuets,
  E fa dansa lous galinets,
- 255. Crenissiè, per pris de sa arpa, De faire lou saut de l'escarpa, Espinchava de tout coustat; Mais era ben embarrassat; Car, de quinte que se viressa,
- 260. Noun vesiè ren que l'amusessa. Li aviè ben, dins un recantou, Un gros Jupiter de loutou, Qu'à sa plaça quauqu'imbecile Auriè belèu pres per asile;
- 265. Mais el se li fisava pas.

  S'avanse: dounc, au pichot pas,

  Vers Ulissa d'un er moudeste:

  La pòu lou rendiè tant ouneste,

Tant' umble, tant estoumacat,

- 270. Que lou rei n'en seguet toucat!

  Lachet, per aqui quauqua craca,

  E, proutejat de Telemaca,

  Lou paure diable n'escapet.

  Lou jouine prince li diguet:
- 275. « Anas, moun pera vous perdouna,
  Nous jougarés la farandouna,
  Ou quicon mai, dins lou besoun.
  Fau pas tuà noun plus Medoun....»
  Medoun que, pendent la derouta,
- 280. S'era ficat dins una bouta,
  Cridet, avans d'estre sourtit:
   « Gramecis, e Dieu sié benit.
  Ah! mestre, quinta estiblassada
  Avès bailat à l'assemblada!»
- 285. Lou valhant Ulissa riguet
  De ce que Medoun li diguet;
  Mais, lou cor plen de soun injura,
  Nistejava couma una fura,
  Per veire se quauque goulut
- 290. Entacon era rescoundut;
  N'en trouvet pas un soul en vida,
  E l'ama touta rejouïda,
  Trioumfet couma un bracouniè,
  Quand a tuat fossa gibiè.

295. Adounc diguet au viel Eumea:

— « Fasès-me descendre Euriclea,
Vole entendre ce que dirà
De la defeta que veirà ».
La vielha seguet esfraiada,
300. Quand veget aquela bugada.

Soo. Quand veget aquela bugada.

Soun redoutable nourrissoun,
Enfurenat couma un lioun,
L'iol indinnat couma una anchoia,
Roudava à l'entour de sa proia;

305. Soun visage era tout soulhat,

Tout soun cors era barboulhat

De sang, de gruma e de poussieira.

— « Eh be, li dis, manifassieira,

Regarda se lous ai mancats.....

310. Avansa-te, mais rigues pas;

Quand un couqui pot pas pus nuire,
Fau pas plourà, mais fau pas rire,
Quouequ'à tout ben counsiderà,
Vaudriè mai rire que plourà .»

315. — « Aça, diguet à sa nourriça, Per acabà de fa justiça, Vai-me querre las vilaniès Qu'aimavoun aquestes ouvriès. » Las garçounieiras davaleroun.

320. Ulissa, entre que s'aproucheroun:

— « Chastas Arianas, li dis, Vejaqui vostres Amadis; Pioi que lous aimas tant, couquinas, Cargas-lous sus vostras esquinas,

- 325. E, sans fougnà, pourtàs-me-lous, Ailaval proche dau grand pous. » Aquelas putas ou fagueroun, Amai, per moia, se ploureroun; Auriàs dich, à soun er seren,
- 330. Qu'eroun de persounas de ben Li a pas res qu'age tant de rusa, Ni que siè pus dur qu'una gusa; Fan ce que voloun de soun cors.

Quand ageroun levat lous morts,

335. E que la sala, netejada,
Seguet proprament ensengada,
Ulissa se debarboulhet,
S'espousset, e se miralhet.

Cepandant nostras garçounieiras

- 340. Esperavoun las estrivieiras;
  El las voulie fa fustija,
  Mais soun fil las faguet penja.
  Aget resoun: puta penjada
  Es per pus loung tems courrijada;
- 345. E la jinjola es un abus. Lou traite de Melanteus

Seguet pendut de couteria,
E finiguet la tragedia.
Era estacat dins un graniè.
350. Eumea emb un rasouer qu'aviè
Li toundet la barba, las selhas,
Lou nas amai las dos aurelhas;
E Melantea, antau rasat,
Mouriguet ben adounisat.

FIN DU VINGT-DEUXIÈME LIVRE.



. • 



### ODYSSÉE D'HOMÈRE

En vers burlesques patois.

SOMMAIRE DU VINGT-TROISIÈME LIVRE.

Euriclée apprend à Pénélope le retour et la victoire d'Ulysse.

— Doutes de la reine. — Elle descend. — Abord, manières fines de Pénélope et du monarque. — Celui-ci prédit sa mort. — Sa femme s'en console par une raison fort simple. — Ulysse va trouver Laërte et traverse la ville sans être aperçu.





# ODISSEA D'OUMERA

LIBRE VINT-E-TRESIEME.

uriclea au liech de madama, Escala e crida: — « Ma chera ama, Levàs-vous, qu'Ulissa es aicis; Amai ben galhard, Dieu mercis! Car a mes en capiloutada Das princes la troupa afamada. » La reina, que n'ou cresiè pas, Li diguet: — « Saique repapiàs Ou, per una femna dins l'age, 10. Entendès mau lou badinage:

5.

Per graça, tiràs vous en lai; Couma belèu m'endourmirai. » — « Coussi! repliquet la nourriça, Vous jure qu'es fort ben Ulissa. 15. Lou paure que vous parlet ier, Ou deviàs be veire à soun er. » La reina, au serment de la fada Li diguet, emb una brassada: - α Vous estrangle se me troumpàs; 20. Au noum dau ciel, mentigués pas! Quand creiriei lou retour d'Ulissa, Seriè-ti poussible, nourriça, Que tout soul agesse ensucat D'enemis un diable cargat?» - « Madama, respoundet la vielha, 25. Ieu l'ai vista aquela mervelha: N'ai trouvat alin per lou sòu, De gros moulous que fasien pou. . La bassa-cour n'es touta plena.....» Incredulla, amai de la mena, 30. Penelopa doutava un pau Qu'aco seguessa anat antau. — « Un Dieu, s'ou dis, m'a fach justiça; Vous ses troumpada, es pas Ulissa, Car soui segura qu'es crebat, 35. Dins quauque païs escartat.»

— « De que diantre disès, piniastra?
Pardi! ses ben acariastra!
Ajustet la vielha sans dent,
Es ailavel que vous atend;

- 40. E, s'anfin me voulès pas creire,
  Vous coustarà pas mai d'ou veire;
  Savès be la marca qu'aviè
  Aquel cher ome à son tessiè?
  Eh be, l'a.... se soui messourgueira,
- 45. Me poudès metre à la carrieira. »

   «Lous secrets dau ciel, moun enfant,
  Disiè la reina en se couifant,
  Soun presque toutes d'una mena,
  Que se devignoun pas sans pena;
- 50. Cepandant ieu davalarai,
  E tout ara esaminarai
  S'aquel qu'a tant ben fach pouliça,
  Couma dises, es moun Ulissa.»
  Quand seguet presta davalet,
- 55. Lou counouget e recueulet.

  Lou rei, qu'atendiè qu'avansessa,

  Fort estounat que recueulessa,

  S'imaginet de la sounà.

  La reina, per l'esaminà,
- 60. Encara mai se recueulava : Lou mounarca se desoulava ;

Talament qu'anfin toutes dous S'en aneroun de recueulous.

- «Veja lous souverens d'Itaca,

- 65. Diguet, en risent, Telemaca,
  Couma entre marit e mouliè
  Se fan tendrament amitiè!
  E coussi! vous, que ses ma mera,
  Counouissès pas qu'aco's moun pera?
- 70. Ieu, qu'à pena soui soun enfant, L'ai recounougut sus lou champ... Mardì, fagàs pas tant la fina; L'on vei trop ben à vostra mina, Que ses lassa de recueulà.
- 75. Anen.... venès vous acoulà .»
  Ni per aquela, la coumaire
  N'en saviè trop per acò faire;
  E soun ome, qu'era un futat,
  Trouvet soun refus delicat.
- 80. Entremens fagueroun tapage,
  Per tenì secret lou carnage;
  E Telemaca, un pau counfus,
  Diguet à l'aubois Femius:
- « Anen, dona-nous la chamada
- 85. Pus rede qu'à l'acoustumada,E pioi que moun pera es vengut,Bufa-me aqui couma un perdut.»

Lous illotas que l'ausigueroun, Couma eles se divertigueroun,

- 90. En disent; « Bon, n'i'a prou d'ausit;
  A la fin la reina a causit.»
  Minerva adounc levet la crassa
  Qu'era apegada sus la faça
  De l'emperur Itacien
- 95. E li rendet soun er ancien. Li faguet chanjà de culota, De camisa, de reguingota, De debasses e de souliès, Jout la rampa das escaliès.
- 100. Aviè la mina tant rouiala

  Que, quand revenguet dins la sala,

  La reina recueulet pas pus:

  «Oh!.... per ara, ou vese, sies tus....»

  Tout disent acò, la princessa
- 105. Li temouegnet tant de tendressa, L'embrasset emb tant de furou, Lou sarret embe tant d'ardou, Que l'assistança s'estounava De l'er afamat que li anava.
- 110. « Perdouna-me, sou li disiè,

  Moun ome!.... e quau te counouissiè?

  Quau cresiè mema que venguesses?

  Aviei pòu que noun m'arrapesses.

» Ah! s'Elena era estada antau,

- N'aurian pas soufrit tant de pertas,
  De laguis, d'afrounts e d'alertas.
  Aicl, couma de benurous,
  Aurian fadejat toutes dous,
- 120. Noun pas que s'es touta estrassada, La jouinessa qu'aven passada! » Tout li tenent aquel discours, Pamens lou sarrava toujour; Antau las gents quand fan naufrage,
- Restoun à la corda arrapats,
  Amai se vejoun escapats.
  Pallàs s'en anet sus la bruna
  Pregà sa parenta la luna
- 130. De menà douçament soun char, Per que se levessoun pus tard, E qu'après una longa absença Faguessoun tournà counouissença. Qu'era bona aquela Pallàs!
- La femna enfila sas enjuras,
  E lou marit sas avanturas.
  Omera tourna las redis;
  Mais quand l'on sap de que s'agis,

- 140. E qu'una sourneta es countada, Qu'es besoun que siè repetada? Per ieu, lou vau laissà barjà, Prene la courcha, e me pausà Jusca qu'aquel divin Oumera
- I45. Entemena una autra matiera.....
  Ulissa diguet à la fin,
  Que Tiresiàs lou devin,
  Li aviè dich qu'après soun vouiage
  Vieuriè, juscas emb un grand age,
- 150. Tranquillament dins soun oustau; Mais qu'anfin, en fasent lou bau, Un jour, per un tret de jouinessa, Se negariè dins sa vielhessa.

La bona reina de l'ausi

- 155. Prenguet talament de plesi
  Que dejà lou som l'arrapava:
  Fort tendrament s'estiralhava,
  En disent: « Benigan lou ciel
  De ce qu'au mens devendrés viel.
- 160. Pioi, li aurà pas un grand daumage, Amai vous negués d'aquel age.»
  Aqui dessus lou jour venguet,
  E lou mounarca se levet.
- « Aça, s'ou dis, moun amigueta,
- 165. Tenès-vous aqui ben caudeta,

Dins lou tems que m'en anarai Esamina couma tout vai. Fau be garanti ma carcassa Das furous de la poupulaça;

- 170. E, se ven à se revoultà,

  De força ou de grat, l'arrestà.

  Me vau rendre aco de Laerta:

  S'aquì nous dounoun quauqu'alerta,

  Per la douçou l'apaisaren,
- 175. Ou tournà nous penchinaren.

  Me farai pagà la despensa

  Que m'an fach pendent moun absença;

  E pioi couma viels amourous,

  Fringaren aicì toutes dous.»
- 180. Sas gents adounc se revelheroun,
  E dins sa cambra se renderoun
  Armats couma de miquelets.
  Afin que risquessoun pas res,
  Pallàs lous sallet d'un nuage,
- 185. E, dejout aquel acatage 2,

  Toutes quatre passeroun lis

  Au mitan de sous ennemis.

FIN DU VINGT-TROISIÈME LIVRE.

Les investit (F.). — 2 Couverture (F.).



### ODYSSÉE D'HOMÈRE

En vers burlesques patois.

#### SOMMAIRE DU VINGT-QUATRIÈME ET DERNIER LIVRE.

Digression sur Homère. — Les ombres des prétendants s'en vont au diable. - Entretien d'Achille et d'Agamemnon. - Épisode sur la mort d'Achille. - Ulysse trouve son père. -- Leur entretien. -- Mensonges d'Ulysse. -- Discours de Laërte. — Nouveaux mensonges de son fils. — Dou-leur, joie, courage et bravades de Laërte. — Il parle français et fait assaut contre un dindon. - Troubles à l'occasion des prétendants. - Descente de la police sur les lieux. — Verbal, ligues, complots émeutes, séditions. — Avis sages et inutiles. — Jupiter lorgne l'île d'Ithaque. - Minerve le prend au menton et l'interroge sur les affaires de ce pays-là. - Jupiter la rassure. - Elle descend en Ithaque. - Intrépidité d'Ulysse, de Laërte et de Télémaque. - Laërte engage une affaire - Les exploits. -Ceax du fils et du petit-fils. — Minerve parle. — Les ennemis fuient. — Les vainqueurs les poursuivent. — Pallas les apaise et rétablit une paix durable.



		•		
	t s			
			: !	



## ODISSEA D'OUMERA

LIBRE VINT-E-QUATRIEME.

Ma foue, savie pas pus ounte era,
Car per dire quicon de nou,
Bat la campagna tant que vou. Que faire? Lou cau laissà dire, E, quand seriè pas que per rire, Pioi que l'aven seguit per tout, L'acoumpagnaren jusqu'au bout. S'agis dounc qu'emb una bagueta . 10. Que li servissiè d'espousseta,

5.

Mercura, au cami de l'enfer, Menava aco de Lucifer Las amas qu'au palai d'Ulissa Eroun passadas per pouliça.

- 15. Davans el, dins l'ouscuritat,
  En marchant, fasien lou sabat.
  A bel ime tant voultigeroun,
  Que sus lou souer, s'agandigueroun
  Dins un pous, qu'es counougut
- 20. Couma l'illa de Lilliput.
  Lous sounges e la metafora
  Disoun que li fan sa demora,
  E que lou sourel deroutat,
  Se vira d'un autre coustat.
- 25. D'aqui las amas davaleroun Dins un armàs ounte trouveroun Achila, Ajax, Agamemnoun, Aloungats darriès un bouissoun.

Agamemnoun, la mina trista,
30. Disiè cent soutisas d'Egista;
Mais Achila, que n'en risiè:

— « N'es pas vostra mort, li disiè,
Noun, n'es pas ela que m'estouna,
Car l'on sap que li a pas persouna

35. Que noun li passe, tot ou tard; Mais, qu'un rei, qu'era gras à lard, Que se regalava à cor joia, Dins lou tems que nautres à Troia Nous batian à chaca moument,

- 40. Aja perit tant paurament, Aco me boulega la bila.»
  - « Ah! grand e generous Achila, Avès, per ma fouè, ben resoun. Li respoundet Agamemnoun.
- 45. Per lou pus grand rei de la Greça, Soui mort couma un rede Jan Fessa; Plet-à-Dieu seguesse crebat, Couma vous dins quauque coumbat! Auriei partajat vostra glouera,
- 50. E brilhat un pau dins l'istouera.

  » Grands dieus! que de cops se dounet,
  Quand Paris vous destalounet,
  Sans una diantra de poussieira,
  Que nous oufusquet la visieira,
- 55. Lous Trouiens eroun engrunats;
  Mais, quand las gents soun embourgnats,
  Digàs-me de que podoun faire?
  Lou pus court es de s'anà jaire,
  E de regagnà soun oustau,
- 60. Amai certa encara grand gau; Lou mau d'iols es un mau terrible, E li a pas res de pus sensible.

» Cepandant nous ajudet fort Per milhou plourà vostra mort.

- 65. Faliè veire la plouradissa!

  Li a pas en Greça una teulissa!

  Que raje pus rede quand plòu.

  L'armada pourtava lou dòu;

  E toutes l'on se desoulava:
- 70. La mar ela mema bramava,
  Las balenas se planissien!
  Quau sap, elàs! ce que disien!
  Mais una vouès pus forta encara
  Aumentet tant lou tintamara
- 75. Que toutes la pou nous prenguet, E vite l'on s'enfugiguet.
  - » Nestor, savant couma un ouracle, Nous cridava: — « Aiço's un miracle, Venès, es madama Tetis;
- 80. La counouissès pas à sous cris?.....

  Ven aici plourà couma nautres;

  Pagnotas, ben d'ounour per vautres.»

  » De fet, la Deessa avanset,

  E la musica coumencet,
- 85. Las Nereïdas entouneroun, Las nou Musas psalmoudieroun,

<sup>1</sup> Couvert en tuiles (F.).

E, fort tendrament, Apoulloun Gratet un er sus soun vieuloun. Enfin li aget pas dieu ni diable,

- 90. Qu'emb aquel councert pitouiable, Noun venguesse prene sa part, Ou per un tiers ou per un quart, Tant au ciel, couma sus la terra, Se fai cas d'un ome de guerra!
- 95. » A la fin vostre enterrament Se faguet magnificament; Vers la plaja, au bout d'una alea, Vous dresseren un mosolea, Que tout ome que lou veirà
- Savès pas de que n'en dirà.
  » Tetis, per prouvà sa tristessa,
  Li faguet dansà la jouinessa
  E regalet d'un bel moutou
  Lous qu'ou fagueroun lou milhou.
- 105. » Antau ses partit de la terra
  Embe lous ounous de la guerra;
  Mais ieu çai soui, couma un cougueu,
  Vengut embe la palha au cueu.»
  Dau tems qu'Agamemnoun parlava,
- 110. La troupa galavarda intrava, E, sus lou champ, Agamemnouñ Recounouguet Amfimedoun.

- »Oh! oh! s'ou dis, quinte naufrage Vous counduis aich d'aquel age?

- E lou pus viel n'a pas trente ans!

  Countàs-nous, per quinte avantura,

  Çai ses venguts embe Mercura»?

  Amfimedoun li respoundet:
- Tout escàs davalan d'Itaca
  D'ounte Ulissa, embe Telemaca,
  En posta nous an fach parti;
  Amai, vesès, per pas menti,
- 125. Nous an pas fach una enjustiça; Car, pendent l'absença d'Ulissa, Li metian tout soun ben davans, Li voulian tuà soun enfant, E cajoulaven Penelopa
- Vesès be qu'avian tout lou tort.

  "Ulissa, que l'on cresiè mort,
  Venguet un jour fach couma un diable;
  Lou prenguèn per un miserable,
- Que lous arpanta e li mouris,
  Sans que degus li prengue garda.

  » Mais nous surprend, e nous enlarda

Tant lestament que sen venguts

140. Sans nous n'estre recounouguts.

Auriàs dich, ma fouè, que dalhava,

De la façoun que s'entanchava.

Nostres cadavres amoundaut

Rebaloun dedins soun oustau;

- 145. E degus noun sap l'avantura
  Per li dounà la sepultura. 

   « Qu'Ulissa es urous, cap de noun!
  Diguet lou grand Agamemnoun,
  D'avedre una femna fidela.
- 150. Sa glouera vai estre immourtela;
  Tant qu'ailamount se mentirà,
  Touta femna se vantarà
  De semblà mas de Penelopa.
  Mais li aurà pas una salopa,
- 155. Per tant descridada que siè, Quand justament la traita auriè Voulat cent fes per la fenestra, Que diga sembla Clitemnestra. N'aurien fach cincanta fes mai
- 160. Que diran toujour: N'es pas vrai. »
   Au founs de sas cavernas soumbras,
   Antau caquetavoun las oumbras;
   Mais la broda las sesiguet,
   E chacuna s'endourmiguet.

165. Lou rei d'Itaca pus alerta S'en anet aco de Laerta, Que l'absença de soun cher fil Rounjava couma lou rouvil '.

Dins la tristessa, lou paure ome

- 170. Era vengut tant econome Que manjava aqui tout soulet; N'aviè pas gardat qu'un varlet, Per li counduire sous afaires, E dous autres escoubilhaires,
- 175. Que li acampavoun lou fumiè D'un jardin de rode qu'aviè: El lou plantava, l'arrousava, E, quand era dich, lou fouchava. Ulissa intra dins lou jardin,
- 180. E dis à moussu lou daufin, Que restessa à l'endrech ounte era ; Qu'el vouliè veire se soun pera Encara lou counouisseriè. Remetet las armas qu'aviè
- 185. Entre las mans de soun escorta, E lous quitet davans la porta. Lou trouvet darriès un clapàs, Que triava de gramenàs,

<sup>1</sup> Rouille (F)

Ulissa lou counsiderava,

190. E de lou veire antau plourava.

Era, pecaire! tout mandiant,

E viel course lou pera Adam

E viel couma lou pera Adam. S'agessa seguit sa pensada,

Li auriè be fach una brassada;

195. Mais lou feble de tout ablur Es de faire lou batelur.

> El, couma se de ren noun era, S'aprocha de moussu soun pera, E li dis d'un toun familiè:

- 200. « Dieu vous lou done, jardiniè;
  Se pot dire à vostre avantage,
  Que travalhàs ben per vostre age;
  Car aici vous manca pas fruit,
  Amai, vese qu'es ben nourrit;
- 205. Mais, ma fouè, per vostra persouna, Es dins un estat que m'estouna. Lou jardiniè d'un espitau, Escusàs se vous parle antau, Pus deguenilhat noun pot estre.
- 210. Devès avedre un paure mestre.

  N'ou meritàs pas cepandant;
  Car, dins vous li a quicon de grand.

  Digàs-me se soui dins Itaca?

  Me doute fort que d'una craca,

215. Un ome qu'a l'er d'un brullat,

Tout passant, m'aurà regalat.

»Voudriei be que vous me dounesses,

Supausat que lou counouguesses,

De nouvelas d'un Itacien

- 220. Qu'es istat moun amic ancien.

  L'aimave que se pot pas creire....

  Li a cinq ans que venguet me veire;

  Li dounere quatre mantels,

  Una douchena de capels,
- 225. Un bel saucissot de Boulougna, Tres pichès de vin de Bourgougna, Douge francs, en bels escuts nous, Amai set peças de dous sous.
  - » Reveniè dau siege de Troia,
- 230. E lou vesiàs nadà de joia,
  En se flatant que reveiriè
  Soun paure pera, se viviè,
  Me lou noumet..... crese..... Laerta;
  Mais, saique, es ben en pura perta
- 235. Que per el me soui destourbat;
  Entacon, pecaire l es crebat.»
   «Vous an pas countat ges de craca,
  Es ben vrai que ses en Itaca,
  E vostre amic es franc e net
- 240. Lou fil de vostre umble varlet.

Li a mai de vint ans qu'es defora;
E, saique, es mort, que tant demora....
» Ah! moun cher, s'era revengut,
Que de presents n'auriàs agut!

245. Mais, vous, dins quinte païs eres,
Quand me disès que lou vegeres?
D'ounte ses? partirès-ti lèu?
Ounte avès mes vostre vaissèu?
Avès fossa gents d'equipage?

250. Couma avès fa vostre vouiage?»

- « Soui, li dis Ulissa tout bas, Fil d'Alfidanta, d'Alibàs, E m'apele Gregouera Eperta, Au service dau grand Laerta.

255. Ma barca aviè pres un escart E çai soui couma per asard. Per ce qu'es de l'amic Ulissa, Fau qu'au ciel l'ajoun pres en tissa, Car quand d'Alibàs partiguet

260. Un devignaire li diguet

Que çai seriè dins la semana,

Se menava ben sa tartana;

Mais, souvent moussu lou destin

Fai menti moussu lou devin.»

265. La vielha nouvela d'Eperta Viret la testa au bon Laerta. Soun mourre s'alounguet d'un pan, Se sousletet de chaca man, E, d'un gros pougnat de poussieira,

270. Fretet soun antica crinieira.

— « Anen, s'ou dis, moun fil es mort, Dieu das guindoulas, quinte sort!» Soun fil, temouen de sa tristessa, S'aprouchet d'el embe tendressa:

275. — « Ai! veses, s'ou dis, moun pairàs, Me toca, amai me counoui pas! Coussi, paure, vint ans d'absença Vous fan perdre la counouissença? Ah be! certa, aqui moun flouroun;

280. Vejan s'ara dirés de noun.

Counsultàs aquì moun grimouera,

E rapelàs vostra memouera.

Vesès be que soui vostre fil:

Ier au vespre à cops de fusil,

285. Tuere la banda fouirousa

Que de ma femna era amourousa. »

Laerta adounc lou counouguet,

Entre sous brasses lou prenguet;

Mais lou paure ome trantalhava¹,

290. E de la joia s'emboulhava

<sup>1</sup> Tremblotait.

- « Ses justes, s'ou dis, dieus dau Ciel, De m'avedre fach veni viel Per aquesta bona fourtuna; Mais quau sap se, dins la rancuna,
- 295. Nostres couquis d'Itaciens,
  Embe lous Cefalouniciens,
  Nous vendran pas cercà rampogna?»
   « Chut, taisàs-vous, vielha sansogna,
  Li diguet Ulissa umblament;
- 300. Venès à vostre apartament, Li parlaren d'aquel afaire, E veiren ce qu'aven à faire. » Laerta, entre que li arrivet, Pauset sous patins, se lavet,
- 305. Se dounet quatre cops de penche, Carguet soun capel dau dimenche, Pioi danset davans lou miral, Couma s'era istat dins un bal, Tant d'un cher enfant qu'adourava
- Amai disoun que lou grisoun
  N'aviè pas michanta façoun;
  Se teniè garbat couma un mouine,
  Auriàs presque dich qu'era jouine:
- 315. Oumera, que lou counouissiè, Dis que soun fil mema ou cresiè,

De tant escarrabilhat qu'era.

— «Baste, diguet tout en coulera,
Baste me seguesse trouvat

- 3 20. Embe tus ier dins lou coumbat!

  Vous auriei sourtit ma rapieira,

  Qu'es aquì, jout la cheminieira,

  E sans demandà qui va là.....

  Vous li auriei dich, partez de là...
- 325. Tierce, quarte, la tête haute...
  Allons, pare-moi cette botte....
  A toi, faquin, jarret tendu...
  De là,,.. ha!... te voilà tondu!
  »Oh! s'agesses vist, à Nerita,
- 330. Quand faguere gagnà guerita As paures Cefalouniciens! Demandàs as Itaciens Se moun espasa era bercada. Ier au souer, à l'estiblassada,
- 335. Soui segu qu'aurias pres plesi
  De la veire encarà lusi;
  Degus noun n'en plouret qu'Eumea ».
  Dins aquel tems la Renoumea,
  Que courris toujour couma un fum,
- 340. E que bruca fauta de lum, Aviè publiat dins la vila Que d'una maniera encivila,

Lou mounarca s'era venjat Das gouluts que l'avien grujat.

- 345. Lous consous, embe la pouliça, Fan sa descenta enco d'Ulissa E lou grefiè, tout en varal, Li dressa un grand proucès-verbal. La liga de la poupulaça,
- 350. Que pertout es una bestiassa,
  Lous seguiguet, se desoulet
  E dins sa foulié desparlet.
  Entarravoun lous calignaires
  Couma s'eroun istats sous fraires.
- 355. Lou brutalàs Epileüs,
  Dinne pera d'Antinoüs,
  N'arengava touta una troupa
  Que preniè fioc couma d'estoupa;
  Amai, segu, lou viel grigou
- 360. N'era pas un grand ouratou.

   «Fau-ti, s'ou disiè, que d'Ulissa
  Esprouven toujour l'enjustica?
  Savès be que, quand s'en anet,
  Lou coursari nous enmenet,
- 365. Tant per força que per finessa, Touta la flou de la jouinessa. Cepandant, quand es revengut, De que diable nous a rendut?

Ou vesès, de bons cops de bilha

370. Sus nostres enfants de familha.
E soufririàs aquel afrount
De la part d'aquel vagabound?
Noun, mardi... prenès-me de peiras,
E, se lou trouvàs per carrieiras,

375. Rede, enfants, ensucas-me-lou
Sans pietat dins quauque cantou. »
Amai seguessa pas poulida,
L'arenga seguet aplaudida;
Lous avie toutes esmouguts.

380. Pioi Medoun, embe Femius,

Que surprenien la populaça

D'avedre sauvat sa carcassa,

Li digueroun: — « Escoutàs-nous:

Sen istats temouens toutes dous

385. Qu'una Deessa deguisada Presidava à l'estiblassada; Prenès garda à ce que farés: Se l'irritàs, ou pagarés. Lou grand, lou savant Alitersa

390. Sourtis adounc d'una traversa
E crida: — « Escoutàs la resoun
De Femius e de Medoun:
Lous princes que lou ruïnavoun,
Couma de groumands se damnavoun.

395. Quant de fes ieu vous ai predich E sajament dich e redich: « Prenès garda, aquela canalha »S'avugla e fai pas res que valha. »Quauque jour Ulissa vendrà, 400. »Es un rusat, lous surprendrà »E, ben pus cher que l'on noun pensa, »Se farà pagà sa despensa; »Vautres, seloun ce que farés, »Vous anounce qu'ou pagarés. » Tout aco seguet inutille, 405. Lioga de demourà tranquille, Lou pople, sot couma savès, Se declara per Epitès, Que lous mena aco de Laerta, 410. E vejaquì la guerra ouverta. Pallàs, qu'era toujour en l'er, Vouguet saupre de Jupiter Qu'adounc lourgnava vers la terra, De que disiè d'aquela guerra,

415. S'Ulissa li trioumfariè

420. Tout ara te la virarai,

Ou se soun pople lou batriè.

— « Avai, li diguet el, bauchassa,

Saves pas que la poupulaça

Prend fioc sans saupre perqu'ou fai

Que serà touta vergougnousa D'estre estada antau capignousa '. La coulera li passarà, · Ulissa la tapinarà,

- 425. Pioi la tratarà couma un pera
  E, couma se de ren noun era,
  Veiràs renouvelà la pes
  Entre lou prince e lous sujets,
  Qu'el n'i'n baile una descrusida;
- 430. Emb acò la guerra es finida. »
  Minerva lou poutounejet.
  E tout de suita davalet,
  Per veire s'Ulissa era alerta.
  Lou rencountret embe Laerta
- 435. Que, soustengut de soun varlet, Lou seguissiè couma un barbet; Ela se met de la partida.

Ulissa, en vesent Tritounida<sup>2</sup>:
—«Anen, bon, diguet à soun fil,

440. Sen lous pus forts...» — «Ensin-souet-il,
Li respond soun clerc Telemaca,
Mais vole fa veire en Itaca
Que lou sang d'ounte soui sourtit
Dins ieu s'es pas abastardit.»

<sup>1</sup> Querelleuse. (F.) - 2 Minerve. (F.)

445. — « Dieus dau Ciel, se metet à dire Laerta en s'espatant dau rire, Que vostre sent noum siè louat! Vese, davans d'estre couat, Que moun pichot fil e soun paire

450. An un pau de moun saupre-faire.

Courage, mous braves enfants

Fau sourti d'aici trioumfants. »

Tout disent aco trantalhava!.

Minerya que se recreava

Minerva, que se recreava

455. D'entendre nostre viel crebat, Li diguet d'ouvri lou coumbat E d'esfraià touta l'armada, En tirant sus la moulounada.

Laerta, pecaire! ou faguet;

- 460. De l'esfort, es vrai, s'alounguet
  E s'abimet touta la faça;
  Mais pourtant faguet bona cassa,
  Car Epitès, au grand galop,
  Toumbet en enfer d'aquel cop.
- 465. Ulissa e lou fier Telemaca
  Esquinavoun las gents d'Itaca
  Que li moustreroun lou darriès;
  E petassau sus mous ouvries.

<sup>1</sup> Il chancellait (F.).

Mais das arts la chasta Deessa, 470. Afin que la pes se faguessa, Cridet à l'armada: — « Estàs siaus, Que chacun marche à soun oustau, Autrament... » Aquela menaça Esfraiet tant la populaça,

475. Que fugissien couma se deu,
Chacun en disent: — « N'es pas ieu. »
Couma un mouisset s'elança e voula
Sus de pinsards que trova en foula,
Ulissa lous acoutiguet

480. E tout aco s'avaliguet.

— « Mouderàs-vous, valhant Ulissa,
Diguet la Deessa proupiça,
E tratés pas en enemis
Lous apuis de vostre païs »

485. Lou rei, plen de recounouissença,
Li oubeïguet sans resistença.
Minerva establiguet la pes
Entre lou prince e lous sujets;
E Laerta, embe sous besicles,
490. N'en vouguet sinnà lous articles.

FIN DU VINGT-QUATRIÈME ET DERNIER LIVRE.



LOU SIEGE
DE CADAROUSSA

į 



# DE CADAROUSSA

### PREMIÈ CANT

Rasclat, en despiech d'Apoulloun,

A la sourdina e sans maliça,

La glouera dau famous Ulissa,

Ioi, sus un sujet pus nouvel,

Embe l'assistança dau Ciel,

Infatigable vieulounaire,

Vole ensajà moun saupre-faire.

Musa, se m'ajudes un pau,

10. La besougna anarà pas mau.

Anen, vielha Nimfa, courage! S'agls de faire un pau tapage. E quinta femna n'aima pas Lou carilhoun e lou tracàs?

- La coulera, lou bruch, las armas;
  E qu'un siege das pus poulits
  Coumplete lou rebaladis.
  Ah! se semblava lou de Troia!
- 20. Poudès me dire quinta joia!

  Mais lous Grecs eroun de mutins
  D'autre pèu que lous Coumtadins;
  E lous Ectors de Cadaroussa
  Avien pas d'Achiles en troussa.
- 25. Tout restet entiè dins l'endrech; Cependant li fasiè pas frech. Veni, ma mìa, e fagan veire As gents que n'ou voloun pas creire Que lous petàchous d'Avignoun
- 30. Jogoun pas toujour de guignoun.
  Es vrai qu'à nostre Rei de França,
  D'abor qu'emb eles intra en dansa,
  Au pus vite portoun sas claus
  Per prevenì lous petassaus;
- 35. An resoun : per aquela adressa,La pòu servis de poulitessa ;

E lou Prince, que s'en souven, Prend be las claus, mais li las rend. Louis garda pas la coulera

40. Contra una tant bona maniera, E ten aquel puple esfraiat Quite per un *Exaudiat*.

Mais qu'una michanta vilota, Pas pus granda qu'una poutota,

- 45. Creja de lous reduire antau!
  O fiera granoulha! estàs-siau:
  Avès bèu vous couflà la pansa,
  Un pichot bourg n'es pas la França.
  Vous flatàs de trop, si vous plet;
- 50. Fagan-z-ou veire: aicì lou fet.

  Dins Avignoun, una famina
  Passava tout per l'estamina
  E li teniè lou cueu destrech
  As mouines mema de l'endrech.
- 55. Jujàs se, dins aquela festa, Li aviè grand traval per lou resta. Tout escàs lou Vice-Legat Li digerava après soupat, El que davans noun s'embralhava
- 60. Que lou moument que s'ataulava, E que, quand aco lou preniè, Tout manjant anava e veniè.

Atabé sa pansa benida S'era presque touta avalida.

- 65. Dins la vila, en gis de cantoun,
  Pecaire! n'era pas besoun
  De metre en grossas escrituras:
  —« Qu'AICÌ SE FAGA PAS D'OURDURAS.»
  Tout era net couma la man,
- 70. Fauta de pitança e de pan.
   Lous bourgés, secs couma de cieure,
   Eroun pas pourtant las de vieure;
   Car avien prou bon apetis,
   Amai seguessoun mau nourrits:
- 75. N'i aviè, que per sa nourritura, Metien sous souliès en fritura. Lous riches manjavoun de cats, Lous paures cassavoun de rats; Anfin, dins aquela tempesta,
- 80. Chacun jougava de soun resta.
  Noun vesiàs, dins aquel peïs,
  Que de visages estequits.
  Las femnas, de coulou d'escarpas,
  E qu'eroun tout iols ou tout arpas,
- 85. Moustravoun de pels de tambour Qu'au travès se vesiè lou jour. Lous omes, pus magres encara, Dounavoun d'er à fu Lasara,

E lou mendre vent que fasiè

90. Lous passejava ounte vouliè. L'on vesiè pas pus per carrieiras,

Ni cousiniès, ni cousinieiras, Vendre de lard, ploumà d'aucels E faire amoulà sous coutels.

- 95. Lous canounges, que d'ourdinari Soun pus gras que lou necessari, Chaca jour, fauta de fricot, Vesien descouflà soun barbot; Una pelouira li penjava
- 100. Que certa ben lous aflijava;
  De loups, la sounalha au coulet,
  N'aurien pas un er pus mouquet.

Lous quatre ordres de la besaça Prechavoun be per la fricassa,

- 105. Mais la fam de sous auditous Aviè tapat lous ausidous. Ventre afamat es sans aurelhas. Chacun recatava sas pelhas;
- Sans coumtà qu'en bramant antau 110. N'avien pas l'er lou pus malaut.

Cependant dins aquela vila Tant fasien e juna e vigila, Que tout seriè mort à la fes Sans l'avantura que veirés.

- Oue veniè d'arrivà de blat
  Dins una vila dau Coumtat;
  Vite n'en porta la nouvela:
- 120. Lous mouines, tout louant soun zela,
  Alaugeiravoun lou paquet
  De ce qu'aviè dins soun saquet,
  Talament que lou prieu de l'ordre
  Trouvet à pena de que mordre.
- Tout aco courris averti
  Lou Vice-Legat de l'afaire
  Qu'avien apresa d'aquel fraire.
  A sa porta nostres tounduts
- 130. Boumberoun couma de perduts,

  Tant qu'à la fin un doumestica,

  En tramblant, li cridet :— « Quau pica? »

  « Nautres, respondoun, ouvrissès....»

  « Oh! digàs-me de que voulès! »
- 135. « A vostre mestre venen dire Quicon que lou farà ben rire, Amai saique vous atabé: Fin de diseta!....» — « Bon! eh be, Tout plan dins la premieira sala 140. Intràs, l'ausisse que davala.»

De fet, monsignor Doria Lou seguis en disent: « — Ah! ah! Qu'es aiço? venès veire en troupa, Se per aici dounan la soupa?»

- 145. « Oh! li respond lou pera prieu,
   Mounsegnur ou prend trop au vieu,
   N'aurian pas aquela insoulença.
   Venen dira à Soun Ecclença
   Qu'à Cadaroussa es arrivat
- 150. Quatre cents carradas de blat.,...»

   « E quoura li soun arrivadas
  Aquelas quatre cents carradas? »
  Repliquet Doria surprés.....
  - « Lou vint-e-set d'aqueste mes..... »
- 155. « Aco sufis : adissiàs, peras, Quauca part dans vostras prieras.» Aquì dessus lous enmandet, Faguet la sieuna e dejunet. Dieu sap se piquet fort e ferme
- 160. E s'espargnet lou tua-verme!

  Las brisas à chaca moucel

  Li sautavoun sus lou capel

  E, rejouït de la nouvela,

  Tout lou jour anet à la sela.
- 165. Li era à soun grand countentament, Quand espediet proumtament

Un ordre à vint souldats dau Papa Per anà, mouienant l'estapa, Sans atendre un moument pus tard,

170. A Cadaroussa de sa part.

La brigada seguet lèu presta; Partissoun, un fifre à la testa, Chacun soun fusil sus lou col E munits d'un grand parassol.

- 175. Per alta à soun premiè vilage, Trouveroun pas que de froumage, Mais segueroun milhou tratats A la soupada, à Carpentràs.
  - Lou lendeman, à pena l'auba
- 180. Aget cargat sa bela rauba,
  Per saludà lou Dieu dau jour,
  Que veniè de faire soun tour,
  Quand à Cadaroussa estounada
  Fagueroun dounà la chamada.
- 185. Lou fifre, en li siblant un er,
  Metet touta la vila en l'er.
  Un, que devistet l'escouada,
  Cridet: « Juste Ciel! quinta armada
  Campa davans nostras parets!
- 190. Oh! sen couats aquesta fes!

  Bon Dieu, delivràs Cadaroussa

  Das enemis qu'aven en troussa! »

Aquì dessus tout s'esfraiet, Vite l'alarma se sounet, 195. E, sans sounjà de se defendre, Parlavoun dejà de se rendre: - « Ieu crese, mardi! que ses fols, Coussi! que quauques parassols, Diguet un vielhard ple de bila, 200. Devoun faire rendre una vila? Pardine, infourmàs-vous au mens De que voloun aquelas gents..... An siblat... mais amai l'on sible, L'on n'es pas pourtant pus terrible. 205. Se voulès, ieu me cargarai De saupre ce que fan alai. » - « Eh ben! oui, mestre Lafulhada, Li diguet touta l'assemblada, Vous qu'avès pas l'esprit troublat, 210. Anàs veire per qu'an siblat. Anàs, sen de gents d'una mena Que vous laissaren pas en pena, Car, à la mendre pou qu'aurés, Au mendre signe que farés, 215. Sus lou champ nostra bourjouesìa Entounarà la litania. » Lou viel marechal, encantat

D'estre causit per deputat,

Embrassa sa femna Louisa, 220. Chanja de vesta e de camisa, Carga soun bounet, soun vantau, E sourtis per lou grand pourtau. - « Messius, diguet à la brigada, Cadaroussa es fort estounada 225. Que la metés touta en varal; Ounte avès vostre general? Es el [e] ieu qu'aiço regarda. » Un qu'aviè gagnat l'alebarda, Per avedre servit quinze ans 230. La messa das penitents blancs, - « Es ieu, dis; à vostre service.... » - « Eh be! tant mius, m'en rejouisse, Li repliquet l'ambassadur; Toucàs-me la man, Mounsegnur, 235. Rede.... bon.... Aça, vene veire De que nostra vila deu creire Sus ce que vous atira aici; Parlàs-me couma un bon amì, Per que leve mas gents de pena. 240. Pretendès-ti nous cercà rena? Vous pouriàs en anà camus, S'es per aco que ses venguts.» Lou sarjant li respoundet: - « Pera, Cresès-me, pas tant de coulera;

- 245. Car, marblu, se noun ou savès,
  Sen de bigres qu'aiman la pes.
  Aven après au catechime
  Que de cercà nouesa es un crime.
  Nostre teble es la charitat.
- 250. Mounsegnur lou Vice-Legat,
  Vous prega per una ourdounança,
  Que, couma ses dins l'aboundança,
  Fagàs faire au mens regagnoun
  A nostra vila d'Avignoun.
- 255. Elàs! tala li es la diseta,
  Qu'el mema, es reduit à la dieta.
  Demanda sus lou blat qu'avès
  Pas que quatre mila sestiès,
  E crese pas, se noun m'abuse,
- 260. Que Cadaroussa lous refuse.
  Mais s'ou fai, s'en repentirà.
  Aicì la letra, prenès-la. »
  Lou marechal met sas lunetas,
  Mais saique n'eroun pas prou netas,
- 265. Car, dins lou papiè d'aut en bas, Legiguet ce que li aviè pas. Après aquel tret d'impourtança, Saluda touta l'assistança E, de l'er d'un ambassadou,
- 270. Se grata e vira lou cantou.

A soun retour dins Cadaroussa,
Tout ven, tout courris, tout se poussa,
Per entendre ce que diriè.

— « Ah! s'ou dis, Messius, Dieu çai siè....

- 275. Vene de faire una ambassada Que beleu seriè pas pagada, Quand la metesses un escut. Suse, vesès, couma un perdut. Ere dins un pas esfrouiable,
- 280. Mais m'en soui tirat couma un diable.

  Tout ase que me counouissès,

  M'a faugut legi de papiès

  Que m'an dounat mai de fatiga

  Que tout lou trin de ma boutiga.
- 285. Cepandant sus ce que m'an dich, Ai devignat un gros escrich. Vejàs-n'aicì la countenença: Dins Avignoun fan abstinença; E Moussu lou Vice-Legat
- 290. Que, per malur, a dessoutat
  Qu'aici viviàs dins l'aboundança,
  Umblament dins una ourdounança,
  Vous demanda, dau blat qu'avès
  Pas que quatre mila sestiès. »
- 295. « Misericorda! quatre mila! Cridet alor touta la vila;

Vòu dounc, per ie fourni de pan, Que mouriguen toutes de fam?... E quant oufris de la saumada?» 300. — « Vesès, respoundet Lafulhada, Ai pas ben legit ce qu'oufris, Mais crese qu'es un gramecis.... » « — Un gramecis! bon prou li fassa, Cridet tournà la populaça: 305. E n'escrieu pas qu'es trop pagat, Qu'alhurs l'auriè milhou mercat?» - « Escoutàs, dis un de la troupa, Que veniè de manjà la soupa, Anen plan: ieu seriei d'avis 310. De li prene soun gramecis. D'Avignoun la vila es fort granda; Se çai venoun toutes en banda, Ce que pourriè ben arrivà, Es segu que van tout brafa, 315. Qu'empourtaran blat e farina, E nous pausaran sa famina; Vaudriè mai li faire sa part E laissà lou lucre à l'escart.» Un autre qu'era un sarra-piastra, 320. Crassous e d'una umou pignastra:

> — « Oh! ma fouè, li diguet, salut; Aqueles que nous l'an vendut

M'en an fach pagà sus la plaça Dau sestiè nòu francs, amai passa.

- 325. Quand deurien m'escourchà tout vieu, N'en vole quatorze dau mieu. S'Avignoun patis, que patiga. Que que lou Vice-Legat diga, L'auran pas un diniè de mens:
- 330. Chacun es mestre de sous bens. »
  - « Sans doute que chacun es mestre, Ajustet un noumat Campestre; E pioi que las gents d'Avignoun Se trovoun tant dins lou besoun,
- 335. Seriè juste que rançounessoun E qu'à vint francs lou resounessoun.»
  - « E per que pas à vint-e-dous? Repliquet un autre bregous; N'es pas que l'on deuga estre chiche;
- 340. D'alhurs, Avignoun n'es pas riche; Mais fau que, dins aqueste cas, Faga varalhà sous patats. »
  - « Per ieu, n'en vole vint-e-quatre, E se m'en vesès res rabatre,
- 345. Diguet un autre poulissoun,
  Regardàs-me couma un fripoun.
  Ai ma saca touta coumoula
  D'ordi, de seguia e de paumoula,

Ce que fai, mardine! de blat 350. Qu'à trenta seriè pas pagat. »

Chacun aqui tant s'escaufava
Que toujour lou pris aumentava;
Mais per lous metre de repau,
Lafulhada crida: — « Estàs siaus,

- 355. Ce que vau dire es d'impourtança:
  Ai dins ma pocha una ourdounança
  Que m'a remessa alai davans
  Moussu lou general sarjant;
  L'ai mau legida, mais n'importa.
- 360. La susdita ourdounança porta Que tout de suita pagarés Lou mendre refus que farés: Prenès ara vostras mesuras. » Aquelas pauras creaturas,
- 365. D'ausi lou viel antau parlà, Recoumenceroun à tramblà; Auriàs dich, en vesent lur mina, Que li fustijavoun l'esquina. Canteroun lou Libera me,
- 370. Lou Parce nobis, Domine,
  E semblava per las carrieiras
  Que reçavien las estrivieiras.
  Lou marechal, qu'era un mutin,
  Li dis: «—Laissàs-me aquel latin.

- 375. Coussi, per una bagatela,
  Es que fau perdre la cervela
  E de que fariàs, si vous plet,
  Se vou'n dounavoun lou sujet?
  Venès que vous vole fa rire,
- 380. Per ce que me resta à vous dire:

  Me vesès ben viel e ben flac,

  Cepandant tout soul dins un sac,

  Voudriei plegà touta l'escorta

  Qu'aven aqui davans la porta;
- 385. Se lous enliassaven en bloc
  E que lous penjessen au croc
  D'una roumana mejancieira,
  La carga seriè tant laugeira
  Que crese pas que lou mouloun
- 390. Faguessa mountà lou boulhoun.
  Lous osses d'aquelas masetas
  Badinoun couma de cliquetas,
  E se dessecoun jout lous plis
  Dau pergami que lous couvris;
- 395. Noun an ni courage ni força,
  Sous fusils n'an pas gis d'amorça
  E lous pourrien pas boulegà,
  Quand lous aurien sauputs cargà.
  Diga-me se lous paures diables
- 400. Devour estre fort redoutables;

Soun pourtant, ou me troumpe fort, Ce qu'Avignoun a de pus fort, Car, dins un dangè de batalha, L'on n'emplega pas sa roussalha,

- 405. E soui ben segu qu'an causit Ce qu'avien de pus espoumpit. Assa, per nous tirà d'afaire, Vejàs aici ce que cau faire: Fau prene chacun un tricot,
- 410. Li anà caressà lou gigot,
  Pioi lous enmandà sans timbalas,
  Palha au cueu couma las cigalas.
  Dins Avignoun s'en facharan,
  Oh! souet. E de que nous faran?
- Fau avedre d'alé, per nous la faire, Fau avedre d'alé, pecaire!
  E jurariei que n'i'a pas un
  Capable d'amoussà lou lun.
  Anen, enfants, viva la glouera!
- 420. Fagan escrieure dins l'istouera

  Que Cadaroussa a tapinat

  Las troupas d'un vice-legat.»

  Tout repetet: « Viva la glouera!

  Anen nous ficà dins l'istouera!»
- 425. Chacun prend sa bilha à la man; Lou marechal, qu'era davans,

Aborda lou serjant de garda E lou tomba d'una nasarda; Sas gents, en lou vesent au sou,

430. Toumberoun atabé de pou, E l'ounou d'aquela journada Restet tout au viel Lafulhada. Nostres petàchous, sans fusil, Sans parassol e sans babil,

435. Embe cent traus dins la coudena, Se releveroun à grand pena E revengueroun fort mouquets En recitant sous chapelets.





### LOU SIEGE

## DE CADAROUSSA

### SEGOUND CANT

ous abitants de Cadaroussa
N'eroun pas d'una umou fort douça,
Mais lou prencipal bouta-fioc
Era lou marechal dau lioc.
Li faguet faire una soutisa
E lous jitet dins una crisa
Que li auriè destruit lur citat,
Sans lou secour de la bèutat.
Veiren tout aco per la suita.

10. Seguigan ara dins lur fuita

E lou sarjant e lous souldats Qu'avien tant ben acivadats. Disien dounc, après sa derouta, Lou chapelet long de la routa

- 15. E levavoun lous iols en l'er
  De rancuna à chaca pater.
  La fatiga, la fam canina, 
  Vint cops de bastou sus l'esquina
  E lou double sus lous gigots
- 20. Soun ben pesants per de bigots;
  Souvent la rancuna lous tenta
  Dins una esprova mens cousenta;
  N'i'a que se fachoun per pas res,
  N'ai vist mema mai d'una fes
- 25. Que de trop de bens regourjavoun,
  Amai encara roundinavoun;
  D'autres, ramplits de duretat,
  Qu'apelavoun sa charitat,
  Prenien dins lur senta coulera
- 30. Un er de comis de galera.

  Trouven pas dounc fort estounant
  Qu'aquestes, tout en s'en anant,
  Mesclessoun dins lur kiriela
  Quauca pichota bagatela;
- 35. Car fau counveni qu'en efet N'avien espeça de sujet.

Per lou camì, tantos pregavoun, Tantos, pecaire! renegavoun, E digueroun pas l'ouresoun

- 40. Qu'en arrivant dins Avignoun.
  Aqui certa! se descoufleroun
  E de tant de plours que baileroun
  Tout lou mounde seguet toucat,
  Entre autres lou vice-legat.
- 45. «Eh be, lur dis, quinta nouvela?

  Auren-ti de bona tousela?»

   «Oh! Mounsegnur, ma fouè, neant,

  Li respounderoun en souscant,

  L'ourdounança qu'avian pourtada,
- Yous l'an pas gaire respetada;
   Car nous an escrich sus lou dos

   A chacun vint cops de tricots,
   E vous, atendu vostre titre,

   Vous mandoun umblament fa fitre. »
- 55. «Fitre!» repliquet Dorià, Oh! Cadaroussa ou pagarà! Vese, vese qu'es per lou lucre Que me mandoun antau fa sucre; Voudrien dau blat mai que noun vòu,
- 60. Mais, marbieu, n'auran pas un sòu, E n'i n laisse pas una grana, Davans que passe la semana.

Anàs me dire as Capuchins, Douminiquens, Beneditins,

- 65. Carmas, enfin, à touta raça
  De benefice e de besaça,
  Que lous espere encessament
  E que vengoun dins lou moumen
  Vole saupre dins lur counsulta
- 70. Ce que pensoun d'aquela insultà.»
  Un capoural se destaquet
  E vite lous avertiguet.
  Sus lou champ, pelats e barbochas,
  Capels, capuchouns e galochas,
- 75. Se renderoun de tout coustat A l'ordre dau vice-legat. S'esperavoun à de nouvelas E las cresien saique pus belas, Pioi que courrigueroun antau
- 80. Couma las fedas à la sau.

  Mounsegnur, que lous esperava,
  Risiè que presque s'escanava,
  De lous veire, jouines e viels,
  S'atroupà couma d'estournels.
- 85. Quand segueroun davans sa porta,
  Lous arenguet d'aquesta sorta:
   « Peras, s'avès bon apetis,
  Dieu vous lou mantenga e tant pis!

Mais, en disent tant pis per vautres,

- 90. Ou dise per toutes lous autres,
  Car mouines, nobles e bourgés,
  Tout es couat aquesta fes.
  Noun aurés contra la famina
  Ni vianda, ni blat, ni farina,
- 95. A ce que m'an dich vint souldats Qu'à Cadaroussa aviei mandats. Vous dirai per autra nouvela, Qu'aquela vila, prou cruela Per nous laissà mourl de fam
- E per nous refusà de pan,
  Ven d'estrelhà nostra miliça,
  E que, per coumble de maliça,
  Lous consous mema de l'endrech
  M'an mandat fa sucre tout drech.
- 105. Tala insoulença vous estouna.

  Oui, ieu mema en propra persouna,
  Me mandoun, aqueles ouvriès,
  Tout drech au viage que savès.

  Avans de n'en tirà vengença,
- Touta vostra paternitat
  Sus lou darniè cas proupausat.
  Mais au mens que chacun s'esplique
  D'un stile net e patetique,

- Per decidà quau deu parlà,
  Car defende, en chef de pouliça,
  Aquela malurousa tissa.
  Pera letou das courdeliès,
- Vejan, vous, de que nous disès
  Sus aquel mot que l'insoulença
  Lacha contra Moun Ecelença.»
   « Ieu dise, respond lou letou,
  Qu'aquel mot a pas bona audou,
- Vous counselhariei de lou rendre,
  Dins una letra ben plegat
  As cònsous que vous l'an mandat;
  Car es una vertut mourala
- 130. D'elouegnà de se tout scandala

  E vole passà per un sot

  Se n'i a de pire qu'aquel mot. »

   « Fort ben.... A vous, pera Pancraça,
  Fasès-nous atabé la graça,
- 135. Couma capuchin de renoum,
  De nous dire vostra resoun. »
   α Oh! n'en farai pas un mistera,
  Vejàs-l'aicì, diguet lou pera:
  Lou mot sucre, à certen egard,
- 140. Pot estre pres en bona part;

Se, per esemple, una devota Vous manda fresas ou coupota, Tourtas, biscuits e canelà, Seloun lou caprice qu'aurà,

- 145. L'on refusa pas la caisseta,

  Per tant de sucre que li meta;

  E se sap que, dins aquel cas,

  Lou sucre scandalisa pas;

  Mais quand sucre, dich en coulera,
- Ouand es un ome que lou dis
  Sans fresas, tourta ni biscuits,
  Oh! certa, li a pas res qu'empache
  Qu'adounc la causa noun nous fache,
- Per estre pres en bona part.
  Or, dins aquesta circounstença,
  Cadaroussa à Vostra Ecelença
  N'a pas envouiat per qu'issai
- 160. Que de sucre de porta-fai;
  Dounc, pioi que voulès que m'esplique,
  Aquel puple es un eretique,
  Digne d'estre escoumuniat
  Per lou scandala qu'a dounat. »
- 165. « Anen, bon... vejan dins la clica Dau generous sent Doumenica,

Ce que pensa, sus aquel cas, Lou truchamand de sent Toumàs. » Aimable couma fu Pilata,

- 170. Pera Ambrouesa, en levant la pata:

   « Ah! s'ou dis, ounte ere autras fes,
  Per escrasà lous Albigés?

  Lous auriei reduits en purea
  Ou manjats en galimafrea,
- 175. Se m'ere sentit l'apetis

  Que me devora per aicis.

  Antau l'on punis la soutisa

  Dau mendre mot que scandalisa,
  E ses un bau, se soufrissès
- 180. L'audaça d'aqueles ouvriès.

  Fau, per vostra glouera outrajada,
  Faire una espeça de crousada,
  Armà contra eles Avignoun,
  E li anà demandà resoun.
- 185. Un ome que mandoun fa fitre, Quand on soufris, es un belitre; Dise pas que vous ou segàs, Mais l'on a pou qu'ou devengàs. » Touta la banda mounachica

190. Trouvet sa pensada toupica, E chaca teologien La soustenguet mai qu'en cretien.

Es vrai que la fam lous butava E que Mounsegnur la goustava, 195. Car aurien parlat autrament, S'avien manjat soun rampliment; Mais l'esprit, quand lou ventre baissa, Prend pas counsel que de la maissa; Lou bigre adounc counsulta pas 200. Ni Scot, ni Loumbard, ni Toumàs E, de l'assemblada gouluda, La guerra aquì seguet councluda. Lou vice-legat, rejouït Qu'à soun goust l'agessoun servit, 205. Li dis d'anà levà recrua E qu'el passarà la revua. Lou lendeman, de bon mati, As abitants las de pati,

Lou charitable pera Ambrouesa,
210. Coumencet de prechà la nouesa
Embe lou zela e l'ouncioun
De la senta enquisicioun.
Après el lou pera Pancraça
Jangoulet embe tant de graça

215. Sus l'eficacitat dau pan Contra la raja de la fam; Sa pintura seguet tant viva, Que faguet venì la saliva A la bouca das auditous.

- S'escaufavoun long das carrieiras
  En cridant que, das cheminieiras,
  Lou pau de fum que sourtissiè.
  A res de bon noun sentissiè
- 225. « Messius, disien à l'auditouera, Rapelàs à vostra memouera Aquel tems ounte, chaca jour, Lou pan que sourtissiè dau four Per soun audou vous chatoulhava
- 230. E, de la brocha que virava,
  Lou fumet vous fasiè venì
  D'un quart de lega de camì.
  O tems urous, anciens spetacles,
  Ventres pus gros que de basacles,
- 235. Bèus mourres à triple jabot,
  Trioumfe eclatant dau fricot,
  De que ses devenguts, pecaire!
  Elàs, adounc, lou mendre fraire,
  Un clerc que servissiè l'autel,
- 240. Aviè la pansa d'un vedel;
  Auriàs jurat qu'eroun de peras
  Per lou reble e per las manieras;
  L'on vesiè pas presque un malaut,
  Chaca visage fasiè gau,

- 245. La graissa e l'embounpount brilhavoun, Lou vielhards s'escarravilhavoun, Degus noun era encoumoudat Que per avedre trop manjat. Tout Avignoun era adourable,
- Tout se li seca, tout peris,
  Sen una banda d'emperits;
  Au cementeri la jouinessa
  Revala en pena la vielhessa;
- Se frounzis couma d'amadou, E la femna la pus galharda Es pus orra que la Camarda. Perissen toutes dins l'emboul,
- 260. Se manjan pas nostre sadoul.
  Mais graça, endulgença plenieira!
  S'agis de remplì la panieira:
  Cadaroussa es plena de blat.
  A moussu lou vice-legat
- Que, pecaire! n'a mandat querre,
  Lous consous, pus dus que lou ferre,
  An respoundut una resoun
  Trop soulharda per un sermoun,
  E que l'on vous pot pas redire,
- 270. De quinte biai que l'on la vire :

Mais imaginàs vous lou mot Lou pus picant e lou pus sot, L'avès... Enfants, aquel outrage Se deu lavà dins lou pilhage;

275. L'ounou vou que li anès deman Imoulà tout à vostra fam. E nautres vendren à la testa Per santifià la batesta! »

Toutes respounderoun: « — Amen!

- 280. Tant mius, e de que çai fasen?
  Fau-ti que patigan encara?
  E per que partissen pas ara?»
  Sus aco, tout se counfesset,
  Plouret de joia e se crouset.
- 285. Lou lendeman, des que l'aurora
  Moustret un pau lou nas defora
  Amount sus l'aireta dau jour,
  Fagueroun batre lou tambour.
  Sus lou champ, tout s'escarravilha,
- 290. S'auboura, se leva, s'abilha, E se rendoun de tout coustat As ordres dau vice-legat. El que dejà lous esperava, Pecaire! entremens dejunava,
- 295. Ce que seguet un egulhoun Que pounchounet tout Avignoun;

Aquel moument la populaça Auriè vougut estre à sa plaça, Mais disien en lou regardant:

- 300. « Ah, quoura n'en faren autant! »

  Mounsegnur venguet sus sa porta.

  Quand veget l'armada prou forta,

  Eroun tres mila fantassins,

  Pas, se voulès, das pus mutins,
- 305. Mais d'un courage prou passable E d'un apetis endoumtable. En testa, dous cents ouficiès E nou cent quatorze aumouniès. Las coumpaniès e las brigadas
- 310. Eroun lestas e ben armadas, Surtout aquela das talhurs, Car aviè sous cisèus voulurs E deviè segul la banieira De senta Luça courdounieira.
- C'et-à-dire lous courdouniès
  E tout ce que ten de la mena,
  Sans coumtà sa bona lesena,
  Avien encara à soun coustat
- 320. Soun tranchet bravament penchat E, d'una maniera guerrieira, Lou tira-ped en bandoulieira.

Se rengeroun d'un er faquin Jout l'estandart de sent Crespin.

- 325. Lous fraters, abilles brafaires, Seguissien lous apouticaires Que, per qu'inlai, devien jetà De grands pots d'assa fetida. Lurs armas eroun de spatullas,
- 330. De seringas e de canullas;
  Dins soun drapeu fort elouquent
  Vesiàs lou fruit d'un lavament
  Qu'era estat pintrat à la fresca
  Emb aqueles mots: « Dieu te cresca! »
- 335. La facultat das marechals,
  Dignes medecis de chivals,
  Agrejats au cor das crestaires,
  Fiers ivrougnas, rudes manjaires,
  Pourtavoun, d'un er trioumfant,
- 340. Soun redoutable buta avans.

  Lur estandart representava

  Un ase qu'un d'eles caussava

  E que dins las dents li rendiè

  Umblament graça à cops de ped.
- 345. La devisa era: « Ma tendressa Li rend caressa per caressa! » Lous gipiès, traçaires, maçouns, Mestres, manobres e garçouns,

Embe lou talhant e la tibla,

- 350. Tenien una mina risibla;
  Sus soun estandart descouvert,
  L'on vesie toumbà d'un couvert
  Un manobre que s'entanchava,
  Couma se la causa pressava;
- 355 En bas, li aviè per escritèu:

   « Languigàs pas, çai seras lèu! »

  Quatre cents ases de Camarga,

  Que fignoulavoun jout la carga,

  Pourtavoun, sus soun cueu cournut,
- 360. Lous marchands mountats à pèu nut; E sans estrieus, bridel ni barda, Aquela troupa mau galharda Surpassava, à ce que cresiè, La pus bela cavalariè;
- 365. Lur timbala era una marmita Ounte gratava un viel ermita; Avien dos troumpetas de boi, Quatre cournets emb un auboi. S'aviàs entendut l'armounia
- 370. D'aquela douça simfounia,
  Auriàs dich: « Ai! bon Dieu, merci!
  Lous porcs arrivoun dau Querci! »
  Dins lur ensegna desplegada,
  Qu'era un floc de tela cirada,

- Per decidà quau deu parlà,
  Car defende, en chef de pouliça,
  Aquela malurousa tissa.
  Pera letou das courdeliès,
- 120. Vejan, vous, de que nous disès
  Sus aquel mot que l'insoulença
  Lacha contra Moun Ecelença.»
   « Ieu dise, respond lou letou,
  Qu'aquel mot a pas bona audou,
- Vous counselhariei de lou rendre,
  Dins una letra ben plegat
  As cònsous que vous l'an mandat;
  Car es una vertut mourala
- 130. D'elouegnà de se tout scandala

  E vole passà per un sot

  Se n'i a de pire qu'aquel mot. »

   « Fort ben.... A vous, pera Pancraça,
  Fasès-nous atabé la graça,
- 135. Couma capuchin de renoum,
  De nous dire vostra resoun. »
   α Oh! n'en farai pas un mistera,
  Vejàs-l'aicl, diguet lou pera:
  Lou mot sucre, à certen egard,
- 140. Pot estre pres en bona part;

Se, per esemple, una devota Vous manda fresas ou coupota, Tourtas, biscuits e canelà, Seloun lou caprice qu'aurà,

- 145. L'on refusa pas la caisseta,
  Per tant de sucre que li meta;
  E se sap que, dins aquel cas,
  Lou sucre scandalisa pas;
  Mais quand sucre, dich en coulera,
- Ouand es un ome que lou dis
  Sans fresas, tourta ni biscuits,
  Oh! certa, li a pas res qu'empache
  Qu'adounc la causa noun nous fache,
- Par ça qu'es un mot trop galhard Per estre pres en bona part. Or, dins aquesta circounstença, Cadaroussa à Vostra Ecelença N'a pas envouiat per qu'issai
- 160. Que de sucre de porta-fai;
  Dounc, pioi que voulès que m'esplique,
  Aquel puple es un eretique,
  Digne d'estre escoumuniat
  Per lou scandala qu'a dounat. »
- 165. « Anen, bon... vejan dins la clica Dau generous sent Doumenica,

Ce que pensa, sus aquel cas, Lou truchamand de sent Toumàs. » Aimable couma fu Pilata,

- 170. Pera Ambrouesa, en levant la pata:

   « Ah! s'ou dis, ounte ere autras fes,
  Per escrasà lous Albigés?

  Lous auriei reduits en purea
  Ou manjats en galimafrea,
- 175. Se m'ere sentit l'apetis
  Que me devora per aicis.
  Antau l'on punis la soutisa
  Dau mendre mot que scandalisa,
  E ses un bau, se soufrissès
- 180. L'audaça d'aqueles ouvriès.

  Fau, per vostra glouera outrajada,

  Faire una espeça de crousada,

  Armà contra eles Avignoun,

  E li anà demandà resoun.
- 185. Un ome que mandoun fa fitre,
  Quand on soufris, es un belitre;
  Dise pas que vous ou segàs,
  Mais l'on a pòu qu'ou devengàs. »
  Touta la banda mounachica
- 190. Trouvet sa pensada toupica, E chaca teologien La soustenguet mai qu'en cretien.

Es vrai que la fam lous butava E que Mounsegnur la goustava, 195. Car aurien parlat autrament, S'avien manjat soun rampliment; Mais l'esprit, quand lou ventre baissa, Prend pas counsel que de la maissa; Lou bigre adounc counsulta pas 200. Ni Scot, ni Loumbard, ni Toumàs E, de l'assemblada gouluda, La guerra aquì seguet councluda. Lou vice-legat, rejouït Qu'à soun goust l'agessoun servit, 205. Li dis d'anà levà recrua E qu'el passarà la revua. Lou lendeman, de bon mati, As abitants las de pati, Lou charitable pera Ambrouesa, 210. Coumencet de prechà la nouesa Embe lou zela e l'ouncioun De la senta enquisicioun. Après el lou pera Pancraça Jangoulet embe tant de graça

215. Sus l'eficacitat dau pan

Contra la raja de la fam; Sa pintura seguet tant viva, Que faguet venì la saliva A la bouca das auditous.

- S'escaufavoun long das carrieiras
  En cridant que, das cheminieiras,
  Lou pau de fum que sourtissié.
  A res de bon noun sentissié
- 225. « Messius, disien à l'auditouera, Rapelàs à vostra memouera Aquel tems ounte, chaca jour, Lou pan que sourtissiè dau four

Per soun audou vous chatoulhava

- 230. E, de la brocha que virava,
  Lou fumet vous fasiè venì
  D'un quart de lega de camì.
  O tems urous, anciens spetacles,
  Ventres pus gros que de basacles,
- 235. Bèus mourres à triple jabot,
  Trioumfe eclatant dau fricot,
  De que ses devenguts, pecaire!
  Elàs, adounc, lou mendre fraire,
  Un clerc que servissiè l'autel,
- 240. Aviè la pansa d'un vedel;
  Auriàs jurat qu'eroun de peras
  Per lou reble e per las manieras;
  L'on vesiè pas presque un malaut,
  Chaca visage fasiè gau,

- 245. La graissa e l'embounpount brilhavoun, Lou vielhards s'escarravilhavoun, Degus noun era encoumoudat Que per avedre trop manjat. Tout Avignoun era adourable,
- 250. Mais ioi es pas pus counouissable:
  Tout se li seca, tout peris,
  Sen una banda d'emperits;
  Au cementeri la jouinessa
  Revala en pena la vielhessa;
- 255. La pel das filhas sans coulou Se frounzis couma d'amadou, E la femna la pus galharda Es pus orra que la Camarda. Perissen toutes dins l'emboul,
- 260. Se manjan pas nostre sadoul.

  Mais graça, endulgença plenieira!

  S'agls de rempli la panieira:

  Cadaroussa es plena de blat.

  A moussu lou vice-legat
- 265. Que, pecaire! n'a mandat querre,
  Lous consous, pus dus que lou ferre,
  An respoundut una resoun
  Trop soulharda per un sermoun,
  E que l'on vous pot pas redire,
- 270. De quinte biai que l'on la vire:

Mais imaginàs vous lou mot Lou pus picant e lou pus sot, L'avès... Enfants, aquel outrage Se deu lavà dins lou pilhage;

275. L'ounou vou que li anès deman Imoulà tout à vostra fam. E nautres vendren à la testa Per santifià la batesta! »

Toutes respounderoun: «— Amen!

280. Tant mius, e de que çai fasen?
Fau-ti que patigan encara?
E per que partissen pas ara?»
Sus aco, tout se counfesset.
Plouret de joia e se crouset.

285. Lou lendeman, des que l'aurora Moustret un pau lou nas defora Amount sus l'aireta dau jour, Fagueroun batre lou tambour. Sus lou champ, tout s'escarravilha,

290. S'auboura, se leva, s'abilha, E se rendoun de tout coustat As ordres dau vice-legat. El que dejà lous esperava, Pecaire! entremens dejunava,

295. Ce que seguet un egulhoun

Que pounchounet tout Avignoun;

Aquel moument la populaça Auriè vougut estre à sa plaça, Mais disien en lou regardant:

- 300. « Ah, quoura n'en faren autant! »

  Mounsegnur venguet sus sa porta.

  Quand veget l'armada prou forta,

  Eroun tres mila fantassins,

  Pas, se voulès, das pus mutins,
- 305. Mais d'un courage prou passable E d'un apetis endoumtable. En testa, dous cents ouficiès E nou cent quatorze aumouniès. Las coumpaniès e las brigadas
- 310. Eroun lestas e ben armadas, Surtout aquela das talhurs, Car aviè sous cisèus voulurs E deviè seguì la banieira De senta Luça courdounieira.
- 315. Lous pegots, que venien après C'et-à-dire lous courdouniès E tout ce que ten de la mena, Sans coumtà sa bona lesena, Avien encara à soun coustat
- 320. Soun tranchet bravament penchat E, d'una maniera guerrieira, Lou tira-ped en bandoulieira.

Se rengeroun d'un er faquin Jout l'estandart de sent Crespin.

- 325. Lous fraters, abilles brafaires, Seguissien lous apouticaires Que, per qu'inlai, devien jetà De grands pots d'assa fetida. Lurs armas eroun de spatullas,
- 330. De seringas e de canullas;
  Dins soun drapeu fort elouquent
  Vesiàs lou fruit d'un lavament
  Qu'era estat pintrat à la fresca
  Emb aqueles mots: « Dieu te cresca! »
- Dignes medecis de chivals,
  Agrejats au cor das crestaires,
  Fiers ivrougnas, rudes manjaires,
  Pourtavoun, d'un er trioumfant,
- 340. Soun redoutable buta avans.

  Lur estandart representava

  Un ase qu'un d'eles caussava

  E que dins las dents li rendiè

  Umblament graça à cops de ped.
- 345. La devisa era: « Ma tendressa Li rend caressa per caressa! » Lous gipiès, traçaires, maçouns, Mestres, manobres e garçouns,

Embe lou talhant e la tibla,
350. Tenien una mina risibla;
Sus soun estandart descouvert,
L'on vesiè toumbà d'un couvert
Un manobre que s'entanchava,

Couma se la causa pressava;

- 355. En bas, li aviè per escritèu:

   « Languigàs pas, çai seras lèu! »

  Quatre cents ases de Camarga,

  Que fignoulavoun jout la carga,

  Pourtavoun, sus soun cueu cournut,
- 360. Lous marchands mountats à pèu nut; E sans estrieus, bridel ni barda, Aquela troupa mau galharda Surpassava, à ce que cresiè, La pus bela cavalariè;
- Ounte gratava un viel ermita;
  Avien dos troumpetas de boi,
  Quatre cournets emb un auboi.
  S'aviàs entendut l'armounia
- 370. D'aquela douça simfounia,
  Auriàs dich: « Ai! bon Dieu, mercì!
  Lous porcs arrivoun dau Quercì! »
  Dins lur ensegna desplegada,
  Qu'era un floc de tela cirada,

- 375. Un d'eles, la plouma à la man, Tout risent, fasiè soun bilan; E, visoun-visu dau pirata, Era escrich, au bout d'una lata: — « Courage! aqueste t'enrichis.
- 380. Una autre te farà marquis!» Plena de joia e d'esperança, Mila fes mai que de pitança, L'armada atendiè soun despart, En cridant que se fasiè tard.
- 385. Mounsegnur, per la satisfaire, Ma fouè, la retardet pas gaire, Car, entre la veire, badet, Li dounet l'ordre e l'enmandet. Quaucus ara me vendrà dire:
- 390. « Mais, moun cher ami, voulès rire? Dins lou noumbre avès pas coumtat Dau Papa lou mendre souldat. Coussì qu'aquela bela troupa Aviè renounçat à la soupa?...
- 395. Noun pas, mais ahis lous assauts E n'aima pas lous petassaus. Restet per prudença à la vila E li seguet pas inutilla, Car pregava Dieu tout lou jour
- 400. Per l'armada e per soun retour...

Mais l'armada, quau la menava?...
Pardi, lou que la coumandava...
Era-ti lou vice-legat?...
Nani, qu'auriè pas boulegat

- Per una tant ruda campagna...

  Quau seguet dounc lou general?...

  Vous m'embarrassàs mai qu'un gal.

  Dau moussu que n'aget la glouera,
- Mais pourriàs vous n'en metre au fet,
  Car es tirat de l'alfabet;
  Crese pourtant que s'apelava
  Boiardo, Pantaloun, Octava,
- A15. Baroun d'aici, marquis d'aiçai,
  Duc d'aqui, prince de noun sai.
  N'i auriè per ramplì tres chapitres
  Se vous detalhava lous titres
  Que teniè de Sa Sentetat
- 420. Dins un pichot trau dau Coumtat.
  Es aquel que menet la cola,
  Mountat sus lou bast d'una miola,
  Ben amagat jout un mantel,
  Doubla bouneta e grand capel.
- 425. Des que las troumpetas souneroun, Lous ases sus lou champ brameroun

E, trop fiers per marchà de frount, Chacun faguet soun escadroun. Dins la routa, la testa bassa,

- 430. Seloun l'usage de la raça,
  Tendrament niflavoun lou pis
  Que rencountravoun per camis.
  Save pas se ce que vau dire
  Es tirat d'un conte per rire,
- 435. Mais, dins lou pouëma que fau, Soui segu qu'anarà pas mau, Car tout letou prendriè la broda Sans lou ragoust d'una episoda. Aicì dounc la digressioun
- 440. Que gardave per lou sermoun:

  L'ase dau bon papà Silena,

  Un jour contra la raça umena,

  Anet pourtà plentas au ciel.

  Jupiter, que lou trouvet bel,
- Li dis: « Olà, de que te mena? »
   «Vesès, lou sujet de ma pena,
  Li respoundet lou viel grisoun,
  Soun lous vilens cops de bastoun
  De quau l'ome, que toujour pica,
- 450. Regala aval ma chera clica; Seriè tems de lous fa finì. Aquì ce que m'a fach venì.»

Lou Dieu que lança lou tounera Li dis: — « Retorna sus la terra,

- 455. E diràs à tous mau-bastits:
  - « Aicì vostre sort, abestits:
  - « Tant que pudirà vostra urina,
  - » Aurés de tustaus sus l'esquina;
  - » Mais des que sentirà lou musc,
- 460. » Vous jure que n'aurés pas pus! »
  Tout rejouït en counsequença,
  D'una tant poulida sentença,
  L'encoumparable pecatà
  Ruet, petet, et cætera;
- 465. E, souet de joia ou de vergougna, Sautet dau ciel dins la Gascougna; Aqui countet as etalouns L'arret sus lous cops de bastouns; Las saumas, que soun de femelas,
- 470. N'en cacheroun pas las nouvelas, E tout ase las aprenguet, Tant lion aco s'espandiguet. Toutes, d'aquel moument en fora, Sieja dedins, sieja de fora,
- 475. D'abor que trovoun de soun pis,Voloun saupre à de que sentis,Mais, de veire que put qu'empesta,Vers Jupiter aussoun la testa

E disoun, en moustrant las dents, 480. — «Ah! grand Dieu que n'i'a per de tems!»

Revengan ara à la crousada Qu'à soun despart aven laissada. Lous ases marcheroun premiès;

Eroun be ioch cents à pu près,

485. Car fau metre lous que mountavoun Au reng d'aqueles que pourtavoun. — Per que, dirés?... e per que pas? Diantre siè, quand eroun en bas,

Se li aviè gis de diferença,

490. D'alura ni de countenença.

Dins la routa bruqueroun fort

E tengueroun toujour lou bord.

Après seguissiè la recrua

Qu'avès vista dins la revua;

495. Eroun dech belas coumpanies,
Toutas farcidas d'aumouniès
Que, per li dounà bon courage,
D'avança lou long dau vouiage,
Entounavoun lou Requiem

500. Das enemis que tuarien.

Darriès, seloun l'acoustumada, Tout lou bagage de l'armada Era escourtat de poulissouns Que disien d'autras ouresouns:

- 505. Avien cargat quinze carretas
  De culiès d'estam, de fourchetas,
  D'oulas, de plats de Sent-Quentin,
  Lou tout preste en cas de butin
  Per coire e brasa la pitança
- 510. Qu'esperavoun de sa valhança.

  Lous Avignounés soun de gents

  Tant avisats e tant prudents!

  Toumbant, levant, tant camineroun

  Que dins set ouras arriveroun,
- A la vista de Carpentràs.

  Un lanterniè qu'era de garda
  Veget pas pulèu l'avans-garda
  Que courris aco dau major:
- 520. « Moussu, soui, s'ou dis, un butor,
  Ou, sus ce qu'ai vist de la porta,
  Toutes lous Bemis soun per orta.
  Tramble, moussu lou coumandant,
  Car aprouchavoun en cantant
- Que semblava aquel de l'absouta;
  Amai crese, dins lou sagan,
  D'avedre ausit un capelan.»
  Lou major, qu'era un viel roudriga,
- 530. Dis en se gratant l'embouniga:

— « Ai! bon Dieu, que me contes, tus? Cantoun l'absouta. Sen perduts! Vai vite querre la patroulha, Retorna à la porta e barroulha,

535. Mais, au mens, s'era l'enemi Li digas pas que soui aicl.» Las portas segueroun barradas, Ben clavadas, ben acoutadas, Amai degus dins la citat

540 Se cresiè pas en suretat.

Cepandant la crousada arriva.

Lou lanterniè li dis : — « Qui viva? »

- « Sen, pecaire! d'Avignounés... »
- « De que voulès? » « Que nous dounés
- 545. La charitat que Dieu coumanda,
  De pan, de vinet e de vianda,
  Car sen toutes de pauras gents
  Qu'aven pas manjat de long tems. »
  -«Quantses?»-«Pas que quatre ou cinq mila.»
- 950. « Pesta, envalariàs be la vila!

  Per que venì tant à la fes?

  Dieu vous assiste! Aven pas res. »

   « Pas res! Eh be, Dieu vous ou renda,

  Qu'aurés una poulida renda! »
- 555. S'en aneroun aqui dessus Deglesits couma eroun venguts.

Dins Carpentràs se rassureroun Quand per esquina lous vegeroun, E disien dessus sous ramparts:

- 560. « Ah! Segnur, que de pelucarts!

  Dieu preserve que tala troupa

  Toumbessa sus un plat de soupa!

  N'en veiriè la fin, quand lou plat

  Seriè de la grandou d'un prat. »
- 565. Ralhavoun, fasien la charrada.
  Cepandant gara la bourgada!
  Das crousats lou troupel goulut
  Li aviè jetat soun devoulut.
  Poudés me dire la drilhansa,
- 570. Quand emb ela intreroun en dansa!

  Dins un moument tout seguet net,

  Li quiteroun pas un caulet.

  Jujàs un pau se la poulalha

  Escapet d'aquela batalha.
- 575. Elàs! de l'un à l'autre bout,
  Fagueroun man bassa sus tout.
  La grella, lou fioc, la tempesta,
  Laissoun, au mens, quicon de resta,
  Mais eles, pires que lou fioc,
- 580. Devoureroun tout dins lou lioc. Après aquelas repetilhas, Reprenoun soun sac e sas quilhas,

Disoun l'Agimus e s'en van,
Afamats couma eroun davans.
585. Es vrai que, d'una voues pus douça,
Disien l'Obit de Cadaroussa
E l'acabavoun tout escas
Quand li segueroun arrivats!





## LOU SIEGE

## DE CADAROUSSA

## TROUESIEMA CANT

UAUQUS que la vengença anima
D'una coulera legitima,
Quand serie pus dous qu'un agnel
Adounc chanja de naturel:
Trambla, ven palle, s'esfoulissa,
Lous iols li sannoun de maliça;
Sarra lou poung en grumejant,
S'esprima pas qu'en blessejant
E, pus proumte que la tempesta,
10. Courris sans crenta à la batesta,

Mais s'es encara pounchounat D'un apetis desourdounat, Se lou june e la fam canina Li an coulat lou ventre à l'esquina, 15. Oh! poudès dire — «Fin d'agnei!» Lou tigre n'es pas pus cruel E, dins la raja que lou mena, Prenès garda à vostra coudena, Car una fes que la tendriè, 20. Lou pelaud vous l'estripariè. Antau menaça Cadaroussa L'armada que la fam li poussa. Anan veire de que farà E surtout coussi brafarà. Pantaloun metet ped à terra 25.

E tenguet un counsel de guerra,
Coumpausat de quinze ouficiès,
Set capuchins, nou courdeliès,
Quatre sarjants, dos anpeçadas,
30. Tres quincaliès chefs de brigadas,
D'un fifre noumat Sent-Amour,
D'un frera carma e d'un tambour.
D'abor toutes se regarderoun
E l'un l'autre se demanderoun:
35. — « Pioi que s'agis d'un siege aici,
De qu'es un siege, moun amì? »

Un mouine diguet: — « Per lou faire, Fau mandà querre un cadiciraire, Lou pus adrech dins soun mestiè. »

- 40. Un autre dis qu'un menusiè
  Fariè la causa pus soulida;
  D'autres que seriè pus poulida,
  Se n'en cargavoun lou scultur
  Qu'aviè fach las formas dau cur
- 45. De la gleisa Sent Agricola.
   « Amai deurien cargà l'estola,
   Diguet un sarjant escaufat,
   E nous metre dins un soufat,
   Que couma aco prendrian la vila
- 50. D'una maniera pus tranquilla. E, mardi, mous paures paters, Ieu crese que ses fort esperts, Quand s'agis, en teologia, De luchà contra l'eresia,
- 55. De fieulà dins un refetouer E de rounflà dins un dourtouer; Mais que ni siege ni batalha Siejoun lou fet de la mouinalha, Ma fouè, nous avès counvencuts
- 60. Que dins aco ses pas letruts. »

  Tassa de mouines d'ignourença
  Es una terribla emprudença,

Mais lou chef, per un ben de pes, Mandet lou sarjant as arrets.

- 65. Couma aco lous doutous caleroun E las gents d'espasa parleroun. Un ouficiè qu'aviè servit A taula força gents d'esprit, Ome autras fes de bona mina,
- 70. Quand fasien fioc à la cousina, Mais que, de la rigou das tems, N'aviè pas sauvat que sas dents, Un ouficiè de bourjouesia Diguet d'un er de courtouesia:
- 75. « Messius, ai souvent mes lou nas Dins las fulhas de Morenàs; A ma pocha encara n'ai una Ounte se trova per fourtuna La relacioun touta au long
- 80. Dau siege de Berg-op-zoom.

  Mai que fagan couma fagueroun

  Lous demonis que lou prengueroun,

  Vous jure que dins quatre mes,

  Cinq au plus..., Cadaroussa es pres,
- 85. Car...» « Laissa la car, malapesta!

  La que nous trota per la testa

  Vòu pas d'alonguis couma aquel,

  Li respoundet tout lou counsel,

- Ben saique lous Francés manjavoun 90. Davans la plaça qu'assiejavoun, E vos qu'aici, sans tastà res, Nautres resten quatre ou cinq mes? A l'autra, qu'aquela es riblada! » Au miech de l'illustre assemblada
- 95. Lou fifre, en aussant soun siblet, Cridet: — « Messius, aco soulet, Sans tentà lou sort das batalhas, Anioch toumbarà las muralhas E vous livrarà lou fricot
- 100. De la superba Jericot:

  Aqueste vespre, sus la bruna,

  Avans lou levà de la luna,

  Ieu que vous parle e lou tambour

  De la vila faren lou tour;
- 105. El, tout en batent la dragouna, Ieu, tout jougant la farandouna, Quand seren au cantou d'aval, Faren l'ouvertura d'un bal Per una musica tant douça
- Sus la paret d'aquel coustat,
  Vendrà tout lou puple encantat.
  Vautres, dins aquela entrefeta,
  N'en pourrés faire la counqueta,

- Sans res dire, as autres parets.

  Quand on n'a ni clau ni sarralha,
  Fau be mountà per la muralha.

  Aquì, messius, un bon avis;
- 120. Se lou seguissès pas, tant pis! »

  Lou counsel juget à bel ime

  Qu'aquel avis era sublime

  E tout de suita auriè passat,

  Se lou chef l'aviè proupausat;
- Aja toujour tort quand resouna
  E que, tratat couma un broulhoun,
  Gaste tout par ça qu'a resoun.
  Lou grand, l'illustre Pantaloni,
- 130. Nebout dau celebre Pouloni,
  En chef abille e generous,
  Tratet lou fifre de fouirous
  E juret que, jout sa counduita,
  Prendrien la vila tout de suita.
- E sus lou champ la demouli. »

   « Viva! viva! cridet la clica;

  Aquel counsel es sans replica;

  Parlas-me d'un bon general,
- 140. Noun pas de fifres ni de bal!»

Cepandant, la vila assiejada, De tout aiço fort aflijada, N'en temouegnava sous regrets, E pregava Dieu per la pes;

- 145. Mais resteroun pas, dins lou trouble,
  D'assujeti per un bon couble
  Lou boi pourrit de soun pourtau,
  Ce que l'asseguret un pau;
  Amasseroun, sus sa muralha,
- 150. Un moulou de peiras de talha,
  Per regalà lous enemis,
  Se venien roudà per aquis,
  N'i'aget mema que, dins la suita,
  Jeteroun à plena marmita
- O'oli boulhent, que tant trauquet,
  Que jusqu'as osses lous taquet.
  Lou marechal, toujour terrible,
  Engajet un coumbat ourrible,
  Couma veirés dins un moument...
- 160. Mais counten tout pausadament.

  Lou premiè Cònsou de la plaça
  Se presentet de bona graça
  A la fenestra d'un oustau
  Qu'era bastit sus lou pourtau.
- 165. Aqui metet sus soun espalla Un petàs d'escarlata salla

Estacat à soun abi gris, E lenguejet lous enemis:

— « Messius, li diguet, vostra armada

- 170. Dins Cadaroussa es fort aimada E tant mens çai demourarà Tant mai de plesi nous farà. Es nostre blat que vous atira? N'aven pas gaire, mais, foullira!
- 175. Dau pau que li a vous bailaren Autant couma n'en gardaren. Lou pris es una bagatela: Paguen nou francs de la tousela, Vous la livran à dech escuts,
- 180. E finigan aqui dessus...

  Fau toutes estre resounables. »

   «Tirariès pus lèu trenta diables,

  Viel usuriè, double larroun,

  Respoundet lou fier Pantaloun,
- 185. Que noun tiraràs de ma pocha Trenta francs per virà ta brocha! Voulen tout lou blat per pas res, Sans coumtà que nous pagarés L'ensulta plena de maliça,
- 190. Qu'avès facha à nostra miliça E surtout ce qu'avès mandat A Moussu lou Vice-Legat. »

Lou consou repliquet: — «E quoura Faren acò?» — « Dins mens d'una oura!»

195. Ajustet Outava en furou
E sus lou toun d'un loup-garou.
Aqui coumencet una guerra
Capabla d'esfraià la terra,
Se quauque autur couma se deu

- 200. N'agessa parlat avans ieu,
  Mais l'istouera n'en seguet facha
  De la man d'un paure petacha,
  Sans goust, sans regla, sans esprit,
  E n'aget pas ges de debit.
- 205. Pecaire! vengen soun injura
  En acabant nostra pintura;
  Perqui'n lai defora e dedins,
  Tout acò fasien lous mutins.
  Dins la vila n'eroun pas forsa,
- 210. Mais manjavoun, avien de força; Lou marechal lous counduisiè, E soun rampart lous defendiè. Defora, lou noumbre empourtava, E la fam que lous encitava
- Que lous auriàs pas counouguts.

  Sus lou champ intreroun en dansa.

  La premieira troupa qu'avança,

Sans esperà de coumpagnouns,

- 220. Seguet aquela das maçouns.
  Prend lou testut, jura e travalha
  A faire toumbà la muralha;
  Lous assiejats, qu'eroun dessus,
  En n'apelant couma d'abus,
- D'un gros boulhoun de perousina.
  Couma regardavoun en bas,
  Li toumbava pas sus lou nas,
  Mais l'esquina ben ou pagava.
- 230. E l'os bertrand se rabinava...

  Vite li pourtavoun la man,

  E disien, en petounejant:

   « Segnur ! quau la jeta tant cauda?

  Ah! bourrel, lou diable ta gauda!»
- 235. De raja anavoun e venien,
  E chaca fes que pareissien,
  D'amount lous levavoun dau ròdou,
  Per lou mens à grands cops de còdou,
  Quand n'era pas sus sous abits
- 240. D'oli boulhent à plens toupis.

  Pantaloun pouguet pas sans penas
  Veire escaumà tant de coudenas,
  E per mantene lou traval
  Qu'avien coumençat aiçaval,

- 245. Juget que das apouticaris

  Lous outis eroun necessaris.

   « Anen, metès-vous à ginoul,

  Li dis, e tiràs-nous d'emboul. »

  Cent seringas, vers la muralha,
- 250. Cargadas, noun pas à mitralha, Mais à quicon de quau lou noum Rendriè lou vers trop poulissoun, Escarteroun la poupulassa Que d'amount defendiè la plaça...
- 255. Lou diantre d'un que li restet, De tant qu'acò lous empestet! Mais de crenta que revenguessoun E qu'à l'audou s'acoustumessoun, Seguet counclut de li mandà
- 260. Quauques pots d'assa-fætida,
  Ah! poudès me dire la festa!
  Se li agessoun jetat la pesta,
  Aquel paure puple escarnit
  Seriè pas istat pus punit.
- 265. Tout aco l'aisset la courtina
  A la merch de la famina,
  E courrissiè lou nas tapat,
  En cridant: « M'an empouisounat »!
  Entremens lou martel boumbava,
- 270. E la muralha se crebava

Tant fort que, quauques cops de mai, Lou jour se seriè vist de lai. Seguet alor que Lafulhada A touta la vila assemblada

- 275. Tenguet un discour tant senut
  Que lou coumbat seguet conclut,
  E la muralha garantida
  Per lou mouien d'una sourtida.
   « Enfants, s'ou dis, de que fasen?
- 280. Ounte anan? per que fugissen?

  L'armada qu'es davans la porta,

  Quoueque nombrousa, es-ti tant forta

  Que noun l'estrilhen à soun tour
- Couma aquela de l'autre jour?
  285. Counouissès ben pau la famina
  Que l'affaquis e que la mina!
  Vous jure que l'esquinaren,
  Quand defora l'atacaren,
  Es vrai que portoun de canullas,
- 290. De seringas e d'espatullas, Cisèus, tira-peds e trinchets, E martels, tout ce que voudrés; Ou vole! mais an-ti de pougna? Se pot-ti veire sans vergougna
- 295. De toulhauds couma vautres ses, Que chacun, de la car qu'avès,

N'abilhariàs una vintena, Crenì de gents d'aquela mena?... Venès, oubrigan lou pourtau,

- 300. E davans qu'ajoun fach soun trau, A Sent Crespin, à Senta Luça, Anen bailà tapa sus l'ussa!...» Tout disent: — «Bailen un tapin A Senta Luça, à Sent Crespin»,
- 305. Nostres Cadaroussiens partissoun,
  Oubrissoun la porta e sourtissoun.
  Es vrai que lous Avignounés
  D'abord segueroun fort surprés
  De veire defora la porta
- 310. Lafulhada embe soun escorta, Car eles li serien intrats, Se s'eroun un pau poussedats, Mais las femnas que demoureroun, Au nas de toutes la barreroun,
- Li pouguet pas intrà noun plus.

  Per força aquì fauguet se batre;

  Un d'eles n'en valiè be quatre,

  Mais enfin malas gents soun trop.
- 320. Lafulhada, dau premiè cop, Toca un frater sus la babina E lou fai toumbà per esquina.

L'autre se releva en disent:

— « Anen, bon! me manca una dent!

- 325. Mardi! la planisse, es daumage!»
  Aqui coumencet lou carnage.
  Un certen Antouena Espinas
  Soufletet un grand sabrenas
  Que tout de suita, en voulent courre,
- 330. Dins un valat toumbet de mourre.
  Un autre, en cercant soun tranchet,
  Recasset un autre souflet
  Aplicat per lou mema Antouena;
  Un coumpousitur d'antimouena
- 335. S'aprocha, una espatulla en man,
  Mais, à mesura que prend vanc
  Lou dich Antouena vous l'espelha
  D'un grand cop d'arpa sus l'aurelha,
  Aquel Antouena era pertout:
- 340. Lou vesiàs tantos emb un bout,
  Tantos à l'autre, e sa furia
  Era l'ounou de la patria!
  Un certen Pierre lou Garrel,
  Seguit de Jaques Gautarel,
- 345. Anet enlevà la banieira

  De la coumpagniè menusieira,

  Lou que pourtava l'estandart

  Aget dous tapins de sa part,

E, per faire trop l'oupiniastre,

350. Seguet virat d'un bel emplastre.

— « Moun Dieu, diguet en se fretant,

Veiàs-l'agui, piqués pas tant!

Vejàs-l'aqui, piqués pas tant!....»

Mais la coumpaniè touta entieira

S'acousset vite à la banieira

355. E tant luchet, tant s'escaufet, Que tout lou drapèu s'estripet. Pierre n'empourtet una pelha A la plaça d'un floc d'aurelha Qu'aviè perdut dins lou debat.

360. Jaques, au pus fort dau coumbat, Venguet borni, sauvet sa glouera, E sans bralhas cantet vitouera: Mais pioi reneguet couma un fol, Quand veget qu'avie pas qu'un iol.

365. Un noumat Pergori Latroussa,
Lou pus ventrut de Cadaroussa,
S'acoussava vers un talhur;
L'auriè crebat! mais per malur,
Anet brucà contra una mouta,

370. E barrullet couma una bouta.

N'emporta! en roudant alounguet

Tant de talhurs qu'endevenguet;

Tout lou resta, en li fasent plaça,

Cridava: — « Gara la bestiassa! »

- 375. Mais vous faliè veire lou trin
  Que faguet un autre mutin
  Apelat Guilhaume Labuta:
  Noun se plasiè qu'à la disputa;
  Moun Dieu! lou michant garniment!
- 380. Atacava endiferament

  Tout ce que li aviè dins l'armada,
  Ouficiè, sarjant, anpeçada,
  Sarraliès, talhurs, courdouniès,
  Charrouns e jusqu'as aumouniès!
- 385. Per la barba emb tant de coulera Rebalava un reverand pera Que, se lous pèus avien tengut, Mourre e pèu, tout seriè vengut!... Per bonur, la senta crinieira
- 390. Era d'una bourra estrangeira.

  D'avedre antau mancat soun cop,

  Tout courrissent, au grand galop,

  Boumba lou fifre sus la maissa,

  Tomba lou tambour sus la caissa,
- 395. Copa las reglas d'un maçoun Sus las espallas d'un charroun, E reven cargat de lesenas Arrapadas à sas coudenas.

Pas mens terrible e pus brutau,

400. Un certen Nicoulàs Barrau

Prenguet una imou tant cruela Que faguet pire que la grela: De soun ase, à grands cops de ped, Davalet un marchand fripiè;

- 405. Mais aget piatat d'un orfebre, Car lou gariguet de la febre D'un cop de poung dins l'estoumac, Ce que faguet vuidà lou sac. D'aquì se jeta dins l'armada
- Tusta l'un, met l'autre jout el, Graufigna aqueste, mord aquel, Emporta la peça qu'arrapa, Rend vint souflets per una tapa,
- Que lous pèus, las dents e lou nas.

  Mais quau countarié l'aboundança

  Das esplouets, das trets de valhança

  Que faguet dins aquel varal
- Es aquel que se distingava!
  A la maniera que picava,
  Auriàs dich que lous pus ardits
  N'eroun pas que sous apendris.
- 425. Couma lou pus fier das coursaris, Toumbet sus lous apouticaris...

Lon sap coussi la jalousie Irrita las gents dau mestie! Passa au travès de cent canullas,

- 430. Brava seringas e spatullas,
  Ranversa mourtiès e canouns,
  Tapina mestres e garçouns!
  Dins lou desordre aqui se bagna
  E l'on noun vesiè per campagna
- Presque morts de cops ou de pou!
  Cepandant, malgrè soun audaça,
  Li avien tant jetat sus la faça
  D'oupiatas e de lavaments,
- 440. De medecinas e d'enguents,
  Senè, tartre, manna e rubarba
  Que sous iols, sa maissa e sa barba
  Regoulavoun de tout coustat,
  E tout soun corps n'era inoundat.
- 445. N'aviè suçat quauquas oundadas, E vous li venguet de trincadas, Pus vivas que las d'un malaut Que C... trata à l'espitau. Fauguet vite que s'assetessa,
- 450. E, dins un moument, que faguessa...
  De que? passen sus aquel fet
  Grossa purga fai grand efet;

Mais, s'atacàs la bourjouesia, Fourbiàs toujour la farmacia.

- 455. Lou marechal, antau bourrat,
  Era aqui dounc fort afairat,
  Quand lou Reverand Pera Ambrouesa
  S'avanset per li cercà nouesa:
  Lou prend bras dessus, bras dessous;
- 460. S'alongoun au sou toutes dous,
  Lou vira, revira, bourdouira...
  Per bonur l'autre aviè la fouira,
  Mais tant faguet, tant alenet,
  Que Pera Ambrouesa se purguet,
- 465. E prend sa part d'una courranta Que n'auriè fach dansà quarranta. L'un lion de l'autre, aqui dessus, Se separeroun fort counfus, Per anà pausà sa danrea.
- 470. Entremens Dona Renoumea,
  Que mescla toujour per mitat
  La messorga e la veritat,
  Diguet que la man angelica
  D'un enfant de Sent Douminica
- 475. Aviè massacrat sans resoun

  Lou marechal en trahisoun.

  Aquela funesta nouvela

  Changet lou trin de la querrela,

E lous qu'avès vits tant ardits
480. N'en segueroun embasourdits;
Tout maudissiè, tout detestava
Lou Pera Ambrouesa, que pestava
De se veire antau tant menat
Après avedre tant junat.

485. S'acousseroun vite à la porta; Mais una noumbrousa cohorta Que se li era messa davans, Lous escartet en se moustrant.

L'illustre chef de la Crouesada

- 490. El meme li l'aviè pausada, E tant rudament lous menet
  Qu'à la fin lous envirounet.
  Lou soul espouer de Cadaroussa
  Aget touta una armada en troussa.
- 195. Dedins n'aviè pas demourat Que las femnas e lou curat, Soun clerc et Moussu lou Vicari, Que toutes tres, dins lou breviari, Despioi dous jours eroun après
- 500. A cercà vespras de la pes.

  Cepandant lou signal se dona;

  Fifre, auboi, troumpeta, tout sona:

  E l'ecò deven à soun tour

  Fifre, auboi, troumpeta e tambour;

- 505. Se livra anfin una batalha

  Que faguet tramblà la muralha.

  Lous menusiès, armats d'aissets,

  De manairas e de ressets,

  Ourgoulhousament s'avanseroun;

  510. Mais lous enemis lous freteroun
- Couma un regent, dins sa fouliè,
  Tapina un pichot escouliè.

  Lous pegots prengueroun sa plaça;

L'er menaçant, l'iol plen d'audaça,

- Espadrounoun dau tira-ped,
  Degainoun tranchet e lesena,
  E se serien batuts sans pena,
  Mais se vireroun en cridant:
- 520. « Antouena li es, gara davans!»

  La legioun de Senta Luça,

  Per pas croucà tapa sus l'ussa,

  De lion menaçet dau cisèu

  E demouret jout soun drapèu.
- Mais que prend fioc couma d'estoupa,
  Marchoun lou martel d'una man,
  E de l'autra lou buta avans.
  Lous enemis lous desfisavoun;
- 530. Mais de veire que s'avansavoun

En demouns sourtits das anfers, Qu'eroun soustenguts das fraters E seguits das apouticaris, De la mort cruels coumissaris:

- Nous podoun sounà nostres clas.
  Faudriè que lou diable petessa,
  Quand embe nautres se metessa;
  Mais, pourtant, mourì per mouri,
- 540. Embe glouera au mens fau peri! »
  Virgile ou dis, n'en fau pas rire,
  Lou desespouer es un grand dire;
  Autras fes soun prince trouien
  Se sauvet per aquel mouien,
- 545. Mais se lous Grecs, dins la batesta, Li avien rebilhat à la testa D'enguent gris, d'assa-fætida, De pilullas, et cætera, Tout lou desespouer que supausa
- Oue que n'en siè, vengan au fet.

  Lou desespouer dounc arrapet

  La banda que se refrougnava

  Dau dangè que la menaçava:
- 555. De tout coustat venoun as mans; Gis segueroun pas feneants.

Tout piquet, dins aquela festa, Dau ped, de la man, de la testa; E bouta, e gara, e tu n'auràs!...

- 560. Lous fraters, mitat engrunats,
  Cridavoun: « A moi, bourgeoista! »
  Lous marechals, dins sa furia,
  Fasien varalhà sous martels;
  Lous autres, à cops de capels,
- 565. Adrechament lous embourgnavoun,
  Lous mourdien e lous graufignavoun;
  Un martel toumbava de çai,
  Prenien un buta-avans de lai,
  Talàment que la marechala
- 570. Danset anfin la martingala,
  E vitament s'en retournet
  Au premiè moument que troubet.
  Cepandant, lous apouticaris,
  Pus terribles que de coursaris,
- 575. Eroun aqui que tenien bon
  E batien l'enemic de lion.
  Urous s'agessa pres la larga,
  Quand li fagueroun sa descarga!
  Mais, elàs! d'aqueles guerriès,
- 580. A vint passes, l'on es trop pres : Tireroun d'aquela distança, E vous faliè veire la dansa!

Las pauras gents empouisounats, Des qu'aco li mountet au nas,

- 585. Tout de suita se debanderoun,
  De çai de lai pertout rouderoun;
  Lous autres lous acoutissien
  A mesura que fugissien,
  E, trop malauts per se defendre,
- 590. Segueroun fourçats de se rendre:

  Toumberoun miech morts à l'envès.

  Alor, chacun das aumouniès,

  Lioga de demandà lur graça,

  N'en fiquet un dins sa besaça,
- 595. E la sarret emb un courdoun.
  Avien bèu demandà perdoun,
  Fauguet au founs d'aquela aisina
  Qu'anessoun rendre medecina,
  E que restessoun sus lou jas
- 600. En atendent d'estre penjats.

  Una jouve, galharda e bela,
  E legitima, e naturela
  De nostre famous marechal,
  D'un trau devista aquel rambal
- 605. E planta aqui sa couteria,
  Per anà sauvà sa patria!
  Se voulès aprene soun noum,
  Era la charmanta Françoun!

Vite couma una degoulhada,

- 610. Sourtiguet touta espantoulhada,
  Sans prene fichu ni vantau,
  E faguet ouvri lou pourtau.
  L'armada, sus aquel spet cle,
  De tout coustat cridet miracle;
- 615. E de veire un oujet tant gras,
  Eroun toutes enmedusats!

   « A quau n'en vou Madoumaisela?
  Li dis un barbiè sentinela... »

   « Soui la filha dau marechal.
- 620. Demande vostre general:
  Digàs-me li que venga vite,
  E qu'à Cadaroussa l'envita
  A venì prene un det de vi,
  Se me vou faire aquel plesì. »
- Pantaloun, sans se faire atendre,
  Pres d'ela au pus lèu ven se rendre,
  E d'abor planta sous regards
  Sus un gros miech-quintau de cars
  Que la bela Judit mouderna
- Per aqui cuget oublidà
  Que venièn per lou couvidà,
  Mais la bela, seloun l'istouera,
  Li ou remetet dins la memouera.

635. — El li dis — « Eh be, que voulès?...»

— « Que relachés lous prisouniès,

E que fagàs fin d'astinença».

Respond, emb una reverença,

Françounassa, d'un er counfus.

- 640. « Certas! aco's pas de refus,
  Dis lou chef. Avès ma paraula...
  Mais vite anen nous metre à taula ».
  En parlant antau, toutes dous
  S'en van bras dessus, bras dessous;
- 645. Introun dins la vila, refermoun,
  Dins una cousina s'enfermoun;
  E tant li brafet, tant fieulet,
  Pantaloun, que s'enchichourlet!
  Quand aget ben pres la minota,
- 650. Françoun, qu'era pas una sota,
  Li demandet de l'espousà...
   « Ieu vous ou vouliei proupausà,
  Diguet lou general ivrougna;
  Mais, per faire aquela besougna,
- 655. Fau de noutaris, de papiè,
  D'ancra, una espeça d'aumouniè... »
   « Oh! boutàs! segàs pas en pena,
  Auren de touta aquela mena
  Dins un moument, li dis Françoun. »
- 660. Moun Dieu!... Lou brave Pantaloun,

Aqui dessus, sauta, l'embrassa, E, quoueque seguesse fort grassa, Aget lèu menat lou curat Per veni passà lou countrat,

665. (Tout curat era adounc noutari);
Per temouens, li aget lou vicari
E lou clerc, que lou seguissien;
Dous temouens alai sufisien.

Lou registre espandit sus taula,

- 670. Lou capelan prend la paraula,
  E demanda au grand Pantaloun
  Ce que vou faire de Françoun.
   « La vole fa, s'ou dis, coumtessa,
  Marquisa, duchessa e princessa. »
- 675. « Bon! mais ounte es vostre coumtat?..»
  - « Es à Cavalhoun, dins un prat... »
    - « Vostre marquisat?... » « Dins la jassa Ounte loja moun garda-cassa... »
  - « Bon! es escrich... » « E lou duche? »
- 680. « Es situat jout un pechè... »
  - « Fort ben!... encara una demanda:

La principautat es-ti granda?»

- « Oh! per aquela, moun ami,

La tene dins un pergami,

685. E n'en save pas l'espandida, Car l'ai pas encara legida. »

- « Prenès la plouma e signàs-vous. »
- « Prengan la pluma e signen-nous...

A vous, Madama la Coumtessa,

- 690. Signàs-vous ardiment Princessa, Marquisa, Duchessa, Françoun, E mouliè dau grand Pantaloun!» — « Aça, bailàs-vous la maneta,
  - Que vous benigue ara memeta.
- 695. Parlàs, entremens que li soui:
  Vous voulès-ti?... » Digueroun oui;
  E dins tres cop d'aiga benida,
  La causa se trouvet finida;
  La cadeta d'un marechal
- 700. Seguet femna d'un general!

  Pantaloun celebret la festa
  En prince qu'a perdut la testa;
  Lou vespre, era tant abestit
  Que s'anet couchà tout vestit.
- To5. Lou lendeman, sa chera espousa

  Li demandet, touta jouiousa:

   « Eh be! moun marit, que fasès?

  Coussi vous trouvàs, que disès? »
  - « Vostre marit, Madoumaisela!
- 710. Per ara, me la countàs belà! »
  Diguet Mounsegnur irritat...
  - « Oui, oui, moun marit, per countrat;

- E l'on n'ou prendriè pas per rire, Se pensaves à vou'n de dire;
- 715. Vau mai vieure couma devès

  Embe vostra princessa, en pes;

  Autrament ses mort dins una oura...»
  - « Oh! plan! ma femna! E despioi quoura Jouïsse d'aqueste bonur? »
- 720. « Despioi ier au souer, Mounsegnur! »

   « Eh be! longa-mai! te, te jure,

  Que pregue lou ciel qu'aiço dure

  Un parel de cents ans!... Anen,

  Toca la man, e dejunen!
- 725. Dises que la soutisa es facha?

  Tant mius! pendut siè quau s'en facha!...

  Ara, fau restablì la pes.

  Relachà vostres prisouniès,

  Prene lou blat que vous demanda
- 730. Lou Vice-Legat que nous manda, Fa manjà las gents qu'ai menat Jusqu'à ventre desboutounat; E doublà surtout la vitalha Per countentà la mouinacalha.
- 735. Quand seran sadouls, dansaren,
  E deman nous enanaren.
  Mai qu'empourten força tousela,
  Avignoun, countent de moun zela,

- Soui segu que, quand ou sauprà,
- 740. Couma un Cesar me reçauprà, E que faran, sus ma vitouera, De verses dignes de memouera: C'et-à-dire n'i aurà pas un Que noun blasse lou sen coumun;
- 745. Mais, es ben de prene la broda E de s'endourmi sus una oda. Tus, ma chera femneta, tus, S'alai t'apeloun pas Venus, Per lou mens lou mot de Deessa.
- 750. Faudrà que tombe embe Duchessa, E que la rima de Junoun Marche emb aquela de Françoun. Veiràs, veiràs, quinta filada N'en van faire à nostra arrivada!...
- 755. Per ara, tas gents ensacats
  Es tems que siejoun destacats,
  E que menoun à lur cousina
  Lous nostres miech morts de famina. »
  Lou chef parla, l'ordre partis:
- 760. Lous Avignounés, avertits,
  Copoun lou liam de la besaça;
  Tout se perdouna, tout s'embrassa,
  E segueroun en quatre sauts
  Dins la vila e per lous oustaus.

- 765. Aviei proumés qu'aquesta istouera Espausariè de lur machouera L'enfatigable acharnament; Que la veiriàs en mouvement Faire mila trets de valhança,
- 770. D'ardou, de força e de coustança;
  Mais, pecaire! à moun grand regret,
  Soui trop flac per aquel sujet
  Juste Ciel! e quau pourriè dire,
  Quau pot dignament vous estruire,
- 775. Das proudiges qu'aquela fes Fagueroun lous Avignounés? D'estournels sus las oulivedas, La tartalassa sus d'anedas, Au bosc una banda de loups
- 780. Sus un escachou de moutous, Ni lous mouines sus la fricassa Lou bèu jour de sent Bonifaça, Elàs! noun toumberoun jamai Couma eles fagueroun alai
- 785. Sus la pitança frecha e cauda.
  Dins aquela senta marauda.
  Sas dents fasien un tel fracàs
  Que s'ausissien de Carpentràs!
  E de la façoun qu'envalayoun,
- 790. Aurias jurat qu'escamoutavoun!

Mais fau que tout prenga una fin : Quand segueroun ples de butin, Trouqueroun sas quinze carretas Cargadas de plats, de fourchetas,

795. È de ce qu'avien embalat, Per dous cents carradas de blat, Adounc desplegueroun banieira. Françoun partiguet la darnieira, En croupa darriès Pantaloun.

800. Tout aco regagna Avignoun.

Mais, à la plaça de l'absouta,

Canteroun tant, long de la routa,

De Te Deum, d'Alleluia

804. Que poudien pas pus grangalà!



## A M. DE MALIDA

EVESQUE DE MOUNT-PELIÈ

A SOUN RETOUR DE PARIS

. . . . •



### A M. DE MALIDA

EVESQUE DE MOUNT-PELIÈ

#### A SOUN RETOUR DE PARIS

E longa-mai!... se pot pas creire
Couma languissian de vous veire!
Bailes, pastres, troupels, tout se cresiè perdut.

— « Quau sap, disiè la trista cola,
Coussì vai nostre majurau?

La pena ounte nous laissa es pas una babiola.
Es-ti galhard, es-ti malaut?

Preservàs-nous, grand Dieu, de touta desfourtuna!

Ou se nous en mandàs quauqu'una,

----

Que siegue pas, au mens, un tant gros petassaut;
Sa santat nous fai tant de gaud
Qu'aimarian mai dau ciel veire toumbà la luna
Que s'aquel sourelhet preniè lou mendre mau!»

15. Mais laissen per qu'inlai lous chagrins de l'absença,
Nostre mestre es vengut galhardet couma un sou;
E, Dieu mercì, touta la pou

Es garida per sa presença...

Parlen de quicon mai per ieu pus croustilhous.

20. Vint ans i'a, Mounsegnur, que, graça as envejous, Rode per lou terraire e de vostras oualhas, Tantos çai, tantos lai, mene las rascassalhas.

Moun cor es d'afouns estequit.

Mais ara que çai ses, saven que la justiça

25. Seloun lou drech, reglarà la pouliça.

Ensin souet-il, aco sufit!
Ai d'autras causas à vous dire
Despioi que de vostres moutous
Garde antau quauques escachous;

30. Per escartà lou loup soufrisse lou martire. Lou gus de lion en lion lous seguis per detràs,

S'aclata dejout un bartàs,

Se releva tout plan, se sarra cauta à cauta E, se vei feda ou beligàs,

35. Un pauquet trop endarrairats, Ai, lou voulur! coussi ie sauta! Quand me lous escamota pas,
De segu que n'es pas sa fauta.
Vous qu'ara ou menàs tout sus la dralha dau ciel,
40. Per empachà que lou loup vous espelhe,
Mema lou pus pichot agnel,
Savès-ti ce que vous counselhe?
Metès davans tout lou troupel.



T. . **\** 

# ENVOI

A M. LE VICOMTE DE SAINT-PRIEST

• •



### **ENVOI**

#### A M. LE VICOMTE DE SAINT-PRIEST'

oin de mes vers l'emphase pédantesque,
Ton endormeur, fléau de tout plaisir:
J'ai vu jadis que ma lyre burlesque,
Avec les traits naïfs d'une image grotesque,
De votre illustre père égayait le loisir.
Un tel succès est une douce amorce;
Pour amuser le fils elle voudrait saisir
Cet heureux tour: en a-t-elle la force?
Je n'en sais rien: des soucis, des tracas,
Dix ans de plus ne le promettent pas.

5.

IO.

<sup>&</sup>lt;sup>1</sup> Cette pièce sert de dédicace à l'*Eneida* dans les manuscrits de la Bibliothèque du Musée-Fabre.

Mais que ne peut l'objet qui m'encourage Désir de plaire et crainte d'ennuyer? Quels aiguillons! je vais tout oublier Pour réussir, mes chagrins et mon âge.

15. Avec cela fallût-il échouer,

Je compte sur votre suffrage. Car, genereux Saint-Priest, vous êtes trop humain Pour ne point excuser les défauts de l'ouvrage,

Du moins en faveur du dessein.

20. Ma muse surannée en cette bagatelle
Peut tromper mon attente et trahir mes souhaits,
Répandre sur mes vers une froideur mortelle,
Des outrages du temps déplorables effets,
Mais je sais bien que l'ardeur de mon zèle

25. Pour le sang de Saint-Priest ne vieillira jamais.



L'ENEÏDA DE CELA-NOVA





## L'ENEÏDA

#### LIBRE PREMIÈ

EU que noun cante, ni noun sible
Que quand li a quicon de terrible,
Temouen la vila qu'au Coumtat
Assieget un vice-legat,
Ome à faire man-bassa à taula,
Sus vint capous de Rocamaula;
Ioi vau cantà lous petassaus,
La malurança e lous assauts
Qu'aget un prince de Frigia
10. En caminant vers l'Italia.
Aquel moussu, tratat dau ciel
Couma lou mendre bicarel,

Noun gagnet sus mar e sus terra Que malandra, famina e guerra,

- 15. Jusquas à tant qu'aget plantat Lous menuts dieus qu'aviè pourtat Dins Alba, sa nouvela vila. Es d'aqui, nous aprend Virgila, Que sourtigueroun lous Albens,
- 20. E pioi Rouma, e pioi lous Roumens.
  Alerta, Musa de garriga,
  Tus, qu'amai l'on noun se prusiga,
  Saves gratà tant finament
  Qu'on li trova countentament,
- 25. Veni, l'istouera es fort poulida. Mais fagan pas una Eneïda Que semble aquela de Scarroun, Encara mens la de Maroun; Bufa-m'en una que siè mieuna,
- 30. E laissen à chacun la sieuna:
  Lou toun de Virgila es trop bel;
  Lou de l'autre es pas naturel.
  Vole una Eneïda galoia,
  Simpla e que mete tout en joia,
- 35. Per tant que conte de guignoun. Or, diga-me per que Junoun, Qu'es reina das Dieus, e que limpa Lou milhou nectar de l'Oulimpa,

- Menava un prince tant devot

  40. Couma l'on mena un bourriscot?
  Per una Dieussa tant urousa,
  Pardine! era ben bechicousa!

  Las grands gents d'amount serien-ti
  Couma aqueles qu'aven aici?
- 45. Saique diràs qu'aviè sa vista
  E que lou cresiè jansenista:
  Ieu vole qu'ou seguessa un pau,
  Car l'on pot estre prince e bau;
  Mais lou gros emboul de l'escagna
- 50. Veniè de touta autra magagna.

  Au dire de fort bravas gents,
  Autras fes certens Tiriens
  Avien, sus la libica plaja,
  Foundat la vila de Cartaja.
- 55. L'endrech d'abor seguet pau fet, Mais à la fin tant se puplet De fabricants de papelina Que venguet richa e fort mutina. Junoun, qu'aima lou terrigos,
- 60. Per ela quitava Samos:

  Li aviè fach faire una remisa;

  Li teniè soun caufa-camisa,

  E dins l'estieu, quand Jupiter

  Li disiè d'anà chanjà d'er,

- 65. Malgrè lous acesses de febre, Li courrissiè couma una lebre. Aimava tant Cartaja anfin Que, s'aviè reglat lou destin, N'auriè fach, à força de guerra,
- 70. La capitala de la terra;
   Mais lou destin es pas galant
   E lous arretz d'aquel chaland
   Noun dependoun d'un poulit mourre,
   Ni de l'argent que l'on fai courre.
- 75. La capignaira agent sauput
  Que, quand lou tems seriè vengut,
  De grivouès de raça trouiena
  Devien fretà la tiriena,
  De maniera que sa citat
- 80. Seriè dalhada couma un prat; Que restariè pas que la plaça D'aquela superba vilassa E que las tres sorres d'aval Li filavoun aquel traval,
- 85. Poudès me dire se fougnava, Saturnela, quand li sounjava! Ela qu'à venjà sous atrets Aviè tant empusat lous Grecs, Quand Paris l'aget mesprisada,
- 90. Après l'avedre ben touesada:

Sans coumtà que se souveniè Qu'una fes Jupiter aviè Dau mema sang causit un page Que troublava tout lou mainage.

- 95. Tout aco l'endinnava fort
  E tant pesava sus soun cor
  Que la bona ama, en counsequença,
  Das Frigiens per penitença,
  Fasie roudà lou demourant
- 100. Couma lou paure Juit-errant.

  Ben n'en costa, dins la paurieira,

  Per sourti de la pesoulieira;

  Ben devien pati lous Trouiens

  Per faire sous nebouts Roumens.
- Aviè mes au vent, fort countenta,
  Lous fitrèus de tela qu'aviè,
  E ramava couma poudiè,
  En s'escartant de la Sicilla,
- E que recousie dins sa pel
  Contra ela un desfeci mourtel,
  Se met à cridà: « Jarnidiena!
  Qu'es aiço?... la flota trouiena,
- 115. Menada per un emperit, Me dounariè lou dementit!

Abourdarie dins l'Ausounia! E soun chef aurie Lavinia, La filha de mestre Laurens!

- 120. E lou couqui, malgrè mas dents, Seriè gendre de dona Aamda! Oh! quand saupriei d'estre assoumada, Vole empachà que Latinus Siè lou bèu-pera d'aquel gus.
- Noussi! Minerva, ma filhastra,
  Qu'es beucop mens que sa mairastra,
  Per un mot que lachet Ajax,
  L'aurà crebat contra un roucàs,
  Emb un tron que, per aco faire,
- 130. Un souer manlevet à soun paire;
  Aurà savounat à la fes
  Cent Grecs que li eroun pas per res,
  Sans qu'amount sus tala besougna
  Li ajoun fach la mendra vergougna!
- 135. E ieu, qu'ou porte dau grand er,
  Ieu femna e sur de Jupiter,
  Ieu que soui pourtada en cadieira,
  Quand lous Dieus van à la bandieira,
  Me fau luchà, despioi dech ans,
- 140. Contra un pougnat de sacripants!

  Quau voudrà, se noun lous vincisse,
  M'oufrì lou mendre sacrifice?

Restarà-ti quaucus prou bau Per m'imoulà vaca ni brau?

- Pas una auca, pas una feda,
  Pas una auca, pas una aneda;
  Baste un lasert, baste quicon,
  Baste au mens lou fum d'un estron! »
  Sus aquel lagui, Saturnìa
- Oue s'en anet, tout renegant,
  A la cour ounte es lou sagan,
  C'et-à dire, couma una fola,
  Que courriguet enco d'Eola.
- Regna à la cima d'un roucàs,
  Sus lous vents e sus las tampestas,
  Vilens sujets, michantas testas,
  Que contra lou gouvernament
- 160. Roundinoun fort ouvertament.

  A pena entre eles se patissoun;

  Se quichoun, rodoun, s'acoutissoun.

  Lou prince qu'a bèu li parlà

  Jamai noun lous fariè calà,
- 165. Mais prend sas lunetas, sa fresa,
  Li vieulouna la bourbounesa,
  Moucel que lous embalausis
  E couma aco lous adoucis.

Eola es un dieu de genia,
170. Se n'era pas sa simfounia,
Soui segu que lous esfrountats
Fourçarien prisoun e roucàs,
Metrien, en fasent la drilhança,
Er, ciel, mar, terra, tout en dansa,

- Ou'auriàs pena à trouvà lous flots.

  Graça à Jupiter an un mestre

  Qu'a souvent prou pena de l'estre.

  En arrivant, mos de Junoun,
- 180. L'arenguet d'aquesta façoun:

   « Ah! salut, camarada Eola,
  Eh be, fasen toujour l'escola?

  Me sembla qu'aquestes manits
  Languissoun de n'estre sourtits?
- 185. Quintes ouvrieirots de la gança!
  Anen, li cau dounà vacança.
  Couma aco plesì li farés
  E vous, au mens, vous pausarés.
  Après tout un dieu de vostre age,
- 190. Es bon que lou som lou soulage, Dins tout aiço, saique cresès Que parle un pau per interès? Avès pas tort, car tresfoulisse Contra una flota qu'acoutisse,

- 195. E bonament vene pregà
  Eola de me la negà.
  Amai quaucus que m'es ben proche,
  Vous aja dounat sans reproche,
  Lou drech de faire, quand voudrés,
- 200. Jougà pertout vostres bufets,
  Fau pas endaco que dounilha
  Per aiço soul mene tournilha;
  Mais espere tout d'un present
  Que vous serà pas desplasent.
- 205. Ai amount quatorze chambrieiras A pintrà sus de tabatieiras, De tant poulidetas que soun. Aquela qu'a milhou façoun Es sans contredit Dejoupeta.
- Es un pau guincha, se voulès,
  E fai lou pountil per darriès;
  Mais, se la vesiàs lou dimenche,
  Quand s'es dounada un cop de penche
- Certa, moun ome Jupiter
  Vou'n pourrie dire sa pensada...
  Ier toutes dous, à la velhada,
  Tant me fasien perdre lou som
- 220. (N'es pas que li ajessa quicon,

Car, segu, moun ome m'adora), Mais... mais, la metere defora; E per vous tene lou cor gai, Se voulès, vous la dounarai.

- 225. Per tant que vougàs de familha, Poudès coumtà qu'es una filha A vous faire chaca nou mes Vint, vint-e-cinq, trenta Eoulets. Ou save par esperiença
- 230. E vous ou dise en counfidença
  A vous, par ça que ses discret
  E que fau tene aiço secret,
  Per li pas pourtà prejudice.
  Emb un mot, sembla que lous pisse
- 235. E vous fau ben counsiderà
  Qu'eternelament vou'n farà,
  Ce que vous deu chatoulhà l'ama. »
  Eola li respond: « Madama,
  Me gratàs ounte me prusis,
- 240. E coumprene de que s'agis...
  Mais digàs, valè-ti la pena
  Que me dounés aquela estrena
  Per ce que venès demandà?
  Era pas prou d'ou coumandà?
- 245. Quand Jupiter a fach Eola Pera prefet d'aquesta escola,

Coumtàs be que nous souvenen Qu'es de sa mouliè qu'ou tenen E que chaca fes que l'on grimpa

- 250. Amount à la cour de l'Oulimpa,Se li chiman lou nectar pur,N'es pas per ordre de moussur.E fau qu'encara una femnetaNous venga de vostra maneta.
- Fau, pardines! qu'au grand galop
  Mous galhards sautoun sus la flota
  E que la metoun en coumpota.
  Vite!... alerta!... » En cridant antau,
- 260. Davalet e faguet un trau,
  D'un cop de testa, à la muralha,
  D'ounte touta sa bagassalha,
  Revoulumada en tourbilhoun,
  Sourtiguet en grand carilhoun.
- 265. Li toumbet toutas sas guindoulas, Sas agrunelas, sas mespoulas; Coupet de grels couma lou bras; Pus lion desteulet quatre mas; Pecaire! embourgnet de poussieira
- 270. De gents que venien de la fieira; Desquilhet d'un pountil aval Un ase cargat de rambal;

Mais tout aco vau pas lou dire, E la jouinessa aima de rire:

- 275. Es sus mar qu'aqueles voulurs
  Fagueroun lous pus grands malurs.
  D'abor, à força de bufadas,
  Tant boulegueroun las oundadas
  Que pertout emb un bruch counfus
- 280. Se vireroun dejout dessus.

  Lou marinàs, lou vent d'Africa,
  Lou grec, celebre schismatica,
  Dins l'emboul units toutes tres

Couma fan lous copa-jarrets,

- 285. Fasien tricoutà tant d'aigage
  Que passava lou badinage.
  De veire antau sautà lous flots,
  Prince, pilota, matelots,
  Moussis jusqu'à la mendra corda,
- 290. Tout cridava misericorda!

  E, per n'i'n dounà mai sujet,

  Sus la mar la nioch s'ajasset.

  Poudès me dire quinta festa,

  Quand noun vegeroun la tampesta
- 295. Qu'à la clartat de gros elhaus, Seguits das trons lous pus toulhaus, E la mort que s'era poustada, A soun entour dins chaca oundada!

Eneàs, tout rede de frech,
300. L'estoumac gros, lou cueu destrech,
Las mans au ciel, en granda amfasa
Lachet adounc aquesta frasa:
— « Ah! que soun urous lous amis,

- Qu'ai perdut aval au peïs,

  D'estre morts en fasent la joia
- 305. D'estre morts en fasent la joia
  Das erities qu'avien à Troia!
  Qu'es urous, moun cousin Ector,
  De s'estre fach traucà lou quior
  De la man dau fil de Pelea!
- 310. Voudriei be que lou de Tidea M'ajessa fach lou mema doun! Que seguet urous, Sarpedoun, D'estre mort embe sa bedena Cruvelada à cops de lesena!
- Per lous que lous Grecs an jitat
  Embe soun casque e sa rapieira
  Dins lou found de nostra rivieira! »
- Antau parlava lou rigris,
  320. Quand un vent li prend d'agalis,
  Lou viel fatràs qu'aviè per vela
  Sa miserabla caravela.
  Las ramas an dejà petat;
  Lou bastiment, tout de coustat,

- 325. D'aqueste baissa, d'aquel leva, E l'equipage fai coulleva: L'un es amount, l'autre es aval; Jujàs un pau quinte traval! Aco seriè pas res encara,
- Tres galeras que met à flocs
  Contra d'autels que soun de rocs.
  Lou grec, sus aquela entrefeta,
  Couma se n'aviè fach l'empleta,
- 335. N'enmena autras tres à grand pas, E las rescond dins un sablàs, Una de quau, saique per courre, Lou patroun s'alounguet de mourre, Era aquela das Liciens,
- 340. Assouciats das Frigiens.
  Viroulet couma una baudufa
  E s'amaguet couma una trufa.
  Orounta que li era dessus
  Emb ela faguet lou cabus
- 3.45. E, de tant de bravas gents qu'eroun, Quatre souls moussis escaperoun Ilionea, Achata, Abàs, Aleta coulavoun à bas, De tant d'aigalossis qu'intravoun
- 350. Dins las tartanas que menavoun.

Lou boi pertout era fendut.
En un mot, tout era perdut.
Mais Neptuna que transvasava
Un mioch de nectar dins sa cava,

- 355. E que veget qu'aviè poussat:

   « Oh! s'ou dis, quicon s'es passat

  Que m'a virat aquesta bouta. »

  Aqui dessus l'atapa, escouta

  E cerca l'esclercissament
- 360. D'un tant fachous evenament.

  Dessus l'aiga, en levant la testa,

  Vei que, d'una grossa tampesta,

  Lous Trouiens soun istats batuts,

  E que set vaissèus soun tounduts.
- 365. Coumprenguet be qu'un tour tant orre Veniè de sa diabla de sorre.
  N'emporta, en s'adressant as vents:
   « Qu'es aiço, li dis, insoulents?
  Es-ti vostra bela ourigina
- 370. Que vous rend l'umou tant faquina?
  Aprenès, banda de pilhards,
  Que de quau que segués bastards,
  Ieu crenisse pas fils de putas!
  Coussì! que de vostras flavutas
- 375. Vautres jougarés per aicis, Sans me demandà moun avis?

Fau que vous... mais vau mai per ara Que calmen aquesta fanfara; Souvenès-vous qu'una autra fes,

- 380. Se li tournàs, ou pagarés.

  Entremens, raca biscaïna,
  N'avès qu'à me virà l'esquina.

  Digàs à vostre majourau,
  Que n'es pas rei que de soun trau,
- 385. Que se tournà me cerca rena
  N'i'n coustarà septre e coudena,
  Que lou trove fort imprudent
  De se fretà de moun trident,
  E qu'un pichot dieu de fourtuna
- 390. Fau pas que luche embe Neptuna.
  Quau vous demandava sus mar
  Per me fa virà moun nectar?
  De nectar, mardì, que moun fraire
  Dins sa tina m'aviè fach faire!
- 395. Ah! lou gus... » Sus aquel prepau,
  Tout fugìs ou demora siau:
  Au sourel lous nivous fan plaça
  E la tourmanta à la bounaça.
  Lou Dieu se carra, e crida: « Ouè!...»
- 400. Tout de suita Cimothoé Embe Tritoun, soun calignaire, Venoun veire de que cau faire.

- « Fau, li dis Neptuna tout plan, Que me dounés un cop de man,

- 405. Per tirà dau found de la sabla Lous vaissèus que, couma una diabla, Ma sorre a fach negà de fres, Mais, au mens qu'ausiga pas res! Car vendriè couma la patroulha
- 410. E segu nous cantariè poulha.» Tritoun, qu'era jouine e garrut, Apuiat contra un roc bourrut, Se li met de touta sa força; La nimfa, en vegent que se força,
- 415. Li crida: « Tritoun, de que fas?... Moun ami, te relassaràs, E faudrà qu'anen à Lassala; Prend lous de biai, veni, davala; Toutes dous n'en vendren à bout,
- 420. Se lous arrapan per dejout. » Neptuna faguet un sourire, Signe qu'aprouvava soun dire, E de sa fourca tant bourjet, Qu'anfin tout aco sourtiguet,
- 425. D'aqui sauta dins sa berlina E vai visità sa quentina. Avès-ti pas vist quauquas fes,

Quand dous pelucarts se soun pres

Per lous pèusses dins una placa, 430. Couma li vai la populaca? Tout s'enfioca, tout li courris E, sans saupre de que s'agis, A cops de trinca, à cops de pala,

La batesta ven generala,

435. Mais s'adounc quaucus d'un grand er, Per esemple un ancien frater, Se mostra davans sa boutiga. Fin de garguil e de coutiga. Tout s'enfugis ou fai l'acord,

- 440. De la pòu qu'an de soun raport.
  Antau seguet lèu dissipada
  Das vents la troupa espaurugada,
  Quand veget Neptuna irritat
  Dau nectar que li aviè gastat.
- 445. Cepandant lou Eneadistas,
  Pus malauts que lous Jansenistas
  Après lou bal de sent Medard,
  S'agandigucroun sus lou tar,
  Noun pas, pecaire! en Italia,
- 450. Mais dins un port de la Libia,
  Que la natura aviè counstruit,
  Michant asille, paure estuit,
  Ounte noun vesiàs que roucalha,
  Per qu'in amount quauqua buscalha,

- 455. E de bas, per se refrescà,
  Pas una tenilha à pescà.
  Trouveroun, per touta ressourça,
  Jout lou serre, una brava sourça
  D'aiga douça: aurien preferat
- Mais lou paure mounde, foullira!
   N'a pas toujour ce que desira.
   N'en begueroun chacun un det
   Soulament per levà la set,
- 465. E pioi toutes s'estrantaleroun Sus de lausas que li trouveroun: Coumunament sus un roucàs, Lous setis soun pas de sofàs. Disoun pourtant que de Naiadas,
- 470. Que li tenien sas assembladas, En metent la cougourla au fres, Se li aloungavoun quauquas fes. Aco se pot, car la Dieussalha, Dins la fabla, es un pau gusalha,
- 475. E vese pas que lous paiens,
  N'ajoun fach de fort noblas gents.
  Dins lou port que vene de dire,
  Enea, après tant de martire,
  Embe sous veisseus se fiquet,
- 480. De quatorze reduits à set.

Faguet signe au fidele Acata D'anà veire dins sa fregata Se trouvariè pas un briquet Per li faire un pau de fiouquet.

- 485. D'uns rebaleroun la pastieira
  D'autres, sus una larja peira
  Mòugueroun quauque pau de blat
  Qu'era pourrit e ben salat,
  N'en fagueroun una fougassa
- 490. Goustousa que... bon prou li fassa.

   « Cavalisca! dis Eneàs,

  Maudits fourniès! m'empouisounàs:

  Au diauca fourniès e fournada!»

  Lou prince, la narra tapada,
- 495. Per se tirà lion d'aquel fioc,
  Mountet à la cima d'un roc:
  E, dau grand trin que l'escalava
  Auriàs jurat que davalava
  Tant l'oudou l'aviè rendut fol.
- Vers ounte aviè perdut Caïca,
  Anteüs, Capis e sa clica.
  Pas la co d'un noun n'en veget
  E vers la terra se viret.
- 505. Aqui seguet un autre afaire: Tres cerfs qu'aurien tirat l'araire,

Gras, lises, crebant dins sa pel, E seguits de tout lou troupel Que pasturgava dins las planas,

- S10. En moustrant soulament sas banas,
  Mai que Caïca ni Capls
  Lou meteroun en apetis.
  Vite prend dins sa gibecieira
  De que cargà sa canardieira
- 515. Qu'Acata, garçou ben après, Li aviè pourtat en cas de res; Se corba, aprocha, lous afusta; La canardieira era fort justa, E lou chi fasiè pas fau fioc.
- 520. Dau premiè cop, pouf! patafloc!
  Un; dau segound, dous; dau trouesiema,
  Tres; enfin jusquas au setiema,
  Chaca cop tant ben lous pincet
  Que n'en restet pas mens de set,
- 525. Autant couma aviè de tartanas.

  Acata, en vegent tant de banas,

  Cridet, emb un grand cacalàs:

   « Ai! mestre, que de Menelàs!

  Aquestes me rendoun la joia
- 530. Que l'autre me levet à Troia : Pardine, es ben vostre mestiè! Aco n'es pas estre coustiè;

S'un jour, per asard, de la cassa Vous cau tirà vostra vidassa,

- S35. Quinte bracouniè me serés!

  Anen, aqueste gibiè fres,

  Fau que se mange tout de suita:

  Vau fa preparà la marmita

  E mandà querre lou butin. »
- De vi raubat au bon Acesta,
  Qu'aviè sauvat de la tampesta,
  E, dau tems qu'aco s'aprestet
  A sous amis antau prechet:
- 545. « Enfants, tout se prend en coustuma,
  La clartat ven après la bruma;
  Ioi la guerra e deman la pes.
  Couma aco, manjàs e bevès,
  E moucàs-vous de la pouliça.
- 550. Lou Ciel, noun sai per quinta tissa,
  Bravament vous a fach salà
  Lou fricot qu'anàs envalà.
  Que faire? Benurous qu'espera
  De veire qu'après sa misera
- Ou'as gents faga veni lou som! »
  Entremens, per la repetilha,
  Tout lou resta s'escarrabilha;

- E degus noun s'endourmissiè, 560. Malgrè lou sermoun qu'el fasiè. L'on pot mema dira à sa glouera Qu'era goustat de l'auditouera
  - Car dau gibiè lavoun la pel. Un li neteja lou rastel,
- 565. L'autre n'en tira l'embounnada, Aquel copa una carbounada.
  - Oulas, plats, cassairola, gril, Tout marcha e surtout lou baril.
  - Metoun lous gros flocs à la brocha
- 570. E mitat crusa, mitat quiocha,
  - Touta la vianda s'avalis.
  - Lou rei manget sans apetis E dins un degoust efrouiable

  - Pas que dous gigots e lou rable.
- Esemts dau mau que fai la car, 575. Lous moussis, servits à despart,
  - Sussavoun las pels, las battetas
    - E la mesoula das banetas.
    - D'aiga, fresca tant que voulien,
- 580. Amai lous gus se planissien.
- Quand ageroun levat las taulas,
  - Manquet pas, certa, de paraulas.
  - Se tratet d'afaires d'estat;

  - Dau tems present, dau tems passat,

- 585. Espuiseroun la poulitica.

  Quinte malur que, dins la clica,

  Lou segoundari de Cournou

  Sourtiguesse pas d'un cantou!

  Aurien vist, aquelas masetas,
- 590. Qu'entre que s'agis de gasetas, Lou galhard las devigna au tum, E las legis de nioch sans lum; Mais n'era pas d'aquela banda. Chacun aquì s'entre-demanda
- 595. Ounte podoun etre passats
  Sous amis, vieus ou trepassats.
  Faliè surtout entendre Enea,
  Que, malgrè la mort de Romea ,
  Aimava for qu'un gasetiè
- 600. L'endourmiguessa en que que siè:
  Tout badalhant parlet d'Amica,
  Dau brave Cloanta, de Lica,
  D'Orounta qu'era un fier bregous,
  E rounquet couma un benurous.
- 605. Dau tems, pecaire! que rouncava, Jupiter d'amount relucava

<sup>&#</sup>x27; Sauf l'initiale, ce nom est en blanc dans le manuscrit de la Bibliothèque du Musée Fabre. Nous la restituons d'après l'édition de Virenque.

Couma anava tout aiçaval;

— « Ah! pardì, sen ben à chival,
Diguet, en vegent la Frigìa,

- Ou'es aiço?... » La bela Cipris
  Que quand vou ploura e quand vou ris,
  Lous iols pissous couma de gorgas,
  Mais, per pas dire de messorgas,
- 615. Pus piatadous e pus poulits,
  L'arrapa per lou surpelis:
   « Vejan, s'ou dis, pera tignassa,
  De qu'avès tant contra ma raça?
  Ses pas las de cercà garguil,
- 620. Despioi tant de tems, à moun fil?

  Avès reçauput quauqua injura

  D'aquela paura creatura?

  Ah! viel troumpur, es-ti permés?...

  Anàs, ingrat, m'aviàs proumés
- 625. Que sous enfants, per drech de guerra, Regnarien sus touta la terra; Sus vostra fe n'avias jurat. Quau diable ara vous a virat? Ieu me sounjave: aquela proia
- 630. Au mens nous refarà de Troia E, quand menariè de rambal, Vau mai l'estofa qu'un retal;

E cepandant ni quoi, ni qu'esça, Lioga dau floc ou de la peca,

- 635. N'a pas soulament un casau,
  Que dise? n'a pas lou repau:
  Deçai, delai, toujour per orta,
  Embe sa miserabla escorta,
  Dupa das Dieus, batut das gents,
- 640. Jouguet das aigas e das vents.
  Oh! parbieu, per lou parentage,
  Levàs-lou d'aquel pequinage.
  Antenor que, sans li fa tort,
  Noun es dins lou found qu'Antenor
- 645. E que, couma moun fil Enea,
  N'a pas per mera Citerea;
  Antenor, qu'as Dieus ten pas res,
  Antenor, tout Antenor qu'es,
  Aurà traversat l'Illiria,
- 650. Bravat lous Grec's e lur furia,
  Bastit una vila, un castel;
  Lou veiren pus gras qu'un vedel,
  E tranquille dins soun rouiaume
  Couma aven vist lou rei Guilhaume;
- 655. E moun fil qu'es vengut d'aici, Qu'es per lou mens vostre cousi, Moun bastardou, moun cher Enea, Malgrè sa maire e sa lignea,

Trouvarà pas un soul cami

- 660. Que lou renda au païs lati?
  Faudrà-ti toujour per bricola,
  Qu'ane prene lou de l'escola?
  L'on sap be d'ounte ven lou cop;
  Mais à la fin lou trop es trop.
- 665. Coussi par ça qu'aven de graças

  Que plasoun mai que sas grimaças,

  Counven-ti que vostra mouliè

  Nous rende aqueles cops de ped? »

  Jupiter, qu'era en trin de rire,
- 670. A Venus se metet à dire:

   « Cala, Ciprls, aquì n'i'a prou;

  Veni, m'amour, fai-m'un poutou;

  Veses be: te sies escaufada,

  Ce que vai mau dins una fada
- 675. Mais, se te vos ben refrejà, N'as qu'à m'ausì proufetisà Sus lou sujet de ta familha. Assetàs-vous aquì, ma filha, E tengàs pas lou mourre en l'er,
- 680. Car fariàs troumpà Jupiter.

  » Lou grand Enea, en Ausounia
  Quauque jour aurà Lavinia;
  La fringarà couma un devot,
  E l'espousarà couma un sot.

- 685. » Après una guerra de diable, Farà bastì, car n'es capable, Una citat de la grandou De Balharguet ou de Jacou, Sans coumtà força autras vilotas
- 690. Couma de resoun pus pichotas.
  » Per moussu soun fil Iulus,
  Autras fes apelat Ilus,
  E dins sa disfourtuna Ascagna,
  Aval se debana una escagna
- 695. De trenta bouts que li faran Chaca fieu lou regne d'un an. Agrandirà sa capitala E serà la souca rouiala De noun sai quand de ratatets,
- 700. De mountagnards e de barbets.

  » De sa raça, una relijiousa,
  Pecaire! touta vergougnousa,
  Escullarà, dins un maset,
  Remuset e Roumuluset,
- 705. Divina e senta bessounada
  D'un fringaire vostre enfournada.
  Es vrai que l'abille fourniè,
  Que sap tout lou fin dau mestiè,
  Troumparà cònsous e pouliça,
- 710. Car li dounarà per nourriça

Una louba que, toutes dous, Lous dressarà couma de loups.

- » Digne enfant d'una tela maire, Eiritie de soun saupre-faire,
- 715. Romulus, en loup routinat,
  Grujara tout lou vesinat.
  Pus digne encara de soun pera,
  Lioga d'estre mes en galera,
  Pendut ou mes en quatre quarts,
- 720. Foundarà la vila de Mars
  E de soun noum, coumprenes couma
  La vila s'apelarà Rouma:
  Crese que li a pas de bonur
  Sus terra, que per un voulur.
- 725. » Aco's pas res, sa longa raça
  Tant louba couma el, amai passa,
  Douminarà saique en tout tems,
  E sus touta mena de gents.
  Ansin ou vòu la destinada
- 730. Dins l'ourdounança qu'ai sinnada.

  » Ma tartalassa de Junoun,

  Qu'ara fai tant de carilhoun,

  La vas veire venì pus douça

  E pus soupla qu'una simoussa.
- 735. Adounc, siè per drech, siè per tort, Serà dau partit dau pus fort,

E rirà d'entendre Micena Quialà jout la grifa roumena. » Cesar, vengut de toun Trouien,

740. Noble traite, illustre vaurien,
Descendut clarament d'Iula,
Pioi que prendrà lou noum de Jula.

Batrà mar, terra, e dins lou Ciel Serà mes à cops de coutel.

- 745. » Quand çai l'auren, treva de guerra, La pes regnarà sus la terra; Es vrai que li aurà de coumbats, Quauques milhouns d'assassinnats; Mais tout aco vau pas la pena.
- 750. Estacada emb una cadena, Que li laissarà tout escàs Agi las arpas per detràs, Ben aloungada d'esquinetas, Sus un sofat de baiounetas,
- 755. La Furou, lou cueu tout en sang, Charpinarà couma ma grand.

» Regarda, Cipris, que de glouera! Mais, en countant aquela istouera, Troves-ti pas qu'ai pres un toun,

- 760. Plen d'elegança amai d'ouncioun?... Que dises, charmanta Climena?»
  - « Ai! semblas lou pera Bridena,

Quand prechava sus un tauliè, Li dis Venus per flatariè. »

- 765. Jupiter, dupa de la gralha
  Que tant adrechament lou ralha,
  Se determina d'envouià
  Aiçaval lou fil de Maià,
  E per fa veire à Citerea
- 770. Lou cas que fai de soun Enea,
  Remés un bilhet au pedoun,
  Escrich de sa man à Didoun.
  Mercura tant voula, tant rama,
  Que lou vespre as mans de la dama,
- 775. Couma Jupin li aviè prescrich,
  Aget rendut aquel escrich,
  D'autra part, en lenga punica,
  Tant touquet lous messius d'Africa
  Qu'aurien ficat, las bonas gents,
- 780. Dins sa camisa, lous Trouiens; Surtout la veusa de Sichea, Qu'embe l'alé sussava Enea. Cepandant, lou dit Eneas De grand mati quitet lou jas
- 785. Ounte aviè passat la nioch blanca, E munits chacun d'una branca, Anet veire de faire un tour Emb Acata, à pouncha de jour,

Vouliè saupre se lou terraire
790. Sentissiè l'aissada e l'araire,
Ou, couma lou trouvava siau,
Se noun li aviè que de bestiau.
Lou prince era à la descouverta,
Un nistejaire tant alerta

795. Que, quand un autre la fasiè, N'i'n coustava una malautiè. Sur tout auriè virat cervela Se, per n'en dounà la nouvela, Quauqu'un mai l'aviè devançat

800. E belèu se seriè penchat.

Dins lou recantou d'una grota,
Aviè ben rejounit sa flota:
L'armasi se clavava pas,
Mais l'atapet emb un bartàs:

805. E sans sounà mout, emb Acata, Chacun soun bilhot à la pata, Aneroun roudà lou païs.

Touta lusenta de vernìs (E n'aviè dau pus fin, la bela), 10. Venus, deguisada en pieucela,

810. Venus, deguisada en pieucela,
Per que la counouguessoun pas,
Vers eles ven au pichot pas,
Fort moudestament, c'et-à-dire
Sans faire la baucha, sans rire;

- 815. Car autrament coumprenes be Que l'acoutrage fai pas re. Foullira, susava, era lassa, Veniè dau Ciel, era à la cassa, E per prene l'er d'entacon,
- 820. Moustrava per aqui quicon.

  Maroun, sus quau l'on s'en repausa,
  Dis que moustrava pas grand causa:
  Tout escàs dous moucis de pel,
  Qu'auriàs tapat en lou capel;
- 825. Fort pau de mai. La fina pieça
  Li dis emb un toun de Lucreça:
   « Messius, fasès-me lou plesì
  De me dire se per aicì
  Auriàs pas trouvat en campagna
- 830. Una filha de ma coumpagna,

  Que, couma ieu, porta un carquouès

  Emb un petenler de chamouès?

  Acoutis un senglat tant orre,

  Que tramble per ma chera sorre. »
- 835. Soun fil li dis tout encantat:

   « Noun aven ni vist, ni paupat
  La sorre que disès, madama;
  Mais vous jure be sus moun ama
  Que, s'es un moucel couma vous,
- 840. L'on n'en fariè pas grand retrous.

Cadedines, quinta galharda! Sentisse que vostre iol me larda, E dau toun que m'avès parlat, Vous cercàs pas un porc senglat.

- 845. Diantre, quinte airet! quinta mina!
  Quinta carnadura divina!
  Anen, anen, countàs-m'aiço,
  Car crenisse lous quiproco.
  Ses quauqua Deessa, ma chera.
- 850. Jupiter es-ti vostre frera?
  Ses-ti la luna?... lou lugar?...
  Regnàs-ti sus terra, sus mar?
  Se ses d'aquela senta raça
  Couma ou denota vostra faça,
- 855. Acourdàs-nous, per charitat,
  Un pauquet de vostra piatat.
  Savès be qu'aven fach naufrage;
  E, couma aicì, après l'ourage,
  Una bounaça nous reten,
- 860. Digàs-nous au mens ounte sen?

  » Poudès coumtà que, per la paga,
  Un jour de quauques cops de daga,
  Fau que vou counche vostre autel.
  De tout lou sang d'un gros vedel,
- 865. E que vostras narras divinas Nifloun tout lou jus das mechinas.»

Venus li respond: — « Vous troumpàs, E vese qu'antau me flatàs, A causa que sans jarratieira

- 870. Mostre ma camba tout entieira;
  Mais, moun cher, las filhas de Tir
  Sen pas de niognas de Sent-Cir,
  E quand nous trouvan à la cassa
  Dounan d'er à nostra carcassa:
- 875. Quau serà pas d'aquel avis,
  En cugant pot passà tout lis;
  Voulen pas que lou caud nous brulle.
  » Per vous, que ses pas ridiculle
  E qu'au countrari galament
- 880. M'avès fach un bel coumpliment, Vou'n anarés pas sans replica. Vesès: ses en terra punica, Procha la vila d'Agenor. Didoun, que vau soun pesant d'or,
- 885. Li regna li a pas una annada;
  Es jouina, veusa, recercada,
  Presque autant bela couma ieu;
  Mais pus saja, e mai que noun deu,
  Aquì la granda diferença:
- 890. Car ieu peque per coumplasença,E Didoun per severitat...Mais, laissen alai ma bountat,

E las frechous d'aquela dama; Venès aicì, vous, bona lama,

- 895. Asseten-nous sus lou gasoun E, sans faire lou poulissoun, Escoutàs l'istouera toucanta D'aquela veuseta charmanta. La dire touta, es un abus,
- 900. Mais la prendren de sus en sus;
  Venès, aiço vous interessa.
  » Sauprés dounc qu'aquesta princessa,
  Neta e poulida couma un jour,
  Tant per respec que per amour,
- 905. Espouset lou comte Sichea,
  Garçou de bona renoumea,
  Que soun pera li aviè causit
  Pus riche qu'ela e fort poulit.
  Per malur perdet aquel pera,
- 910. Mort, s'ou disoun, de la coulera Que prenguet contra un estourdit, Qu'en brucant pres d'el au jardì, Li aviè faussat una tulipa E presque fach toumbà sa pipa:
- 915. Antau soun fil Pigmalioun
  Regnet sus Tir e sus Sidoun.

  » A l'ome de sa jouina sorre,
  Tant cerquet rampogna, aquel orre,

- Aquel traite, aquel malurous,
  920. Aquel diable de cerca-pous,
  Que, per li avedre sa pitança,
  Metet toutes sous crocs en dansa;
  Mais, couma veget, lou brutau,
  Que soun bèu-fraire era pas bau,
- 925. E que, surtout à la batesta,
  El li pourriè pas tene testa,
  Per darriès, au ped d'un autel,
  Lou daguet à cops de coutel.
  » Sans sounà mout d'aquel afaire,
- 930. Long tems à la veusa, pecaire!
  Diguet: « Per que vous afflijà?
  Vostre ome es anat vouiajà;
  E dounariei pas una tacha
  De touta femna qu'aco facha. »
- 935. » Lou couqui! quinte bel sermoun!
  Una nioch la paura Didoun,
  Qu'en revant sa chera coumpagna,
  Fasiè de castels en Espagna,
  Vous vei pareisse tout d'un cop
- 940. Sichea en sang, palle, salop,
  Que li ven moustrà sa bedena,
  Lous traus qu'aviè dins la coudena,
  L'autel ounte per trahisoun
  L'aviè dagat Pigmalioun,

945. L'argent qu'aviè causat l'entriga,
E qu'anfin li dis que fugiga.
» Didoun, evelhada en sursaut,
De soun liech faguet pas qu'un saut,
Per s'emparà de la pecugna;

- 950. A grand femna aco noun repugna.
  Pioi, seguida das Tiriens,
  Que dau rei n'eroun pas countents,
  Dau traite vai curà lous cofres,
  Lous rend pus laugès que de gofres;
- 955. Prend toutes lous veisseus dau port, Gagna la larga e n'a pas tort. Que disès d'aquela veusota? Trouvàs-ti que seguet manchota? Aicì croumpet pas que lou sou
- 960. Que clausirie la pel d'un biou, E n'embarret pourtant la plaça D'una bela e granda vilassa... A perpau, digàs-me quau ses? Ounte gagnàs? D'ounte venès?»
- 965. « Ai! li respond lou fil d'Anchisa :
  Se faliè qu'en touta franquisa
  L'on vous faguessa aquel recit,
  De vespre seriè pas finit;
  E seriè vous metre au suplice
- 970. De vous countà tant de bourlisse:

Boutàs, vau mai que fadegen; Car, anfin, de que vous diren? Que sen istats chassats de Troia? Aco vous metrà pas en joia,

- 975. Noun plus que lous gros ouragans Que nous pinçoun despioi dech ans. Per vous aprene cau sen, passa! Ieu, ple de la graca eficaça, Vous dirai sans deguisament
- 980. Que soui segu d'estre un grand sent, Un predestinat qu'a beu faire E que jamai pot pas mautraire. Aco, temouen sent Augustin, Es ma verquieira e moun destin:
- 985. Au ciel dejà la renoumea M'apela lou sent pera Enea.
  - » Quand ageroun mes Troia au sac, Prenguere moun plen aubressac De dieus qu'apeloun de penatas;
- 990. Demandàs au fidele Achatas, Que vous bada aquì couma un chot, Couma diauca li soui devot.
  - » D'alhurs, soui de granda familha, Car, jujàs, ma mera era filha
- 995. De certen pougnadet de car Que toumbet dau ciel dins la mar,

Quand Jupin à Moussu soun paire Estrounchet ras aquel afaire. D'aqui vesès, par counsequent, 1000. Que Jupiter es moun parent. » Ara vau veire, en Italia, Qu'un uchè me porte coupla A mous vassals de perqu'illai, E, s'ai d'argent, plaidejarai; 1005. Si noun, cargue pelhas e tàrrou E tournà vida de coucarrou; Après tant de tems, Dieu mercis! Saique l'on n'es pas apendris: Dech ans li a que rodan l'Asia, 1010. Pioi l'Europa, ara la Libia, E vesès couma soui chanut: Ai la mitat dau cueu tout nut, E parle pas que de mas bralhas. » Jujas be que mas cassibralhas, 1015. Engendrats de gents de pas res, Couma reis, princes, miquelets, Pastats de terrun e de crassa, Sans la co d'un dieu dins sa raça, Sans nimfa de roc ni de rieu, 1020. Sans una traça de miech-dieu, D'ourdura au respec de soun mestre, Jujàs be couma devoun estre. »

Flatada belèu dins lou found Mai de l'ourguiol de soun poupoun 1025. Que toucada de sa misera, Venus, es vrai que s'era fiera, Aco li descounveniè pas, Aprouvet fort lou d'Enèas. Mardi! la pus magra barouna 1030. Se coufla aiçaval, se pavouna, Quand vei sous rat-grieules d'enfants Partajà sous ers empourtants, Couma sas pelhas e sa mina, Sas chimeras e sa famina. 1035. — « Quau que pougàs estre, s'ou dis, Ses pas ahit en paradis. Pioi qu'à lioga de l'Italia, Vous ses rendut dins la Libia, Agandissès-vous sans façoun 1040. A Cartaja, aco de Junoun. E, s'aloungàs vostra visita, Li veirés touta vostra suita. » Vesès-ti pas sus lous estancs

Aquel passage d'allebrans 1045. Que voula en troupa, monta, baissa, Raseja l'aiga e pioi la laissa, Vai, ven, roda deçai de lai

E prend de bistours que noun sai,

Avans de causì sa retreta? 1050. Regardàs-me couma una beta, Se las gents que cresès negats Venoun pas couma eles au jas. Soun dins lou port ou li van estre; Vous, per li faire trouvà mestre, 1055. Enfilàs lou pus drech camì E bon vouiage, moun ami!» D'una graça touta divina, Venus adounc vira l'esquina; Soun col se daura de pèus blounds, 1060. Sa rauba li bat lous talouns, Sembla que chanja pas de plaça E glissa couma sus la glaca. Entre la counouisse, Eneàs Li crida: — « Ma maire, ounte anàs, 1065. Ma mamà, ma chera maireta, Venès me bailà la maneta. Ai, moun Dieu, ma mamà, secous! Ma mamà, ieu vene embe vous; Boutàs, esperàs-me, pecaire! 1070. Ai! ma maire, ma chera maire!» Lou petet aget bèu souscà, Sa mamà lou laisset bascà; - « Ah! be, diguet el, pioi qu'es sourda, Digan un mot à nostra gourda.

E pioi drech aco de Didoun! »

Per que degus noun lous vejessa,

Que quauque voulur noun vouguessa

Li raubà ce que n'avien pas,

1080. Venus, d'un large nivoulàs,

Que lous poudiè metre or d'ataca.

Li aviè fach couma una barraca.

Pioi s'era envoulada à Pafos;

Votra!... seguigan lou talos.

1085. Un bon lambiàs sus la peitrina,
Escaleroun una coulina,
D'ounte vegeroun la citat
Bastida mai que per mitat:
— « Ai veja, Acata, qu'es belassa,

1090. Dis Enea, aquesta vilassa!

Sembloun de gleisas lous oustaus.

Foucha! que lous clouchès soun auts!

La reina, au trin qu'aco s'entancha,

Se moca pas embe la mancha.

Que noun s'en mouneda per tus.

Amai l'on veja à ta prestança

Que sies negat dins la finança.

"I ou mendre oustau sembla un aute

» Lou mendre oustau sembla un autel 1100. Toutes soun tirats au courdel;

Certa, aiço soun pas las cabanas, Fachas en de bola e de canas, Ounte nisavoun, tems jadis Lous nobles d'aqueste païs.

- Te, regarda, moun cher Acata,
  Que de manobras, de garçous
  Emplegoun aval lous massous,
  Per bastì pourtaus e muralha.
- De Didoun carroun lou palai!
  Mais, diantre! de que fan alai!
  Ah! vese, vese, aquel basacle
  Es una sala de spetacle:
- 1115. Serà ben loujat Arlequin.

» Fan dins aquel quartiè d'alin, Un martinet per la justiça, Un refectouer per la pouliça, De tinaus per lous usuriès,

1120. De castels per lous financiès, Un espitau per la noublessa E de prisous per la feblessa.

» Li a pas, malgrè tout lou sagan, Una avelha d'aquel issam

1125. Que faga soun mèu per lous autres. Per nous faire pas pouni nautres,

De lion las pourren espinchà Mais las cau pas trop aprouchà. » Acata, pourtant, quinta joia 1130. S'antau refasian una Troia. » Sus aquel goust, mas gents s'en van, Introun, arrivoun au mitan D'aquela superba vilassa; Regardoun tout lou mounde en faça 1135. E crenissoun pas lou tricot Per la sieuna qu'es au souplot. Quand l'escadra de Fenicia Prenguet terra dins la Libia, S'anet pausà jout un bousquet 1140. Per aquel païs prou fresquet. Dins la partida la pus soumbra, Trouveroun, en gratant à l'oumbra, Lou visage d'un ase mort: - « Anen! seren un puple fort, 1145. Poulit, subtil, pichot manjaire, S'ou digueroun e reguinnaire, Un puple de bona façoun E lou toca-fol de Junoun. » Aquì Didoun, plena de zela, 1150. Li dediava una capela

> De quau la porta, facha esprès, Pourtava sus quatre escaliès.

Sa bona clau, forta sarralha,
Braves gafous, bela muralha,
1155. Ounte un galhard mouine escriviè
Emenda à quau li pissariè,
E punicioun courpourela
Se li pausavoun sentinela;
Cresès be qu'alai couma aici,
1160. Aco vòu dire: — « Cagas-i! »
Enea, en vesent l'escritura,
S'aprocha, n'en fai la letura,
E, couma adounc era lou tic,
N'en tiret un grand prounoustic:

1165. — « Anen, s'ou dis, tala defensa Çai supausa pas l'astinença. Per nautres qu'aven tant junat, E qu'encara aven pas dinnat, N'aven qu'à nous moucà de l'ordre,

Dins lou tems qu'espincha pertout
Fora, dedins, dessus, dejout,
Devista, au found d'una travessa,
La reina que ven à counfessa.

I 175. Per la poude veire milhou, Intra e se met dins un cantou, Mais las muralhas tapissadas Li douneroun d'autras pensadas:

Un pintre li aviè dessinnat 1185. Lou viel Priam tout engrunat, Lou fier Achila, lous Atridas, D'interessantas descrusidas D'ounte el aviè tirat sa part. - « Oh! oh! s'ou dis, per quinte asard 1185. Çai sen counouguts, diga, Achata? Veja Priam, coussì se grata! Veja-me ieu, veja-te tus, Mardines, veja lous pessucs Que tant perqu'illai nous macavoun, 1190. Veja lous poungs que nous boumbavoun Ah! pardine, aco's ben aco: Anen, fau counclure d'aiço Qu'en tout païs aven la glouera De fourni de beus trets d'istouera. 1195. Vai, moun amic, sans vanitat, Crese qu'aicl faren piatat! » D'Anchisa la prougenitura, En vesent aquela pintura, Pus mouquet qu'un viel courdeliè 1 200. Qu'a pas pus la clau dau celiè, Sentissiè pourtant sa prunela

> Seringà couma una canela. Counvene qu'era ben au fet; Mais aicì n'aviè lou sujet,

Fasiè per aqui quauqua proia,
Achila sourtissiè d'un bout
Qu'au diaucas li ou raflava tout.
Un pau pus lion veget la tenda
1210. Ounte Resus paguet l'emenda

C'et-à-dire seguet rouat.

E de chivals qu'aviè menat
Un cap-de-jouvent de la festa
Lous crouquet pendent la batesta,

1215. S'aviè fach beure au Simoïs

La velha sous chivals benits,

Priam auriè vendut en fieira

L'armada greca touta entieira,

Per tau que lou rieu das Trouiens

E que las aigas de Frigia
Soun abillas dins la magia.
Aco perven de ce qu'un Dieu
L'ensegna au found de chaca rieu.

Enlardat dau spountoun d'Achila;
Embe lou ferre aquel agnel
Laurava au cueu d'un toumbarel
De tela maniera, pecaire!

1230. Que l'auriàs pres per un araire.

Entreveget dins un faubourg Las pus grands damas de la cour, Tristas, pallas, esfoulissadas, Las gautas toutas graufignadas, 1235. Qu'eroun, sans auboi ni viauloun, Mountadas au Palladioun. Minerva aquì, couma una russa, En las vesent, frounzissiè l'ussa, E d'un iol que fasiè flartat, 1240. Las roudilhava de coustat. Ector penjat fora la vila, E mes en venta aco d'Achilla; Ector soun cousi, brave enfant, Era delivrat à Priam, 1245. Que l'enarret sus sa paraula Vint francs lou quintau, pes de taula. El meme atabé se veget Galhard ouvriè, poulit sujet, Au mitan d'una contradança 1250. Que lou tapinava en cadança. Aquela bourrelha d'Argos Li aviè disloucat lous gigots. Jout d'aubres, au found d'una alea, L'amazona Pentesilea, 1255. Un gros tetinàs d'un coustat

E de l'autre un cros tout furat,

Avans de causì sa retreta? 1050. Regardàs-me couma una beta, Se las gents que cresès negats Venoun pas couma eles au jas. Soun dins lou port ou li van estre; Vous, per li faire trouvà mestre, 1055. Enfilàs lou pus drech camì E bon vouiage, moun ami!» D'una graça touta divina, Venus adounc vira l'esquina; Soun col se daura de pèus blounds, 1060. Sa rauba li bat lous talouns, Sembla que chanja pas de plaça E glissa couma sus la glaca. Entre la counouisse, Eneàs Li crida: — « Ma maire, ounte anàs, 1065. Ma mamà, ma chera maireta, Venès me bailà la maneta. Ai, moun Dieu, ma mamà, secous! Ma mamà, ieu vene embe vous; Boutàs, esperàs-me, pecaire! 1070. Ai! ma maire, ma chera maire!» Lou petet aget beu sousca, Sa mamà lou laisset bascà; - « Ah! be, diguet el, pioi qu'es sourda, Digan un mot à nostra gourda.

1075. Bota, ami, laissen lou gourdoun

E pioi drech aco de Didoun! »

Per que degus noun lous vejessa,

Que quauque voulur noun vouguessa

Li raubà ce que n'avien pas,

1080. Venus, d'un large nivoulàs,

Que lous poudiè metre or d'ataca.

Li aviè fach couma una barraca.

Pioi s'era envoulada à Pafos; Votra!... seguigan lou talos.

1085. Un bon lambiàs sus la peitrina,
Escaleroun una coulina,
D'ounte vegeroun la citat
Bastida mai que per mitat:
— « Ai veja, Acata, qu'es belassa,

Sembloun de gleisas lous oustaus.
Foucha! que lous clouchès soun auts!
La reina, au trin qu'aco s'entancha,
Se moca pas embe la mancha.

Oue noun s'en mouneda per tus.

Amai l'on veja à ta prestança

Que sies negat dins la finança.

» Lou mendre oustau sembla un autel

1100. Toutes soun tirats au courdel;

Certa, aiço soun pas las cabanas, Fachas en de bola e de canas, Ounte nisavoun, tems jadis Lous nobles d'aqueste païs.

- Te, regarda, moun cher Acata,
  Que de manobras, de garçous
  Emplegoun aval lous massous,
  Per basti pourtaus e muralha.
- De Didoun carroun lou palai!
  Mais, diantre! de que fan alai!
  Ah! vese, vese, aquel basacle
  Es una sala de spetacle:
- 1115. Serà ben loujat Arlequin.

» Fan dins aquel quartiè d'alin, Un martinet per la justiça, Un refectouer per la pouliça, De tinaus per lous usuriès,

- 1 1 20. De castels per lous financiès, Un espitau per la noublessa E de prisous per la feblessa.
  - » Li a pas, malgrè tout lou sagan, Una avelha d'aquel issam
- 1125. Que faga soun mèu per lous autres. Per nous faire pas pouni nautres,

De lion las pourren espinchà Mais las cau pas trop aprouchà. » Acata, pourtant, quinta joia 1130. S'antau refasian una Troia.» Sus aquel goust, mas gents s'en van, Introun, arrivoun au mitan D'aquela superba vilassa; Regardoun tout lou mounde en faça 1135. E crenissoun pas lou tricot Per la sieuna qu'es au souplot. Quand l'escadra de Fenicia Prenguet terra dins la Libia, S'anet pausà jout un bousquet 1140. Per aquel païs prou fresquet. Dins la partida la pus soumbra, Trouveroun, en gratant à l'oumbra, Lou visage d'un ase mort: - « Anen! seren un puple fort, 1145. Poulit, subtil, pichot manjaire, S'ou digueroun e reguinnaire, Un puple de bona façoun E lou toca-fol de Junoun. » Aquì Didoun, plena de zela, 1150. Li dediava una capela De quau la porta, facha esprès, Pourtava sus quatre escaliès.

Sa bona clau, forta sarralha,
Braves gafous, bela muralha,
1155. Ounte un galhard mouine escriviè
Emenda à quau li pissariè,
E punicioun courpourela
Se li pausavoun sentinela;

Cresès be qu'alai couma aici,
1160. Aco vou dire: — « Cagas-i! »
Enea, en vesent l'escritura,
S'aprocha, n'en fai la letura,
E, couma adounc era lou tic,
N'en tiret un grand prounoustic:

Gai supausa pas l'astinença.

Per nautres qu'aven tant junat,
E qu'encara aven pas dinnat,
N'aven qu'à nous moucà de l'ordre,

Dins lou tems qu'espincha pertout
Fora, dedins, dessus, dejout,
Devista, au found d'una travessa,
La reina que ven à counfessa.

I 175. Per la poude veire milhou, Intra e se met dins un cantou, Mais las muralhas tapissadas Li douneroun d'autras pensadas: Un pintre li aviè dessinnat

1185. Lou viel Priam tout engrunat,
Lou fier Achila, lous Atridas,
D'interessantas descrusidas
D'ounte el aviè tirat sa part.
— « Oh! oh! s'ou dis, per quinte asard

1185. Çai sen counouguts, diga, Achata?

Veja Priam, coussì se grata!
Veja-me ieu, veja-te tus,
Mardines, veja lous pessucs
Que tant perqu'illai nous macavoun,

Anen, fau counclure d'aiço

Qu'en tout païs aven la glouera

De fourni de bèus trets d'istouera.

1195. Vai, moun amic, sans vanitat,
Crese qu'aicì faren piatat! »
D'Anchisa la prougenitura,
En vesent aquela pintura,
Pus mouquet qu'un viel courdeliè

Sentissiè pourtant sa prunela
Seringà couma una canela.
Counvene qu'era ben au fet;
Mais aicì n'aviè lou sujet,

Fasiè per aqui quauqua proia,
Achila sourtissiè d'un bout
Qu'au diaucas li ou raflava tout.
Un pau pus lion veget la tenda

1210. Ounte Resus paguet l'emenda C'et-à-dire seguet rouat. E de chivals qu'aviè menat Un cap-de-jouvent de la festa Lous crouquet pendent la batesta,

1215. S'aviè fach beure au Simoïs

La velha sous chivals benits,

Priam auriè vendut en fieira

L'armada greca touta entieira,

Per tau que lou rieu das Trouiens

E que las aigas de Frigia
Soun abillas dins la magia.
Aco perven de ce qu'un Dieu
L'ensegna au found de chaca rieu.

Enlardat dau spountoun d'Achila; Embe lou ferre aquel agnel Laurava au cueu d'un toumbarel De tela maniera, pecaire!

1230. Que l'auriàs pres per un araire.

Entreveget dins un faubourg Las pus grands damas de la cour, Tristas, pallas, esfoulissadas, Las gautas toutas graufignadas, 1235. Qu'eroun, sans auboi ni viauloun, Mountadas au Palladioun. Minerva aquì, couma una russa, En las vesent, frounzissiè l'ussa, E d'un iol que fasiè flartat, 1240. Las roudilhava de coustat. Ector penjat fora la vila, E mes en venta aco d'Achilla; Ector soun cousi, brave enfant, Era delivrat à Priam, 1245. Que l'enarret sus sa paraula Vint francs lou quintau, pes de taula. El meme atabé se veget Galhard ouvriè, poulit sujet, Au mitan d'una contradança 1250. Que lou tapinava en cadança. Aquela bourrelha d'Argos Li aviè disloucat lous gigots. Jout d'aubres, au found d'una alea, L'amazona Pentesilea, 1255. Un gros tetinàs d'un coustat E de l'autre un cros tout furat,

Armada d'un arc e d'un sabre, S'acoussava as Grecs couma un gabre, Se pot pas creire la façoun 1260. Que manejava l'espadroun.

Dins lou tems que lou paure Enea Badava aqui Pentesilea, La charmanta reina Didoun Intret au temple de Junoun,

- Oue l'on pot dire d'aco belas; Mais per la mina, lous atrets, La talha e ce que ven après, La reina n'era distingada
- Entre que seguet au tambour,
  Laisset intrà touta sa cour
  E sajament ela s'arresta;
  Vers la vouta leva la testa,
- Risca pas de se foundre au sou E s'asseta aqui per prudença, Sans n'asardà l'esperiença. Una bela reina, foullou!
- D'aqui creet emplouès, oufices, Charjas, dignitats, benefices,

Berretas, capels e rouquets, Abits rouges, abits vieulets, 1285. Aumussas mouienas e grandas, Crossas e mitras, e coumandas, E lou tout sans fripounariè, Car faguet una lutariè. Aviàs, per una grossa misa, 1290. Ounou, lucre, e feneantisa, E quau couflava l'esquipot S'en anava embe lou gros lot. Un poulit mourre e de mouneda Empourtavoun moutoun ou feda, 1295. Mais lous que prenien de bilhets Sus soun merite, sans pus res, Establits curats ou vicaris, Sujets au nervi de coursaris, Avien, jout la carga e lou bas, 1300. Un mourrau ple de gramenàs. Quinta lutariè qu'un rei founde Atirarà toujour lou mounde; Aco's la fouliè dau public. Eneàs embe soun amic, 1305. Dins la foula vesoun Sergesta Sans capel, sans bralha e sans vesta; Pioi Cloanta, pioi Anteàs. - « Ah! paura, diguet Eneàs,

S'aqueles tentoun l'avantura, 1310. Lous vese embastats d'una cura: Sauvur Dieu! lous paures milords! » Mais ... à prepau,... s'eroun pas morts, Creiriei be que soun .... malapesta! Pas que de mens .... aco's Sergesta, 1315. Alai Cloanta, moun enfant, Vai, courris à soun endavans, Demanda-li coussi se portoun, Ounte van, d'ounte diable sortoun? Mais noun, cala; l'afaire es net: 1320. Venoun demandà soun panet. » Devignava, lou grand Enea, Car lou baroun Iliounea, Pesoulhous de bona façoun, Enclausiguet antau Didoun: 1325. — « Viva Didoun! viva Pergama! Anen, mardi, ma bela dama, Bon courage, avès, per amis, Tres veritables pergamis. Tenès, regardàs-nous en faça. 1330. Mouienant nostra bona graça,

> Esperan qu'aurés la bountat De creire qu'aven pas dinnat.

Que regalàs pas dins un temple

» Vous m'anàs dire, per esemple,

1335. E que fasès pas un saloun

De la capela de Junoun;

Aco's ce que nous met en trança;

Mais ounte que sié la pitança,

A taula coumtàs que sen tres

1340. A vous fa testa quand voudrés.

1340. A vous fa testa quand voudrés.

N'avès qu'à nous metre à l'espruva,

Tout de suita n'aurés la pruva.

» Entremens que vostres sugets

Nous laissoun aici vieure en pes;

1345. Après tout sen pas de piratas.

Aven aicì quauquas fregatas,

Mais tant flacas de batariè

Qu'un nega-chi nous las batriè,

Venen pas per lou raubatori;

Ce que nous a menat aicis, Es, pecaire! un grand apetis. Fasian vouela vers l'Esperla, Ou l'Enotria, ou l'Italia,

1355. Païs que per un noum n'a tres,
Causissès aquel que voudrés.
Disoun que la terra li es bona,
Que li a força trufas quand trona,
Que porta de braves coudouns;
1360. Que las gents li soun fort boufouns,

Un pau doubles dins lous afaires, Grands charlatans e bons crestaires. Anfin es alai qu'anavian Nous bourrà de bon orviatan,

- 1365. Veire de sents, baisà de mulas, Croumpà de rescrits e de bullas, Marcandejà lou paradis, Qu'es à dounà dins lou païs, Baissà la testa jout l'estola
- 1370. Que gouverna lou Capitola, E tachà, quand serian au jas, D'estre un pauquet canounisats, Mais un certen mestre de dansa A fach virà touta la chança:
- 1375. Orioun, aquel barrabàs,
  Embe soun er acatadàs,
  Per mar, per rocs, per bancs de sabla,
  Nous a permenats à la diabla.
  Lou pauquet qu'aven escapat,
- E Dieu vous mande la pensada De nous boujà toujour rasada, Car, ma fouè, crebarian de set, Se s'agissiè pas que d'un det.
- 1385. » Entremens, digàs-me, Madama, Vous qu'avès l'er d'una bona ama,

Sus quintas gents regnàs aicì? Sans dire per que ni coussì, Contra nautres toutes s'alufoun, 1390. Nous agairoun, ou nous rebufoun; N'i a que nous tiroun au pus drech. Es-ti la moda, dins l'endrech, De reçaupre antau la noublessa? Savès-ti, charmanta princessa, 1395. Que sen, d'alhurs, de gents devots, E que lous Dieus soun pas manchots, Qu'avian Enea à nostra testa, E que, se s'agis de batesta, En tout cas que venga au besoun, 1400. N'a qu'à lachà quauqua auresoun E fa petà sa carabina, Per li faire virà l'esquina? Ou savès, Madama, ou savès? Se n'ou savès pas, aprenès 1405. Qu'Enea es un prince impagable, Dins la guerra pire qu'un diable, En fet de pes, franc e louial E per l'amour vieu couma un gal. Se ven, e qu'ou vougàs pas creire, 1410. Ensachàs-ou, pas que per veire. » Ah! se d'entacon salissiè,

N'en prendriàs lèu la fantasiè

E nautres, serian pas en pena De nous arroundi la bedena, 1415. Car, ben belèu, dins lou plesi, La laissarias pas deglesi. » Mais s'a fach una fin funesta, Aven soun reire-grand Acesta, Rei dau Vesuva e de l'Etnà.

1420. Oh! pardi, laissàs-nous li anà. Manjà tout passant una alhada E prene una reboustilhada, Car la Sicila es un endrech Ounte l'on s'apara dau frech,

1425. E per li coire la bitalha,
L'on li a pas besoun de buscalha.
» Mais, Madama, fagan milhou,
Laissàs-nous, dins un recantou,
Adoubà nostra paura flota;

1430. Engraissàs-nous un pau la bota, Boujàs-nous lou vin de l'estrieu; Emb aco vous diren adieu. » Antau parlet Iliounea, Au grand countentament d'Enea.

Virgila dis que fremissien, Crese qu'era mens de coulera Que d'apetis e de misera.

Mos de Didoun qu'ou coumprenguet: 1440. — « Enfants, tendrament li diguet, De tout emboul, de touta pena Lous Dieus fan trouvà la sentena, E se mas gents soun de bregous, Vautres ses un pauquet fouirous, 1445. Car, anfin, deviàs be coumprene, Qu'es antau que l'on s'en deu prene Quand l'on se vei dins un païs Tout envirounat d'enemis. Se li agesses dich: — « Sen de Troia » 1450. Lous auriàs fach dansà de joia. » Aici sen pas de Rouergàs, Sen pas d'aqueles beligàs Nascuts jout la neja e la glaça, Qu'ignoroun tout ce que se passa, 1455. Lion das mountagnas ounte soun, Gents sans sentiment, sans resoun, Que cresoun que touta la terra Es dins lou trau que lous enterra; D'aco qu'es pus orre cent fes 1460. Que sous ases e sous mulets. » Nautres saven que la Frigia Es situada dins l'Asia,

> E lou sourel nous a rendut Lou sang fin e l'esprit pounchut.

1465. Voulès anà dins l'Esperia?

Aco d'Acesta, en Tinacria?

Anen, baus, demouràs aiçi;

Per vous fa vieure sans soucì,

Per vous tirà de touta angouessa,

1470. L'on vous farà clercs de parouessa, Bedots, sacristans, marguiliès, Amai vicaris, se voulès: Qu'es tout aiço? ieu soui mestressa E tenès-vou'n à ma proumessa;

1475. Quinte daumage qu'Eneàs
Embe vautres çai rode pas;
Disès qu'es un bon calignaire?
Oh! tant pis per el! mais, que faire?
Emb aco tant lou cercaren

1 480. Qu'entacon lou dessoutaren. »

— « Fora, fora, diguet Achata,
Dau nivoulàs que vous acata.

Mestre, vesès pas que Didoun,
Charmada de vostre renoum,

Entre que veirà vostra mina?

Anen, digàs-i: « Me voila! »

E vite enclausissès-me-la:

Despioi long tems la fam nous daga;

1490. Dins lou broulhard que nous amaga,

Noun li sussan que d'aigagnau, E, cavalisca! aco fai mau. Vostra mera es pas messourguieira: A tout devignat, la sourcieira! 1495. Es oura de sourti dau nis. » Sus lou champ lou nivou s'ouvris Lou prince sauta, e per bricola Aganta la reina, l'acola E li dis: — « Fau pas ges d'esprès 1500. Per m'anà querre; aicì m'avès! » Era poulit, lou camarada, Aviè sa perruca poudrada, De linge savounat au ciel, D'iols pus grands que lous d'un vedel; 1505. Venus li aviè rendut la faça Lisa, moufla, blanca, frescassa, Anfin aviè tala façoun Que la chasta e fiera Didoun Auset pas se fachà, pecaire! 1510. De ce que veniè de li faire, E quand li seguessa tournat, Quau sap se l'auriè destourbat? L'on fougna contra lou lourdige; Mais poulidiè mena flaguige 1515. E, foullira! aco's naturel.

Enea, en levant lou capel

A touta l'ounesta coumpagna, Lachet un mot sus la magagna Que li aviè fach soufri Junoun,

1520. E se reviret vers Didoun:

— « Es vous, Madama, es vous souleta, Dis, en li arrapant la barbeta, Que counsoulàs de malurous Qu'eroun perduts de found sans vous.

- Ou'es escapat dau purgatori; Sourtits de Troia, noun aven En lioc ni parent ni tenent Que nous dounessa tala ajuda.
- Voulès elevà mous ouvriès
  As dignitats de marguiliès,
  E de bedots, s'era poussible.
  Oh! n'ai pas lou cor ensensible,
- 1535. Madama, coumtàs qu'à moun tour Ben vous pagarai de retour; Vous vole tant countà flouretas, Que se lous Dieus soun pas masetas, Boutàs, quicon arrivarà
- 1540. Que, segu, plesì vous farà!
  » Benit sié moussu vostre pera,
  Qu'estrenet antau vostra mera,

D'ounte, per que, coura, coussi Un tant bel fruit se trova aicì? » Tant que las aigas das mountagnas Davalaran dins las campagnas, Qu'après lou jour vendrà la nioch, Qu'un pichè farà pas lou mioch, Soustendrai pertout que Didouna 1550. Es pus poulida que persouna, Amai s'es, e, quand seriè pas, Miracle se vou'n fachaviàs!» Aco dich, lou galant Enea Prend la pata d'Iliounea, 1555. De Sergesta, dau fort Gias, Tira Cloanta per lou bras, E toutes, per prechà d'esemple, Dansoun un branle dins lou temple. La reina s'en estounet fort, 1560. Mais quau plai n'a pas jamais tort, E sus la fin de la bourrea: - « Ses-ti, li dis, aquel Enea Qu'escullet la bela Cipris Jout lous pibous dau Simoïs? 1565. Se ses vengut dau fet d'Anchisa, Esplicàs-nous embe franchisa, Per que lous Dieus an mau menat

Un gentilhome tant ben nat?

» Dins ma jouinessa, en Sidounia, 1570. Un Grec banit de sa patria A moun paure pera Belus Venguet empruntà vint escuts, Que de creanciès demandavoun D'un rouiaume que decretavoun.

E vitament li lous prestet.

Auriè mes à cueu, lou manjaire,
Cent mounarcas couma moun paire,
Se l'agessoun gardat long tems.

1580. Countava un jour que lous Trouiens, Sias istats, dins vostra ourigina, Couma el de raça tehucrina, C'et-à-dire d'un Tehucer Que dins l'antiquitat se perd.

Soun dounc gentilhomes tehucres.
Eh be! Messius, sona miejour,
Venès, anen veire à la cour
S'auran escullat la soupeta,

»Vous cau saupre, moun bel amì, Li diguet lou long dau camì, Qu'ai, couma vous, paura aveusada, Tastat de la vaca enrajada, 1595. Ce que m'a dispausat lou cor A m'atendri sus votre sort. Vous dirai dounc que vous planisse; Mais soui reina, veusa, languisse, Ai tout escàs vint ans passats; 1600. Vous ses fricaudet, devignàs

A pau près ce qu'aco vou dire. »
Enea, emb un large sourire,
Li jeta un cop d'iol coucarel
Que lou rend mila fes pus bel.

1605. La reina, touta rejouïda,

Que l'agessa tant ben ausida,

Sans l'engajà de li parlà,

Languissiè de lou regalà;

Mais afin que, dins la drilhança,

1610. Ensaquessa mai de pitança
Li faguet, en femna de sens,
Prene un parel de lavaments;
Aco rend lou ventre pus libre
E n'alargis fort lou calibre.

1615. A sous patrouns e matelots,
Mandet cent cinquanta gigots,
Quatre-vint parels de ventrescas,
Grassas, espessas e ben frescas,
Adounc sian au tems dau pourquet,
1620. E vint miochs d'un certen vinet

Que, pecaire! metet en joia Tout lou rebaladis de Troia. Au palai, Madama Didoun, Faguet un pau mai de façoun.

- 1625. « Tus, s'ou dis, brave Iliounea, Bota-t'aquis procha d'Enea; Cloanta, Sergesta e Gias Se renjaran un pau pus bas; Acata embe ma sur Anneta
- 1630. Se metran jout la campaneta Que se branla de tems en tems, Per escarabilhà mas gents. Anen, brandilhàs la sounalha E que nous portoun de bitalha.
- Veni me metre en apetis! »

  A pena ageroun pres sa plaça

  Que vesoun venì la fricassa;

  Das iols, dau nas, en atendent
- 1640. De li poudre plantà la dent Tout aco la suça, l'envala, Per culiè voudrien una pala; Per fourcheta un large rastel E longa dalha per coutel.
- 1645. Cepandant, dins una soucoupa, Un marmitoun pourtet la soupa

Facha embe las patas d'un poul.

— « Anen, manjàs vostre sadoul, »
Diguet Didoun à l'assistança,

- 1650. « Madama, d'aquesta pitança, Respond Gias, estoumacat, L'on n'a pas pòu d'estre afascat, Mais, ma fouè, nous met per lou resta Dins un gros trincament de testa. »
- 1655. « Vai, galavard, seràs countent,
  Repliquet la reina en risent,
  Laissa-nous venì las intradas! »
  Dins dos assietas argentadas,
  L'una seguet un roussignòu
- 1660. A la gardiana, l'autre un iòu Broulhat emb una bona anchoia. Lou roustit, per coumbla de joia, Seguet un parel d'ourtoulans, Una lauseta e dous cueus-blancs.
- 1665. « Anen, anen, ma sur Anneta, Branlàs vite la campaneta, Cridet la reina cop sus cop, Fau manjà, mais lou trop es trop E vole pas, sus ma paraula,
- 1670. Veire crebà lou mounde à taula. Que levoun aqueste couvert E que nous portoun lou dessert!»

Lou dessert ven à la maloura;
Per chacun li aget una amoura,
1675. Lou papiè de quatre biscuits,
Un muscardin e dous anis.
Quau sap se lous messius fougnavoun!
Soui ben segur que roundinavoun
E qu'eroun mouquets à la mort

1680. D'avedre pas restat au port, Ounte Didoun à la canalha Aviè mandat tant de bitalha. La plupart anavoun partì. Quand, lassa de lous fa pati,

1685. La reina espoufiguet lou rire,

E per li adouci soun martire,

Diguet à sa sur de sounà

Lou branle d'un autre dinnà.

Sus lou champ sieis gaudas d'ourteta,

1690. Quatre pairous de farineta,
Nou porcs boulits, set bious farcits,
Vint-e quatre moutous roustits,
Quatorze courdadas d'andoulhas,
Ioch-cent dougenas de granoulhas,

1695. Souessanta canas de boudins, Cent lebres, quatre cent lapins, Un diable cargat de poulalha, Esclercigueroun tant la galha

De la noublessa d'Ilioun 1700. Que crideroun en carrilhoun: - « Viva la Reina e la drilhança! Viva Didoun e nostra pança!» Chacun, per s'aparà dau set, Aviè la bouta à soun coutet 1705. E lavava sa gargamela, En la pausant jout la canela, Ou per quentina una semau E per galoubet un pegau. Enea, en vesent tala festa, 1710. Se met à cridà: — « Malapesta! Acata, quinte regagnou! Vai-me vite querre Ascagnou. Marcha, courre, voula, e t'esorte A li dire qu'aici nous porte 1715. Ce que trouvarà de pus bel Au found de moun porta-mantel. » Fau qu'una reina tiriena Cargue de la cour frigiena Las poumpas que n'aven sauvat. 1720. Te, prend la clau dau cadenat. » Trouvarés, dins una lieta, Coundamnada emb una ligneta, Las bretelas dau rei Priam, Dous pendents d'aurelhas d'estam 1725. Qu'aviè la paura Polissena, Lou couliè de la bela Elena, Embe sa mostra de loutou, Bon reloge, brave bijou, Se n'era pas que se destraca; 1730. Lou pater de lach d'Androumaca, Las guetas de Polimnestor, E lou bralhet dau grand Ector.» Acata freta sa moustacha, Quita la taula e se despacha 1735. De rampli sa coumissioun A la grand glouera d'Ilioun. Cepandant Venus, enquieta Sus lous dangès de la retreta Que de traites Feniciens 1740. Avien acourdada à sas gents, Encara mai sus la querrela Qu'embe la filha de Cibela Avien aguda, tems passat, (Fioc que n'era pas amoussat, 1745. Car aviè s'agit d'un outrage Que s'oublida pas embe l'age). Venus, que vouliè prevenì Ce que n'en poudiè survenì, Pendent touta una nioch, pecaire! 1750. Revet à ce que devie faire:

Lou mati lou som la prenguet-E soun bon anjou li ou diguet: - « Per desemboulhà toun escagna, N'as, s'ou dis, à lioga d'Ascagna, 1755. Qu'à cargà toun fil Cupidoun Das presents qu'espera Didoun. Qu'aqueste dedins las babinas Dins lou couret, dins las meginas, Li bufe, à força de poutous, 1760. La malandra das amourous. Li a pas veusa, femna ni filha Que, per caressa ou per dounilha, Noun laisse plegà sa bèutat A quauca espeça de bountat. 1765. E quand dounilha embe caressa Venoun atacà sa feblessa, Tus saves milhou que degus Quinte fieu debana lou fus. » Citerea, à pena evelhada, 1770. Se leva, e seloun la pensada Que li era venguda d'amount, Vai trouvà soun cher Cupidoun: - « Enfant de noun sai quinte paire, Moun fil, s'ou dis, aicì ta maire, 1775. C'et-à-dire aquela Venus Que mouririe de fam sans tus

Malgrè sa bèutat e sas graças. Aja pietat de las disgraças Ounte es reduit un fraire tieu. 1780. Es bastard, mais es pas mens mieu, E coumprenes ben à bel ime Que tus sies pas pus legitime. Que vos? l'on a certens apàs, Mila briquets dessus sous pas 1785. —Es pas naturel qu'on n'en grounde — E l'on met d'enfants dins lou mounde. Ieu n'i'ai mes força, Dieu mercì! Aqueste, save pas coussi, L'ensaquere dins la Frigia, 1790. En gandalhejant per l'Asia. Anchisa un souer me rencountret, M'acoutiguet e l'engendret. » Ioi Junoun, qu'es una couquina,

Tant li baila darriès l'esquina,
1795. Que se noun li metes la man,
N'a pas de vida per un an.
» Ara una princessa punica,
L'a be recatat dins l'Africa,
E li fai prou d'ounestetat,
1800. Mais, mardì, l'ouspitalitat,
Se l'amistanca noun s'en mela

Se l'amistança noun s'en mela, Pot avedre una fin cruela.

Ai pòu de la devoucioun Qu'aquela baucha a per Junoun. 1805. Saves de que ten ma rivala: Bota, m'amour, veni, davala, Pren la figura d'Iluset, Soun air nicouès, mais fricaudet, E porta aco de la princessa 1810. La despolha que li an proumessa De la man d'aquel cher enfant; Ieu, que soui, pecaire! sa grand, L'endourmirai dessus ma fauda, Lou plegarai dins una gauda 1815. E, per trica ou traca entacon, Antau fresquet, farà soun som. » Tus, entremens, à dona Elisa, Drech sus soun cor, jout la camisa, Vai-me tant picà toun briquet 1820. Que s'embrande couma un luquet. » Soui segura que, s'ou vos faire, Quatre cops faran nostre afaire. Marcha, seràs lou benvengut; Ela-mema, qu'aurà begut, 1825. En t'embrassant, la bona dama, Sussarà belugas e flama. » L'Amour à la bela Cipris, Tout bijarrou qu'es, oubeïs,

Sus un clavel penja sas alas,
1830. Empocha sas armas fatalas;
E s'en vai munit de presents,
Que quauquas fes n'ou soun pas mens.
Venus adounc emporta Ascagna

A la cima d'una mountagna:

1835. Pecaire! lou paure manit,
Entre dous plats era endourmit,
Tandis que l'amour s'en anava
Vers l'endrech ounte se dinnava.
Acata, fier de lou menà,

1840. Languissiè de li retournà.

Emb el lou traite Amour arriva; Sa mina douceta e naïva Charma toutes lous assistants: Didoun lou prend de las dos mans,

1845. Lou soulleva, lou poutouneja.

L'enfant l'embrassa, la paupeja,

Ela trova qu'es ben aprés,

E per un poutou n'i'n rend tres,

Tant mai n'i'n fan, tant mens s'alassa.

1850. Era jouina, veusa, bounassa,
Didoun; anfin Didoun rougis,
Didoun sousca, Didoun cloussis.
Sa sagessa es destrantalhada;
L'amour que l'a demarmalhada,

1855. Au proufit dau brave Eneas,
Lioga de li dire adessiàs,
Se met à taula sus sa fauda.
Quau soupçouna un enfant de frauda?
Tout admira d'Ilusetou
1860. Lou biaisset, las graças, l'ardou;
Mais Fenissa, couma une eruga,
Lou quicha, lou mord, lou pessuga,
E devora, d'un iol afrit,
E lous presents e lou manit.

Vous baniguet tant lion Sichea
De la memouera de Didoun,
Qu'à pena n'aurie dich lou noum.
Lou couquinot, lou rusat qu'era,

1870. Seloun las liçous de sa mera,
Li fai senti qu'un trepassat,
Per tant galhard que sieja estat,
Vou pas un vieu que vous boulega,
Quand aimàs ben la sousselega.

1875. Didoun l'aimava, e lou Trouien,
Sans se privà d'un cop de dent,
La chatoulhava d'empourtança.
Quand ageroun bourrat la pansa,
E youidat sa bouta chacun,
1880. Anneta anet querre de lum;

Lous counvivas, à l'ourdinari. A lioga d'un soul luminari, N'en vegeroun trenta à la fes: Lou vin, seloun que l'on n'a pres, 1885. Esclercis malament la vista; Atabé manca pas requista. Per acabà d'illuminà Lou mounde qu'aviè fach dinnà, Didoun n'i'n tai pourtà cent tassas; 1890. Adounc antau se rendiè graças. Ramplis per ela jusqu'au bord Un large gob de similor, Aussa lou couide e vous lou pimpa A la glouera de tout l'Oulimpa: 1895. L'iol virat vers lou firmament, Lou chimet fort devotament, E tres fes, de tant brava qu'era, Repetet aquela priera. Teniè de soun pera Belus 1900. Aquel grand zela per Bacus, E, devouada à soun service, Chaca jour n'en fasiè l'oufice Double majur, per fa de sents, Viva l'esemple das parents! 1905. Quand, d'una ardou touta paiena,

Ageroun acabat l'antienna,

E qu'ela aget dich l'oresoun, Fagueroun coumemouresoun De Jupiter e de Madama.

1910. La reina, per sauvà soun ama, Entemena un pegau tout ras, E lou remet à Bitiàs. Aqueste, alterat couma un tigre,

A lou sussà seguet pas pigre,

1915. Tant tenguet l'alé jusqu'au bout, Que n'i'n laisset pas un degout Per lou resta de l'assemblada. Sa devoucioun trop outrada

Pourtet lous assistants counfus

1920. A n'apelà couma d'abus.

El s'aparet d'un bon soufisme.

Didoun, per preveni lou schisme
Que menaçava soun celiè,
Repetet la ceremouniè,

E la nouesa seguet passada.

Lous devots deurien couma acos
Negà toutes sous quiproquos:

Tout debat, mouienant truqueta,

1930. Finis per una cansouneta; Temouen aquela que Jopàs Cantet à la fin dau repàs.

Aqueste emb una grand perruca, Lou col mau segu sus la nuca, 1935. L'iol rouge couma una perdris, Lou nas clavelat de rubis, E d'ounte larjament coulava De tabac coufit qu'envalava, Anfin Jopàs lou maisselut, 1940. A bel ime monta soun lut, E marida, en touta discorda, Sa vouès rauca au soun de la corda. Aquì n'i aget pas que per el; Cantet la luna, lou sourel, 1945. Lou fioc, la barbasta e la glaça; Changet las estelas de plaça; Diguet qu'en iver, dins la mar, Febus sautava, en tout soun char, Per s'anà couchà de bona oura, 1950. E per se levà noun sai quoura. Viret lou ciel dessus dejout, Enfin n'en prenguet de pertout. E cepandant l'illustra clica Trouvet soun oda magnifica, 1955. Sans li entendre lou mendre mot. Tout lou tems que cantet lou chot, La reina, que se façounava,

Embe lou prince badinava,

E soun cor se caufava au four 1960. Qu'alumoun Bacus e l'Amour. — « Aça, s'ou dis, embe franchisa, Countàs-nous, noble fil d'Anchisa, Las endecas dau viel Priam.... Mais levàs d'aquì vostra man.

- 1965 De que li cercàs, rambalhaire?

  Vous noun me ses qu'un fourfoulhaire.

  Prenès garda que d'un souflet

  Sus vostre vsiage mouflet...,

  Mais noun.... istàs siau, segàs sage.
- 1970. Aprenès-nous, sans badinage, S'Androumaca plouret Ector Gaire de tems après sa mort, Una jouina veusa n'en douta.... Ah! vejas-lou coussi m'escouta!
- 1975. Fi dounc.... finissès, Eneàs....
  Aça, anen.... bon.... countinuàs,
  Courage!... lou famous Achila
  Que disoun fier e ple de bila,
  Era-ti poulit couma vous?
- 1980. Era-ti tant amistadous?

  Crese que noun... mais patiença,

  Vous ou ses trop... en counsciença.

  Se chaca jour fasès antau,

  Serai sans courset ni vantau.

1985. Chut! pes.... dins las estiblassadas
Que, sus mar, avès recassadas,
Lous vents vous an-ti baloutats
Couma aicì vous me tourmentàs?

» Saique era be quicon de pire:
1990. Car aqueste joc me fai rire
E lou qu'embe lous ouragans
Avès jougat pendent set ans,
Era tout autra turalura.
Jusquas à la mendra avantura
1995. Countàs-nous ce qu'avès soufrit
E vejan s'avès força esprit.»

FIN DU PREMIER LIVRE.

## TABLE DES MATIÈRES

## DU TOME TROISIÈME.

Odyssée d'Homère	5
Sommaire du quinzième livre	5
Libre quizieme	7
Sommaire du seizième livre	I
Libre seigieme	3
Sommaire du dix-septième livre	2
Libre des-e-setieme	4
Sommaire du dix-huitième livre	79
Libre des-e-iochieme 8	31
Sommaire du dix-neuvième livre 9	)9
Libre des-e-novieme	
Sommaire du vingtième livre 12	2 1
Libre vintieme	2 3
Sommaire du vingt et unième livre	37
Libre vint-e-unieme 13	30
Sommaire du vingt-deuxième livre	5 3
Libre vint-e-dousieme	5 9
Sommaire du vingt-troisième livre	7 1
Libre vint-e-tresieme 17	•
Sommaire du vingt-quatrième et dernier livre 18	•
Libre vint-e-quatrieme 18	8:
Lou siege de Cadaroussa 20	•
Premiè Cant 20	
Segound Cant	
Trouesiema Cant	

## 370 TABLE DES MATIÈRES.

A M. de Malida, evesque de Mount-peliè, à soun	
retour de Paris	279
Envoi à M. le Vicomte de Saint-Priest	285
L'Eneïda de Cela-nova	289
Libre premiè	-
Table des Matières du Tome troisième	-

Montpellier - Typ. GHARLES BORHM.

<u>-</u> . .


	•			

-		

## COULET et FILS, Éditeurs - Montpellier

A	depuis son origine jusqu'à nos temps. Nouvelle édition, contenant les additions inédites préparées par l'auteur pour la réimpression de son ouvrage, des preuves extraites des principaux dépôts publics, des notes, une continuation jusqu'en 1790, une table générale des matières et des noms propres par ordre alphabétique; avec des cartes géographiques d'après toutes les planches de l'édition originale, des vues et des plans inédits, etc. Publié sous la direction de M. de la Pijardière, Archiviste de l'Hérault.— 4 vol. in-4, papier vergé de Hollande, 1876-1883.
	de l'Hérault. — 4 vol. in-4, papier vergé de Hollande. 1876-1883. Prix

- DUVAL-JOUVE (J.). Montpellier pendant la Révolution de 1789 au 18 brumaire an VIII. 2 vol. in-12. 1879-1881. Prix. 6 fr. 50
- Grasser (J.), professeur à la Faculté de médecine de Montpellier. Le Médecin de l'Amour, Boissier de Sauvages. 1 vol. petit in-8 de 230 pages environ. 1895. Prix.......................... 3 fr. 50
- Guiraud (Mile L.). Les Fondations du pape Urbain V à Montpellier. I. Le Collège des Douze-Médecins ou Collège de Mende, 1369-1561. 1 vol. in-8 format carré. 1889. II. Le Collège Saint-Benoît, le Collège Saint-Pierre, le Collège du Pape (Collège de Mende, deuxième période) 1 vol. in-8 format carré. 1890. III. Le Monastère Saint-Benoît et ses diverses transformations depuis son érection en cathédrale en 1536 : Elude archéologique, accompagnée d'un plan du monastère au XVIme siècle. 1 vol. in-8. Ensemble 3 volumes in-8. format carré, sur papier de Hollande. 1891. Prix net sans remise. 50 fr.



• • 

